

**SIXTH LEGISLATIVE ASSEMBLY OF MIZORAM
(EIGHTH SESSION)**

LIST OF BUSINESS

**FOR THE SECOND SITTING ON FRIDAY, THE 8th JULY, 2011
(Time 10:30 AM to 1:00 PM and 2:00 PM to 4:00 PM)**

QUESTIONS

1. *QUESTIONS* entered in separate list to be asked and oral answers given.

PRIVATE MEMBERS' BUSINESS

2. * Resolutions.

NGURTHANZUALA

Secretary.

Please see Bulletin Part – II No. 143, Sl. No. 1-10 dated the 4th JULY, 2011 for relative precedence of Private Members' Resolution to be moved.

.....

S P E A K E R : Rorelna dik takin titlu ula, mitinin an unaute chungah zahngaihna leh khawngaihna chhuah rawh se.

Zakaria 7:9

Zawhna leh chhanna kan la ang a, kan Minister te, kan member zahawm tak te'n in hriat a kan duh chu, kan MLA te'n zawhna hi an rawn ti tlai deuh a, an rawn tih luh hnu ah kha chuan a rawn lut belh zel a nimin lam thleng te khan, Session tawp ni kha ni 27 anih avangin nimin lam thleng tepawh ala huam reng a, chu chu office lamah in lo dawng tlai a, kan session kan tan tawh si a, chhanna lam kha a rawn thleng har a. Niminah te pawh Session kan ban khan vawiina kan zawhna chhanna tur kha pakhat chauh kan lo la nei a, kan office lam te pawn an han nghak a, tichuan a lo lut belh ve leh ta zel a, chutiang chuan an han buaipui a, an han chhu nghal char char a, dak an han sem theih meuh chuan dar 9 leh tih vel ah khan an han pe thei chauh che u a. Hmun hla deuh Pu Lalduhoma phei chu dar 11 ah an han pe thei ta chauh che a, khatiang kha kan dinhmun a ni a, mahsela, chhanna te pawh lo luh belh zel tur ah ngai ila, Bulletin kan tih turah te pawh kan dawng hma ve deuh thei tawh turah ngai ila, Thawhtan lam atang chuan a tha awm e.

Zawhna No. 6 na kan la anga, Member zahawm tak Dr. R. Lalthangliana zawhna neitu in han zawt sela, i lo ko ang.

Dr. R. LALTHANGLIANA : Pu Speaker, ka lawm e. Ka Starred Question No. 6 na, Hon'ble Minister for Labour & Employment chhan atan – Youth Commission hi Mizoram ah sorkar hian autonomy a pe em tih ka zawt e.

S P E A K E R : A chhang turin Pu Lalrinliana, Minister ilo ko ang.

Pu LALRINLIANA SAILO, MINISTER : Pu Speaker, member zahawm tak Dr. R. Lalthangliana zawhna chhanna chu – a pum puhlumin autonomous autonomy hi pek ani lo tih a ni e.

S P E A K E R : Zawhbelhna, Dr. R. Lalthangliana, Pu K. Liantlinga, chuti chin chu la ila a tha awm e.

Dr. R. LALTHANGLIANA : Pu Speaker, he ka zawhna hi pawimawh ka ti riau va. Zawhbelhna ka'n neih duh chu – he kan Youth Commission buatsaih hi sorkar hmasa hmalakna kha a ni a. Amaherawhchu, hun tawp lampanga siam anih avang khan a implementation lam kha kan khawih hman vak lova. Khatih hunlai khan Sports & Youth Affairs Department khan a enkawl a, tun hnaiah erawh chuan Department lian vak lo, mahse, han ngaihtuah mai chuan Labour & Employment hnuai a awm awm tak a nihna lai phei chu a awm a, a dik ve chinna lai phei chu a awm tho va. Engpawh nisel, ka'n zawh duh laia chu a nodal department hi a pawimawh si a, Labour & Employment te chu fund pawh nei vak lo te an ni a, kuminah nuai 50 bawr vel an pe leh dawn niin

kan hria a, chu pawh chu department lamin plan a lo thehluh sak theihngihl tih te, eng eng emaw buai deuh nuaih te hi a la awm a. Engpawhnisela, department te hnuai lo deuh hlek entirnan, CSS nei ve deuh tur department te hian enkawl ta sela tih kha sorkar hian ngaihndan nei in kalpui a tum em tih kha ka zawh duh lai tak a ni a, pawimawh ka ti khawp mai a. A chhan chu hei hi Zoram thalai tena kan nghahfak a ni a. Zirlai Pawl te leh thalai tam takin a an thlir a nih avang hian a pawimawh in ka hria a, chu chu ka'n zawt duh a.

Tin, pahnihaah chuan talent nei tha tak tak te Mizoramah kan awm a, Sport chauh ni lo ah pawh thil dang tam takah. Tin, lehkha thiam hna hmu lo hrim hrim, Educated Unemployed kan han tih hi tunah hian a record figure hi a accurate chiah lo mai thei a, sing nga chuang chu kan awm tawh hrim hrim a. Khangho future tur kha kan ngaihtuah a ngai a ni, a pawimawh khawp mai a, chumi ngaihtuahna nei chuan sorkar hmasa pawh khan Youth Commission hi a din a ni. Khami te focus zawnga tih tak taka beih a tul a, chuang chuan kan Minister zahawm tak hian eng angin nge hma a lak tawh tih kha kan zawt duh deuh a. Tin, sipai (army) a tan tihte pawh hi kawng lehlamah chuan thatna deuh mai a awm a, khangte kha kan hma tel em tihte ka zawt duh a ni. South India, Tamil Nadu ahte leh Kerela State-ah te khu chuan kawnga alkatara zinga hnathawk tur 'labour' kan tih angte hi hmuh tur an awm mang tawh lo an ti a. A chhan chu hetah Saudi Arabia ramah, ram hausa ah a nuaih tel tak meuh hi an nula tlangvalte kum 10/15 hun rei tak tak zuk awm a hna zuk thawk a, helai an lo haw leh huna chhe thei tawh lo tura dinhmun pangngai taka an din theihna tur khawpin hna an zuk thawk a ni, khatiang ang chi te kha ruahmanna kan nei thei em tih te ka'n zawt tel duh a ni.

A tawp bera ka zawh duh chu Pu Speaker, tun term tan tirh lai niin ka hria a, Session ah khan kan sawi a, kan MLA zahawm tak Pu Tlinga khan a rawn sawi chhuak nghe nghe a. Governor speech ah nge kan CM speech ah ka hre chiah ta lova, Aizawl-ah hian Lord Krishna Academy kha hawn a ni dawn tih kha a awm a, kha kha a hlawhtling ta viau em? Kan lo hriat dan chuan MPS ah 2/1, MCS ah 2/1, Information Department-ah 1 tih bak kha a awm mang lova. A tum ber Civil Service, Central Service tihah phei kha chuan kan nil thak e tihte kha a awm a. Tawngkaa ka hriat dan phei chuan kan Youth Commission Chairman, kan MLA zahawm tak tih te pawh hi a sawi deuh te an ti a, a ni ve thei tho bawka. Engpawh nise, khalai ah khan sum tam tak kan seng in ka ring a, an in enkawl na turah khan, engzatnge ni kan sen tak tih ka zawt duh a. Tin, chhunzawm zel kan la tum em, a coaching academy kha tih ka zawt duh a. Tin, chumi rual chuan hetiang zawng nilova State Sorkar in a buaipui em em lova private te leh UGC te, University te pawhin heng coaching te chu an ti tho a, heng te hi kan ring ve thei tawh mai lawm maw nile, a hran a hrai a State Sorkar sum seng lo hian tih kha Pu Speaker, ka'n zawt a ni. Zawh nawn leh ka tum loh avangin ka'n zawt sei deuh hlek ani, min hrethiam dawn nia, ka lawm e.

S P E A K E R : Pu K. Liantlinga

Pu K. LIANTLINGA : Pu Speaker, ka lawm e. Ka zawh belh duh chu hei Party hrang hrang te leh MZP te, kan thalai ten Youth Commission hi Tlumtea thlir taka kan thlir kha a ni a. Sorkar hmasa pawh khan kan din dawn an ti a, a tawp ah khan an ti ta hram a. Tin, tuna mi hian kum hnih leh a chanve chu an kalpui tawh a, amaherawh chu thalai te beisei ang hi a pha ta lo em ni? 'Su' hi a ti ta deuh 'se' em ni aw tih kha ka zawh duh na chhan pawh ani a. Tin, Labour and Employment hnuai a awm a, hei hi department te tak te, khawi ah nge a office pawh a awm na kan hriat mang loh khawp a ni a. Tin, Secretary hi panga vel tun kum hnih chhung khan an sawn kual tawh a ni. Heng te avang hian kan thalai te hmasawna leh development hi a chak ta lo em ni? Tin, Secretary te hi nghet deuh, efficient deuh a dah theih em kan thalai hmasawna tur atan hian tih kha ka zawhna pakhatna nisela.

Tin, a pahnihna atan chuan Youth Commission hian thalai te hmasawna tur atan hnathawh tur trade chi hrang hrang ah hian eng tiang chiah in nge hma a lak tih ka zawt duh a. Hei keini ZNP te phei chuan thalai sing tel hna kan siam sak ang kan ti a ni. Hetah hian a sing tel tak meuh meuh hi hna siam sak theih dan a awm ani tih hi in hmu chhuak thei ang em ? Siam a ngai ani tih kha ka sawi duh a. Thalai te tan Youth Commission kal tlang hian kan ram ah sum eng zat nge kan lak luh tawh? Eng zat nge a amount? Eng zat nge a figure min hrilh thei ula ka duh a. Kerela leh Karnataka ah khuan western union kal tlang khuan thla tin a crore za tel an hmu a ni. Mizoram ah hian tunah hian crore khat pawh kan hmu mang lo a ni Post Office kal tlang hi chuan nuai 45 vel kan hmu a. Chuvang chuan, kan thalai ten ram dang a hna an thawh theih na tur atan hian eng chen nge hmalak na kalpui anih tih kha ka zawt duh bawh a. Tin, Lord Krishna Academy tih kha eng tin nge kal pui anih tawh a, hmalakna a awm em ? A hlawhtlinna sawi tur a awm em tih kha ka zawt duh bawh ani e. Pu Speaker, ka lawm e.

S P E A K E R : Chhang turin Minister ilo sawm ang.

Pu LALRINLIANA SAILO, MINISTER : Pu Speaker, member ten thahnem ngai takin an zawt a, a lawmawm in ka hria a. An sawi nual ang khan Youth Commission hi ni 28. 4. 2008- ah Gazette ah chhuakin 2008 kum tawp lam October thlaah din a lo ni a, thui tak an kal hman lova, inthlan dawn te anih avangin. Tichuan, sorkarna a lo inthlak khan Sports Department ah a awm a, tichuan kan Sports Minister Pu Zodintluanga'n chak takin an hruai a, amaherawhchu nichina an sawi ang khan a tihtur leh Youth Commission in a din tur hi Sport atang ringawt chuan a scope a zim deuh lo maw tih higher authority in ngaihda a nei a, ani hun khan tuna Lord Krishna coaching te pawh kha an han ti hman a, ka chhanna a ka'n sawi duh chu zawhna pahnihna kha kan member zahawm tak pahnihte zawhna kha cheng nuai sawmthum vel seng in an lo kalpui a, a han hlawhtling chho kha chu central service tak chu an awm lo anih pawhin tangkai chu an tangkai pui hle ani tih ka sawi duh a. MCS te he lai Mizoram service-ah an lut nual a, tin clerical line ah te an lut nual tih chu kan hriat dan ani a, hlawk chu hlawk tak ani. Sorkar hmasa din ani a, sorkar tharin a execute a ni a. Tichuan Sports & Youth Department atang khan Labour Employment ah a lut ta a, Labour & Employment ah khan tuna Member zahawm tak

te sawi ang khan scope a tam em em ani. Hei skill development and initiative an ti a. India ram economy han siam that tak tak dawn chuan skill worker an ngai a, skill worker nei tur chuan thalai te skill develop a ngai a ni an ti a, chumi atan chuan crore and corer an dah tak meuh meuh a, Prime Minister chairman-na hnuai ah kan han kal a, Labour & Employment hnuai ah an dah a, kan han kal bak bak a, MCS kha Youth Commission Secretary kha ani a, mahse MCS te indaih lohna avangin tunah dah sawn ani a. Tichuan Secretary mumal nei lovin kan awm a. Kan DP & AR Minister zahawm takte pawh kan be thin a, an indaih loh thu a sawi thin a. Tin, tunah hian Labour & Employment-a Officer pakhat LLB a ni a, MA double a ni a, chu chu kan han vuah leh a ni a. Chutiang chuan kan kal nawk nawk a, Labour & Employment nen Stream line a kal tur a ni a. Chu chu tuna kan kal dan a ni.

Tin, chumi tur chuan Stream line a thawk ho turin Commissioner turin Labour & Employment Department, Central ami mi experience tak mai kum 28 lai hetiang sulhnu lo nei tawh kha kan chah chhuak a. Darsiamliana a ni a, kan member zahawm tak Pu Tlinga te sawi ang khan Secretary hi kum 2½ chhung hian 7 emaw 8 vel kan nei tawh a ni. Tih tak tak pawh a harsa a; amaherawhchu, helai thu hi chu DP & AR lampang tih tur ah kan ngai tih ka sawi duh a. Tin, Lord Krishna kha tunah chiah hi chuan kalpui kan tum rih lo ani tih ka sawi duh a. A hlawk na leh hlawk loh na te pawh kan han khaikhin ve rual rual in sum leh pai kha rinai in alo involve tam riau mai a. Tun dinhmun ah hi chuan ti lo phawt mai teh ang u kan ti a ni.

A leh lamah chuan Pu Speaker, member zahawm tak Pu Thangtea zawhna kha Labour & Employment Secretary hi Central ah khu chuan Cabinet Secretary ah hian an chho tlangpui a, a nih loh leh Planning ah te. Hmun pawimawh a ni a, Mizoram ah hian hmun pawimawh a chang lo a; amaherawhchu, kan pu ten chumi hria chuan hetiang hian an han rem chho tan a ni a. Kan sawi tawh ang khan officer pawh hei 4 lai mai Cabinet in min phalsak angin kan la a ni a. Tin, amah hi Corporate body a nei a, Labour & Employment kha a parent body kan nih angin a next expenditure tur kha kan va pe a ni mai a, nuaih 50 kumin ah khan kan pe leh a. Chutiang chuan an in enkawl chho dawn a ni tih kha ka sawi duh a ni.

Tin, Kerela te leh South India ah te hian an advance em em mai a. Kan hre tawh thin a, mithiam te MBBS an ni emaw MBA an ni emaw, Engineer an ni emaw an brain grain a hi, foreign ah te an kal a, an va thawh rah hi 11.5 % hi kum 10 hma lam khan an la lut tawh a ni. Chuvang chuan Education ah an advance a, tin, a state alo advance hrim hrim mai a. Chung ho chu um phak rual chu an ni lova, mahse a tam thei ang ber foreign-a in thawn chhuah tum in hma kan la mek a ni tih ka sawi duh a. Mahse eng chen nge hma lak tih kha a zau riau mai a, tuna kan sawi ang khan kan thalai te India ram mai ni lova, India ram pawn thlenga in thawn chhuak thei tur in chu chu kan tum a ni. Tin, skill development initiative hi, hemi modular employment scheme hi tih chhoh kan tum nasa a, tunah pawh hian 27 core hi central in grant an rawn siam a, chu chu kan kal pui chho dawn tan a. Tin, tun mai ah pawh hian in 6 core vocational employment provider te hnena thalai te training leh hetia motivate chhohna tur in kan hmu a, tih kan tum mek a, chu chu ka han chhanna chu a ni, a zau riau mai a, Pu Speaker, ka lawm e.

S P E A K E R : Thla hmasa khan Kerala-ah ka zuk kal ve a, an lo mangan ruk na chu nichina kan ngaihthlak ang khan an mi leh sa te, labour forces

ho kha hmun dangah, a hlawk zawkah an kal ta vek si a, Bihari leh Tamil ho an lut ta hum hum mai a, chim ral an hlau ve khawp mai. Tun ah zawhna Starred Question No.7-na zawt turin Pu T.T.Zothansanga i lo sawm ang.

Pu T.T.ZOTHANSANGA : Pu Speaker, Hon'ble Minister for Art & Culture Department ka zawhna chu hei hi a ni. High School leh Higher Secondary School te tan hian Heritage and Cultural Tour/Excursion neih theih a ni em ?

S P E A K E R : A chhang tur in Pu P.C.Zoram Sangliana, a changtu Minister i lo sawm ang.

Pu P.C.ZORAM SANGLIANA, MINISTER : Pu Speaker, Mizoram High School leh Higher Secondary School te tan hian Excursion or Heritage Tour hi a awm hriat ngai a ni lo. Tun sorkar lo din hnuah hian High School leh Higher Secondary School ten an lo hre ta a ni.

SPEAKER : Zawhbelhna, a zawttu Pu T.T.Zothansanga ani ang a, chumi hnuah Pu Lalthansanga.

Pu T.T.ZOTHANSANGA : Pu Speaker, ka lawm e, ka hriat zawng zawng rawn sawi ka tum lo a nia. Zawhbelhna :

- 1) Batch eng zat nge tirh an nih tawh ? School engzatnge ?
- (2) School tirh tawh te leh an tirh zat ?
- (3) Mizoram sorkarah sum engzatnge senral a nih?
- (4) Kuminah tih chhonzawm tumna a awm em?

Tin, a awm a nih chuan school an thlang fel tawh em tih ka zawt duh a. An la thlang fel lo a nih chuan Champhai G.M Higher Secondary School mi 700 vel zet awm tawhna khi min lo thlang tel ve thei tawh hram em tih ka'n zawt a ni.

Pu LALTHANSANGA : Pu Speaker, ka lawm e. Ni e, kha school engzatnge thlan tur tih chungchangah khan mahni bial lam hi rilru ah hian a awm hle mai a. Vocational Employment tih lampang te hi a siam theih ang em? Tunhma kha chuan Higher ho te leh High School ah te hian 1980, 81 chho te pawh khan an lo siam thin a. Chutiang ah chuan Industry te pawh hian ruahmanna te siamin survey te Mizoramah an lo neih tir thin a. Chutiang chu an hlawkpui thu te pawh magazine ah kan lo chhiar a. Chutiang deuh hlek chuan hmun pawimawh bik, cultural tour tih ang chi bakah heritage ang chi hi Mizoramah hian hmun pawimawh tak tak hi a awm a. Hetiang lamah hian duh ai hian kan thangthar te hian an hre thui lo hle mai a. A kal chhun hian nuam an ti ang reng hle mai a. Uar deuh deuh theih hi a van duhawm em! Tehkhin nan Khawnglungah te khian puk pui lian em em mai a lo awm a. Kei pawh ka'n kal meuh chuan, a chanchin te an sawi a, a ropui a, fate hruai nan kan it deuh zel mai a ni. Tin, Hriangtlangah te pawh Sakuh Puk te a awm a; Kuhsi Puk te an ti a.

Chutiang chi te chu Mizoram hmun hrang hrangah hian a tam em em a. Hetiang hi han uar deuh a va tha em tih ka'n rawn belh duh a ni e.

Pu P.C. ZORAM SANGLIANA, MINISTER : Pu Speaker, zawhna hmasa zawhna neitu in a rawn zawhna, Batch engzahnge tirh an nih tawh tih te kha hetiang hi an dinhmun a ni e. Indian Museum, Kolkata thuneitute hnena kan ngenna angin hetiang Mizoram kan lo la hriat ngai reng reng loh kha tih dan a lo awm reng mai a. Chumi avang chuan mi tirh sak turin kan ngen a. Nikum lam khan batch li kan kaltir a, an vaiin zirlai an ni a. Heta tan hian High School leh Higher Secondary School hrang hrang 37 atangin kan thlang chhuak a ni, school pakhat atanga thlan hlawk hlawk ni lo khan school hrang hrang 37 atangin kan thlang a. Kolkata hmun pawimawh chi hrang hrang te an lo fanpui a. Kolkata ah hian a buaithlak ber chu accommodation a ni a. Pu Speaker, hemi ka'n sawi tel talh duhna chhan chu, kan Liaison Officer ten Mizoram House, Ballygunj ah, zirlai heritage tour emaw, excursion-a kan zuk tirh te accommodation te an lo buatsaih sak a, chu chu kan lawm hle a. Chumi chu vawiin ah House ah pawh hian ka'n sawi tel duh kher a. A zawhna hi hnuhnung lam deuh pawh nise han sawi nghal mai ila. Kuminah hian High School leh Secondary School naupang 35 thlan leh mek an ni a. Pu T.T. Zothansanga rawn ngenna kha kan hotuten an lo hriat sak a nih ka ring a G.M.H.S.S. chawnghei pawh kha a tel e.

Tin, hemi Cultural & Heritage tour senso hi Mizoram sorkarin naia khat mah sen a awm lova. Hetia i ho a "remti" min han tih pui chhung ami ni lo hian, Indian Museum Kolkata in Aizawl atanga kalna leh hawna leh ei man te a tum sak vek an ni. Mamit Higher Secondary School, Kawrthah Higher Secondary, School Darlawn Higher Secondary School, Ngopa Higher Secondary School, Ngopa Govt. High School, (Ngopa hi High School leh Higher Secondary an nei a, an vannei khawp mai.) A batch 4-na ah hian ni 23.10.2010 khan Govt. Higher Secondary School Tlabung, North Vanlaiphai, Khawbung, Vairengte, Kolasib Diakkawn, Kawnpui, Ch.Chhunga, Zemabawk, Thingsai High School atang te in tirh an ni bawk a. Kan sawi ang khan July thla ah hian Gandhi Memorial Higher Secondary School Champhai tel khan Khawzawl Govt. Higher Secondary School leh Thingsulthiah Govt. Higher Secondary School leh Samlukhai Govt. Higher Secondary School leh Vaivakawn Adhoc leh Durtlang High School leh Kolasib High School atang te in zirlai 35 te zirtirtu te nen tirh leh tur ani.

Pu Lalthansanga'n a rawn sawi Mizoram chhunga heritage tour han tih mai, Mizoram chhung a pawimawhna pawh tunah chuan hriat a lo ni ta zel a, mi rawn tlawh tu te tan leh locala zin mite tan hrim hrim leh zirlai te tan pawh tangkai a kan hman theih nan Department te pawh in theih patawpa hma la in Ministry lam atanga thunneitu te leh India hmarchhak min bialtu thuneitu te pawh chah luh an ni a, chumi bakah Rohmingthanga pawl kan tih mai INTACH te hi an tha em em mai a. Kum upa tawh te an ni tawh chungin, Central lam atanga lo kal officer te an lo tawiawm thin a, chung atang pawh chuan project engemaw zat tunah hian ruahman kan nei mek a ni. Khawnglung te pawh Department anga hma kan lo lak mek a ni e.

SPEAKER : Tunah zawhna No. 8-na, Pu Lalrobiaka'n zawt sela.

Pu LALROBIAKA : Pu Speaker, ka lawm e, ka zawhna Starred Question No. 8-na Art and Culture Minister chhan atan - Library & Information Science-ah kumtin mithiam an pung zel a, Mizoram University kan neih chinah phei chuan a ni leh zual a. Chung mite luhna atan Mizorama Public Library te hi tih len leh siamthat tumna sorkar-in a nei em ?

Pu P.C. ZORAM SANGLIANA, MINISTER : Pu Speaker, Pu Robiaka zawhna chhanna chu – Library & Information Science-a mithiam lo pung mek zel te hi Department leh sorkar pawn a hria a. Chumi lo luhna atan chuan Mizoram Public Library te tihlen leh siamthat chu Department-in a tum leh duhdan chu a ni a. Fund kan dawn dan a zir zela hmalak tum a ni e.

S P E A K E R : Zawh belhna Pu Lalrobiaka, a hnuah Pu Duhoma.

Pu LALROBIAKA : Pu Speaker, ka lawm e. State Library te, Sub-Divisional Library te kan nei thin a. Tin, kan Minister zahawm tak hmalakna avang hian nichina kan sawi tak ang khan hmalakna tam tak library chungchangah pawh hian a awm a. Kan hriat theuh angin Y.M.A. ten library khawtin deuh thawah kan nei a, hei hian nasa takin kan khawtlang nun a tichangkang a, hriatnaah min ti hausa a ni. Chumi a nih avang chuan, kan State Library bik hi a hmun thu hla te hmanni lawkah khan hawn a ni a. Hei hi tun dinhmunah hi chuan a hmunah hian kal a harsa viauin ka hria a. Kei tak phei chu a hawn ni bak kha ka la kal lo a ni a. Mipui hian kan chhawr tangkai tur angin kan chhawr tangkai lo zawk em aw tih ngaih dan ka nei a. A building tha tak kan nei a, a lawmawm rualin hmun ualau zawkah mipui kal zung zung theih na, naupang leh upa zawk te tan pawh kal awlsamah hian dah theih dan a awm em tih hi ka'n zawt duh a.

Tin, tuna hmalak mekah hian Sub-Division-te hian changtlung zawka kan dah theihna tur atan Central sorkarah he State Budget ni mai lovin, pawh chhuah mai tur hual te a lo nei tawh em ? tih ka ka'n zawt bawk a ni e.

Pu LALDUHOMA : Pu Speaker, kan Minister zahawm tak hian library sakna tur sum Central lamah a zuk dil chhuak tih te kan lo hria a, lawmawm kan ti a. Library sakna tur cheng nuai ruk man den den awm kha keini bial atangin Sairang, Sihmui leh Sairang Dinthar YMA te khan an dil a, ram an nei tha hle a. Pek an ni ngei dawn em tih ka'n zawt duh a. Pek lo ni ta sela library kha contractor ten an sa mai dawn em ni? Contractor ten an sak kha kan YMA ten an hlau hle a ni. YMA te ngei khan library sak kha hnattlang neih an duh a. Changtlung tak, tha taka tih an duh a. Contractor kuta a luh chuan chhe fe maiin a chhuak leh ang tih an hlauthawng sa deuh a, anmahni a neitu turte kutah ngei khan a sak hna hi pek a ni thei ang em tih ka'n zawt duh bawk a. A tawpna atan chuan Pu Speaker, a relevant em ka hre chiah lova, hei, kan library Assembly ami hi, Parliament-ah te khu chuan MP ten thil hriat an duh apiang kha an duh kha an va ziak tawp a, library-ah an va kal a, a relevant document zawng zawng nen, a comment nen mithiam te khan anrawn pe zung

zung mai a. Tichuan, an rawn thuan tha em em a ni. Member te hian chutianga han tih ve te chu lo duh ta ila tuna kan Staff te hi chuan min ti thei rih lo te pawh a ni mai thei a. Hengte pawh hi Member te, Minister te, tute pawh tha zawka information kan dawn theihna turin keimahni library ngeite pawh hi thawktu tha leh lehkhahu tha te nen tun aia changtlung zawka han tih te hi a theih ve lawm maw nile a room lah kan nei tha ropui tawh si a.

SPEAKER : Le, chhang turin Pu P.C. Zoram Sangliana ilo ko ang.

Pu P.C. ZORAM SANGLIANA, MINISTER : Pu Speaker, thahnemngaihna au aw leh kan Department duhsakna kan ngaitthla thin hi lawmawm kan ti tak meuh meuh a ni.

State Library chu hmanni lawk ah kan Chief Minister zahawmtakin min han hawnsak a, a hmun saw tuna Aizawl khawpui anga han tih ah chuan tlemin a penhle em aw tih te ngaituahna-ah a awm deuh a. Mahse, tuna kan member zahawmtak a zawhna neitu in a rawn sawi ang khan, hmun ualau-a a awm theihna, panna awlsam, khawvel hmun hrang hrangah State ani emaw, National Library te reng reng hi a pan tute-zirlai naupang te te anni emaw, tar chaklo te, pensioner tawhte emaw pawh in an pan zung zung theihna tur hmunah hian an dah dan tlangpui chu a ni a. Mahse kan khawpui thang chho zelah hian tuna kan neihna ngei pawh saw a laili thawkhath viauah kan ngai a. Mahse hmun laili-ah dah dan a awm em tihlai-ah kha chuan, Department ang pawhin kan duhtusam ve tho a ni tih kha ka'n sawi duh a ni.

Tin, tuna State Library Building saw a te a, a bulah sawn ram zau tha tak kan la nei a, chumi ram zau takah chuan extension tihna tur atan pawh a rang thei ang berin Central Sorkar-ah, Culture Ministry-ah dil leh nise kan ti a. Hmanni lawk ah Kolkata ah ka kal a, RRMRLF thuneitu te nen kan inkawmna-ah pawh ka sawi a, annin "chumi extension tur chu DPR rawn siam ula, chumiah chuan a concept paper te rawn ti ula, keimahni atang pawhin kan pe thei mai thei che u a sin" an ti a, chuti khawp chuan an inhawng a ni, Tin, District Capital tinah hian District Library hi neih kan tum a, tunah kan la neih lohna Serchhip ah leh Mamit-ah hian building sak tan kan tum a. Pu Speaker, leh lamah chuan intihmualpho duhna emaw kan sawichhiat tumna lamah min lo ngaih sak lo hram turin ka ngen hmasa duh a. 2009 khan Saiha District Library sakna tur hi transaction business kalphung pangngai angin Saiha District Library sakna tur PWD-ah kan transfer tawh a, vawiin thleng hian tender pawh an la chhuah lova, kan mang chu a ang ang reng khawp mai a. Heng ang chi te hi chu tih thuai thuai ni thei sela, tunah pawh District dang Serchhip ami leh Mamit ami te pawh hi an mangang, chutianga zel chuan kan department atanga kan tih mai theih loh ang chi kha tih dan kawng zawn a pawimawh a, House-ah hian ka'n sawi ri deuh talh duh a ni. Minister sawi atan a inhme em chu ka hre chiah lo na a, mahse sawi a tul in ka hria a ka'n sawi ri a ni a. Heng tih changtlun na atan hian Central lam khu an inhawng em em mai a. Kan chuh ve hram hram thin bawka, chuvang chuan kuminah pawh hian engmaw zat a rawn langchhuak dawn a ni tih hi kan sawi tel duh a ni e.

Tin, member zahawm tak Pu Lalduhoma'n a rawn sawi Sairang leh Sihhmui sakna tur kha spot verification te neih fel vek a, chutah LSC an neih zawng zawng an rawn thehluh rual khan department atanga han enfiah ve phawt te a ngai a, thil tihdan kalphung a ni a. Chung chu an han tifel anga, tahchuan kan pek tur zingah khan a tel ngei ngei ang tih ka tiam duh a ni. Kan hmasawwna he sorkar bikah hian han ti bik ila Pu Speaker, a hlui a miten an ti lo tihna ni lovin, he sorkar bikah hian hmasawwna a nasa em em mai a. Hemi matching share kan hmuh chhoh danah hrim hrim pawh hian state sorkar atanga kan pawisa hmuh dan hrim hrim pawh a lo tam tham ta a. Kum dangah chuan zep tur a awm lo, YMA te leh NGO hrang hrangte punin kan department officer ten thahnem an ngai ve thin si a, Finance Minister-ah ani emaw, Planning Board ah a ni emaw, theih ang ang thuneitute hnenah library tih changtlun nan nuai nga te, nuai hnihte min pek belh thei em ti hian an bei thin a. Kuminah erawh chuan chutiang mai pawh nilovin 2010-2011 latan ringawt pawh khan state atang pawhin matching fund nuai 26 kan thawh loh theih loh kha Central lam atangin min rawn pe a. Chutiangte chuan kan han hmu ta a, 2010-2011-ah chutiang chuan kan hmu a, khatih lai khan nuai 135 min rawn pe a, nuai 161 te min rawn pe a, chutiang chuan tih a ni. Chuvang chuan Pu Speaker, a zawhna dang hnunglamah khan a la awm leh tho bawk a. Vawiih hian zawhna thenkhat kha chu chung hunah chuan kan la chhang hman thoin ka ring a. Kimchangin ka'n rawn chhang hrih lo mai anga, a tha zawk em? A thawhna tur hi kan duhthusam chiah a ni. Amaherawhchu, kan House zahawm tak kaltlang hian kan YMA te pawh hi han ngen ka duh a. Vairam (Central) atanga kan thil hmuh reng reng, keimahni Department chang lovah pawh, Department reng rengah Utilisation Certificate emaw, hnathawh dan kalphunga hi duh dan an rawn nei thlap a, chumi duh dan chu zawm a ngai thin a ni. Chumi zawm a nih loh avang chuan nikum hmasa tawha kan pawisa sawi chhuahsaa kan ngaih tawh te pawh vawiih hian hman lohvin a la awm phah a ni. Khaw thenkhat YMA te kan han pe a, YMA lo ah hian kan pe ngai meuh lo a nia. Chu chu ka han assure ngamna pawh a ni a. Village Library reng reng hi keini chuan contractor hnena pek hi kan ti lem lo. Khatia kan han tih rual khan YMA hruaitute pawh hian mi tui tak tak buaipuitu tur, paper engkim ziah fel ngai te kha rawn ruatin rawn thlang thin se la. Kan officer-ten a guide-na tur zawng zawngah an guide peih a. Tun tumah pheih chuan a branch pakhat hming han sawi ri ta ila, nikum hmasaa kan pekte zingah, Mission Vengthlang Branch-in tha tak in an rawn ti a. A dang kan thlanchhuah reng reng pawh hemi te tihdan zulzui hi lo kawhhmuh mai teh u kan ti ringawt a. Chutiang chuan kan inkawhhmuh tan tawh a, harsatna a awm kan ring lova. Hetiang zel hian branch ti mai ila, Village Library kan pek emaw, Sub-Division Library kan pek emaw ah pawh a thawktu tur te hi uluk takin branch atangin rawn thlang tur pawhin kan inngen duh bawk a ni.

Tin, Assembly Library tihchangtlun tih kha keini Department pawhin kan duhsakna a ni e tih hi ka'n sawi duh a. Chuta tan chuan kan vaiin kan pawimawhin ka ring a. Budget Session ah te hian tihchangtlunna sawi rik hi a ni lo lutuk thin a, sawi rikna remchang a rawn hawng kha keini Department pawhin kan lo duhsakna a ni tih ka'n sawi duh a ni e.

S P E A K E R : A lawmawm e. Kan library khu ni e, lehkhabu lam chu kan nei tha viau a. Amaherawhchu, kan member-te hian duh ang hian in zen lo khawp a. Tin, chutiangin internet atang pawhin tam tak khu kan khung a ni. Kan Assembly mamawh hi internet-ah kan dah teuh a ni. Chu chu internet atang pawh hian khawih

chhuah theih hian kan dah ve zel tawh a ni a. Amaherawhchu, Session lai in va lam a, chu churawn ti zung zung tur erawh chuan kan la tlin rih lo mai thei a. Mahse, nasa takin hma kan sawn a. Keini library lam atanga kan duh ve zawk erawh chu kan member-ten dan hriat tak tak hi in tum tawh lo emaw ni aw? Kan library hi dan bu hlirin a khat a, in zen khat mang e aw kan ti ve thung a ni. Tin, District Library te a awm a, State Library kha a panna a hla deuh a nih pawhin District Library tal chu lailiah hian awm thei se a tha khawp mai. State Library em em hi chu kan pan tam vak lo zawk a nia, state dangah pawh, district hi a nia kan pan tam deuh ber ni.

Tunah hian zawhna dang a awm a. A chhanna te nen pawh khan a inzul deuh thuak, chhan tul anih leh a chhang zel ang a, zawhna a rawn lut zel si a. Tunah Pu T.T.Zothansanga zawhna zawt turin ilo ko leh ang.

Pu T.T.ZOTHANSANGA : Pu Speaker, ka lawm e. Starred Question No.9, ka zawhna tur hi tunah khan a rawn chhang deuh thuak thuak tawh a. Kan chhiarchhuak tho ang a, zawhbelhna ka zawh chhunzawm mai ang.

(a) Mizoram Library te Sorkar leh NGOs enkawl, hmasawn nan leh tih changtlun nan sorkarin eng angin nge hma a lak ?

(b) Mizoram Public Library te hi tihlen leh siamthat tumna sorkarin a nei em tih a ni a. Ka hmaa zawhna atang khan a rawn chhang deuh nual a, a duh chuan a rawn chhan belh tho turah ka ngai a. Kan zawhbelh nghal mai ang a

(1) Library tihchangtlunna hi khawi atangin nge a fund in hmuh thin tih ka zawt a.

(2) Kum 2009-2010 leh 2010-2011 khan pawisa engzat nge hmuh anih a, engzatnge hmanchhuah tawh anih tih ka zawt e.

S P E A K E R : Zawhbelhna Pu K. Liantlinga leh Pu Lalthansanga. Tunah Pu K. Liantlinga ilo ko hmasa ang.

Pu K.LIANTLINGA : Pu Speaker, ka lawm e. Kha kan Minister zahawm tak hmalakna kha a ropui a, a tha in a lawmawm hlein ka hria. Kan library tihchangtlun na nasa tak a awm niin a hriat a. Art & Culture hi Education Department hnuai a awm thin kha a ni a. Tunah Directorate hrana an han awm hian a kal danah hian District, State leh Village Library te leh NGO te enkawl zawngin a kal nasa hlein a hriat a, hmasawna pawh a awm a. Khang kha a tlangpuiin puitling tawh chin tan te pawh niin a lang a. Amaherawh chu a basic tak tak, naupangte tihhmasawna lai tur tak takah hian, hei tunah Education Reform Commission-in Mizoram zirna tidanglam turin CCE te a rawn recommend a. Khang kha state ah hian introduce turin ruahmanna a kal a, Education Department nen hian in tie-up sela. Institution-ah Elementary atang hian library tha siam ila. Tahchuan kan naupang zirlai kum 5 atanga kum 10/12 inkar bawr atang te hian zir tan ni sela a tha awm mang e ka ti a. Chuvangchuan, heng atan hian kan Education Minister leh kan Art & Culture Minister-te khan ruahmanna fel tak neiin Village level-a dah ngawt ai khan, Institution-ah khan an dah thei angem ? Tin, hmun leh hma te zawn chawp ai chuan YMA, MHIP, MUP emaw institution awmsa ah khan room tha tak te siamin renovate sela. Khangah-te khan, fund-te kha hmangin, kan thalaite mai pawh nilovin kan

naupangte hian a bul atangin han tan chho tak takin, CCF nen hian kal kawpin, Computer leh Internet-te thleng pawh hian dah tum ta zawk sela. Hetia tuna hmalak ropui tak kan han ngaihthlak rual rual hian a basic atanga tan hi a theih em, a tha zawk em, a tih theih angem tih hi ka zawt duh a.

Tin, Education Department-te nen pawh hian thawkhovin khangah khan hmalakna a awm thei ang em tih ka zawhbelhna a ni e. Ka lawm e.

SPEAKER : Pu Lalthansanga

Pu LALTHANSANGA : Pu Speaker, ka lawm e. Question pawh a tam vak lo baw a, zawhbelh pawh a inthlahrun awmin ka hre lova. Tuna kan State Library khu School engzatin nge tlawh tawh tih ka zawt duh a. School tlawhtu te hi kan nei ngai em, Museum tlawhtu hi chu kan nei thin a. Mahse kan library lampang hi kan tlawh khat hlein ka hria a. Tin, Consultative Committee-ah khan sawtilai Transport Office sak that tur ah sawn floor khat emaw te chu a awm thei lawm ni tih te kha kan han sawi lang deuh ruau ruau a. A chhan chu khi khi a laili a, mitin kalkhawmna leh mi chitin awmkhawmna anih avangin hetilaiah hian awm ta se, nakin zelah chuan khutilam te pawh khu a lo khawpui laili ang a, a la tha awm mang e tih ngaituahna kan neih kha engeni a rilru tih kha kan zawt duh a.

Tin, chu bakah chuan Zarkawt veng, kan vengah sawn recreation centre kan nei a. Kan building neih bakah sawn space tlem ala awm deuh hlek a, sawtilai hmunah sawn library hi nei ve ila tih hmanah kan YMA ten min rawn angin dilna kan pe tawh a. Kha kha eng angin nge hma kan lak tih ka han zawt tel duh baw a.

Tin, tunah ka bial N. Vanlaiphai ah khian library sak thatna tur min pek avangin lawmthu ka'n hrilh baw a ni. Ka lawm e.

SPEAKER : Pu R. Lalpianmawia, han zawt leh phawt rawh se, ani hi a ding khat a.

Pu R.L. PIANMAWIA : Pu Speaker, ka zawhbelhna chu tunah khan a chhang zung zung nghal mai a. 'A hnaih lai hian zawng rawh' tih te pawh kha hman a thain ka'n hre deuh baw a. Ka bialah Zohmun YMA te, Tinghmun te, Ratu te, Darlawn Venghmun ten an dil ve mek a, kha kha tuna pek turah khan an tel ve thei dawn em? Khulai bial tan khan a chhang nghal mai si a. Chu chu ka zawhna pakhatna a ni a.

Tin, a pahnihna ah building kha sak lo ni ta sela, lehkhabu dahna tur leh thil tul dang tam tak a awm a, chung chu an pe nghal thei dawn em tih leh a dilna ah hian heng hmu tur hian eng ang nge phut a nih tih kha ka zawhna a ni e.

S P E A K E R : Chhang turin Pu P.C. Zoram Sangliana, Minister i lo sawm ang.

Pu P.C. ZORAM SANGLIANA, MINISTER : Pu Speaker, a zawhna bul ber kha han chhang tel nghal baw k ila, hetah hian chhan ngai a awm deuh hlek a. Mizoram sorkar leh NGOs enkawl hmasawn nan leh tihchangtlun nan sorkarin enge hma a lak tih chhanna hi chu - building te sak sak lehkhabu leh a dahna tur te, furniture te theih ang angin kan pe thin a ni tih kha (a)-na chhanna ni sela.

(b)-na chhanna ah chuan hemi Mizoram Public Library Service tihlen leh siamthat hi Mizoram Public Library Act, 1933 chhungah theih ang anga hmalak chhunzawm zel a ni tih ni sela.

Zawhbelhna ah khan lut ta ila - Library tihchangtlun na turin khawi atangin nge sum in hmuh tih kha – Raja Ram Mohan Roy Library Foundation (RRMRLF) Kolkatta atang khuan a ni a. Chuta tang chuan engzah nge pawisa hmuh tawh a nih tih kha zawhbelhna pahnihna a ni a. Chutah chuan kum 2009-2010 atan cheng nuai za leh sawmriat kan hmu a, chutih rual chuan kan state sorkar hian cheng nuai sawmhni a thawh ve a ni. 2010-2011 chhungin cheng nuai zahnih sawmruk hmuh a ni leh a, hetah hian cheng nuai sawmkua pakua hmuh tawh a ni a, za sawmruk leh pakhat hi la hmuh tura beisei a ni a, chu chu nichina kan sawi tak an va thlan tawhte leh an va tih tawh tena an rawn bawhzui that lohva document paper an duh anga an tihfel loh avang khan a rawn kal tlai deuh hlek thin a ni.

Tin, tunah hian kan information atan pawh a pawimawh in ka hria Pu Speaker. Art & Culture Department hnuaiah hian Recognized Library hi 452 kan nei a, tuna Pu Piana zawhna hnuhnung ber dawttu pawh kha a chhang tel nghalin ka ring a, chung library tihchangtlun nan chuan 2010-2011 ah pawh hian cheng nuai 25 man ngawt lehkhabu kan lei tawh a. Tin, Art & Culture Deptt. hnuaiah hian Mizoram Publication Board an awm a, chu chuan Mizo ziakmi te leh hetiang ina an tih lehkhabu tha library-a zirtirna tha nei te miten an lo chhiar tur ang chi kha a theih anga tam hi a laksak thin a, chungah te chuan hengte hi kan pek thin an ni. Tin, Pu K.Liantlinga, Aizawl South bialtu zahawm takin a rawn sawi kha, hemi a lehkhabu han tih lai bawrah hian matching share hi kan la neilo tlat maia, tuna kan neih ang china hi chu, Central atanga a infrastructure atan a ni a, chulai bawra chu engpawh ni sela, kan la hai chhuah loh vang pawh a ni thei tho a, chung ang te pawh chu a zawhna kha department pawh min ti fingtu leh thurawn min petu ah pawh hmang ta ila a that ka ringa. Kan lo bih chiang ang a, a tul a nih phawt chuan department dangte nena co-operation han neih ho a tih pawh kha kan duh dan a ni e, chu chu ka'n sawi tel duh a.

Tin, Pu Lalthansanga zawhna, State Library hi school engzat chiahin nge tlawh tawh tih kha, information ka lo inrinloh lampang daih a ni a, mahse kha kha a pawimawh khawpin ka hria a, tuna kan session chung ngeiin school engzatin nge tlawh tawh tih kha hriat kan tum ang a, rawn pek kan tum dawn nia. Member dangte pawhin an duh chuan member daihin kan rawn siam dawn nia, chu chu ni mai sela. Tin, Consultative department ah thahnemgai takin kan MLA zahawm takten kan

department min sawipuiin min thlirpui thin a, State Library kan han hawn hma deuh mai pawh khan kan thlir ho thin a, chuta consultative member ten a committee in a kan han ngaituah, nghet tak awma chu, hmun laili ah panna hnai zawk eg ah Planning Board in an luah lai mek, Tennis Court kawmchhakah te hian awm thei ila, anni hi thu phei zawk se tih thleng te khan kan sawi a; mahse library kan sak dan saw office-a luah chi loh khan a awm ve leh tlat mai a, library tura sak a nih avangin, chunglai bawr te chu thuneitu lian zawk te leh technical lama mithiamten la en sela a tha ngawtin ka ring a, Hei hi kan duhtusam, mipuite awlsamna tur zawk chu a ni e. Nichina a rawn sawi ang khan, a bial Vanlaiphai tana lawmthu a sawi ang khan Zarkawt tan pawh khan lawmthu a sawi zui vat kan ring, kan beisei a ni e, chu pawh chu ka'n sawi duh a ni.

Pu R.L Pianmawia zawhna, Zohmun leh a dang ah te pawh khan, nichina Aizawl West-I bialtu zahawmtakin a rawn sawi ang khan an LSC emaw, an inhmun an rawn thehluh ang chi, V/C pass emaw pawh ni ta se, khatiang te kha department in kan han enfiah ve phawt a, heta criteria ah khan an tling chho a anih chuan hemi PRMRLF atanga, rural library sakna turah hian kan thlang thin a, chutiang chuan kan ti ani. A building sakna tur atan hian nuai 6 kan pe a, tunah phei chuan min tihpun sak dawn a, kumthar atang phei chuan nuai 10 min tih sak dawn nghe nghe a. Chutiang a nih chuan hmun tinrengah, village tinah hian a theihna hmun hmunah library tha tak tak, building tha an khaw phu ang tawk zela kha chu, YMA te tha nen hian kan neih theih ngei kan ring bawk a ni. A criteria atana pawimawh chu a hmun tur hi pawisa a lei a ngai tur a nilo tih hi, a criteria pawimawh ber, free land a ni tur ani a, pass engkim a fel tur a ni, LSC a nih loh pawn V/C pass tal chutiang chuan a fel tur a ni e tih hi a ni e.

Pu K.LIANTLINGA : Pu Speaker, ka zawhna kha nichin a ka zawhna ah khan Education hnuaiah hian Institution hian hmun ram an nei sa vek a, building pawh an nei sa a, YMA ti kher lo khan naupang te tana hmasawanna tur kha a tih theih mai lawm ni tih kha ka rawn zawhna kha a ni a.

Pu P.C. ZORAM SANGLIANA, MINISTER : Pu Speaker, YMA library te kan han ti a, YMA in a enkawl hian a tlangpuiin tuna kan hmuh chin ah hi chuan a hlawhtling tlat mai a. Tawng mawilo ni suh selangin, tuna kan dinhmun ah hi chuan hlawh neia an enkawl ai chuan voluntary-a an enkawl hian a hlawhtlinna a sang zawk tlat mai a, amaherawhchu, rawtna tha tak a nih avangin keini pawn kan lo thlir zui dawn nia.

S P E A K E R : Zawhna No. 11 na hi lak mai ka duh a, mahse, No. 10 na hi a lo hmasa zawk si a. Tunah Pu T.T Zothansanga zawt turin i lo sawm leh ang, han zawt se a chhangtu in i chhang zung zung teh ang u. Zawhna No. 11 na hi lak hman i tum hram teh ang u.

Pu T.T ZOTHANSANGA : Kha kha Pu Robiaka nen kan zawhna a ni a, ani hian han zawt hmasa selangin keiin ka zawhbelh dawn ni awm tak a ni.

Pu LALROBIAKA : Pu Speaker, i phalna in Art & Culture Department changtu chhan atan-Tunlaia kan rama Cultural Revival thleng mek ah sorkarin engtingnge tan a lak tih hi ka zawt e.

S P E A K E R : A chhang turin a changtu Minister Pu Zoram Sangliana ilo ko ang.

Pu P.C. ZORAM SANGLIANA, MINISTER : Pu Speaker, Department te pawhin kan lo ngaihtuah ang deuh hlek in, kan ramah hian Cultural Revolution a thleng a, Revival te an rawn dah a, Revolution a thlengah kan lo ngaih ang deuh chiahin zawhna neitu te hian an rawn zawt a – heta tan hian Department chuan thalai nula leh tlangval naupang zawk te, hnam lam leh incheina silhfen te an hlut lehzual nan remchang ang angin hma lak zel a ni a.

Mizoram hmun hrang hrangah Cultural Meet a tam thei ang ber buatsaih mek niin buatsaih zel tum a ni a. Tin, Mizo kut chhuak silhfen pawh a tam thei ang ber thehdarh tur leh ti uar tur a ngen a ni.

S P E A K E R : Zawhbelhna zawt lo mai rawh u aw Zawhna No. 11 naah hian kal tawh mai ang u. Khati lam kha chu kan kal thui tawh in ka hria culture lam kha chu. Zawhna No. 11 na zawt turin Dr. R. Lalthangliana i lo ko ang. Hei hi a pawimawh riauvn ka hria.

Dr. R. LALTHANGLIANA : Pu Speaker, ka Starred Question N0. 11 na – Land Revenue & Settlement re-organized tura hmalakna hian engnge a thlen tawh tih ka zawt e.

SPEAKER : A chhang turin a changtu Minister Pu J.H Rothuama ilo ko ang.

Pu J.H. ROTHUAMA, MINISTER : Pu Speaker, Dr. R. Lalthangliana zawhna chhanna chu- Revenue re-organized na tur hian sorkarah post 104 dil a ni a, post 29 min phalsak a, heng post te hi fill up dil mek a ni hlawm a, fill up ala ni lo. He proposal hi Cabinet in a approve tawh a, GAD pawhin a principle in a approved baw. Tunah hian modified re-organized hi Additional Secretary & Programme Director, Finance Department FMU ah approval turin submit mek a ni.

SPEAKER : Zawhbelhna Dr. R. Lalthangliana.

Dr. R. LALTHANGLIANA : Pu Speaker, i ngai pawimawh bawh a, ka lawm khawp mai ka zawt hman a. Pakhatnaah chuan Revenue Department pawimawh zia kan hria a, ram pum huap, engkim khawih an ni ringawt mai a, ram related thil zawng zawng. Khati tak mai a post kan mamawh tam laia kan hmu tlem em em kha enge a chhan tih ka zawt duh a.

Tin, pahnihnaah chuan, Congress sorkar hmasa tun nilo ah pawh khan restructuring ti mai ila Cabinet khan an pawm tawhin ka hria a, MNF an han sorkar chhova, kan buaipui chhova, kum khat pawh tling lo keini pawh khan kan buaipui a, khalaiah khan engatinge hei hi kan muan em em mai, a pawimawh si a. Tunhmaa mithiam Kerela lama an Director phei kha chuan a tlem berah 500 technical staff in mamawh a tih thin kha a nia, tuna kan dinhmunah hian 150 chiah technical staff Pu Speaker kan nei. Synod rorelnah leh Kohhran rorelna lian deuhah te hian kan buaipui tham tawh a ni a, land record leh survey atan mihring kan mamawh. Tin, a bika Revenue a Technical staff kan neih hi 5 chiah an ni a, 1 suspend a ni a, a ngaihna a awm lo reng reng a, chuvang chuan, kawng lehlamah pawn lam atangin nasa takin he department hi sawisel leh rel an hlawh viau te pawh hi an harsatna lai tak tak hi hei hi a ni a. Chuvang chuan hei hi a rang thei ang ber a tihpuitlin theihna tur hian sorkar hian hmalak a tum tak tak em ? tih ka zawt duh a. Chumi rual chuan, Pu Speaker, zawhbelhna kan zawh duh chu hei District 8 kan awm a, decentralization a nih loh chuan tuna kan Directorate atanga engkim kan beisei dawn chuan a hautak lutuk mipui an mangang a ni, tunah hian LSC leh thil dang ti turin Aizawl an lo kal vek a ngai. Lunglei-ah tlem lai deuh in kan han pe zawk a, mahse kan hlihsak leh a. District dangah pawh hian kan Revenue Officer-te pawh hi a tih theih mai lawm ni. Tunah technical officer te kan indaih lo kan tih pawhin kan Head Surveyor te pawh hi upgrade chhoh dan a awm mai lawm ni tihte kan zawt nghal a ni. * Speech not corrected.

SPEAKER : Awle, Minister in han chhang sela.

Pu J.H. ROTHUAMA, MINISTER : Pu Speaker, thui deuh han chhanah pawh a tha viau va, mahse hun kan nei tlem a. Revenue department a post indaih lohna hi kan sorkar hian a ngai pawimawh em em a. Amaherawhchu, lehlamah sum leh pai indaih lohna avangin kan duh ang ngawta pek kha harsatna a awm a; chuvang chuan, post 29 siam min han phal sak kha a ni a. Hei hi kan tihpuitlin thuai kan ring a. Sorkar hian re-organized tur hian hma thui tak a lo la tawh a. Directorate atanga power inhlan chhawn dan tur te, state dangin an lo hman thin anga District ah DC te hmanga power decentralize tura hmalak ani a. Hemi thuah hian Civil SDO te hnenah phei chuan power kan pe tawh nghe nghe a, chungah chuan mahni area chhunga ram buai chinfel hna, tin in leh lo leh ramri buai ang chi te lo enfel hnate leh a tul chuan court thleng pawha la thei tur anga ruahman an ni a, chung chu an kut ah kan dah a. Tunah hian staff kan indaih loh avangin District-ah Sadar SDO te hi ASO-I emaw ASO-II emaw kan hmang deuh ber a. ASO post pawh kan han dah a; amaherawhchu re-organized tur hian a rawn khuh avangin helai hi ruahmanna zau zawka kalpui zel tura hmalak mek a ni a. Hei hi hun reilote

chhunga kan tih hlawhtlin theih mai kan beisei a. A pawimawh ber erawh chu staff hi indaih lo tak kan ni. SDO Civil hnenah power kan pek hmingin technical mi an mamawh a, a technical mi kha pe turin surveyor emaw tunah hian pek theih kan nei rih lova, churang chuan a nihna ang takin kan duh angin a la function thei lo a ni.

SPEAKER : Awle, kan zawhna leh chhanna hun kha minute 5 laiin kan lo pel a, mahse zawhna kal laklawh lai a ni a. Tunah chuan vawiin ni a thil pawimawh tak mai kan tihtur ah kan kal ang a. Vawiin ah hian member te kan awm kim leh thei a, a lawmawm khawp mai. Kan dan 27 (1) angin vawiin hian Private Business kha kan ngaihtuah ho tur alo ni ta a.

Private Resolution kan la ang a, Private Member Resolution kan dawn atangin ni 4.7.2011 dar 11:00 a.m khan Ballot ani a. Bulletin Part II No. 143 ni 4.7.2011 khan kanrawn hriattir tawh che u a, chuta a in dawt ang chuan kan la ang a. Kan lak hmasak ber tur chu Pu R. Selthuama resolution - Inland Water Transport hi kan State ah tangkai lehzuala kan hman theih nan kan sorkarin chak takin hma la rawh se tih a ni a. He resolution ang hi serial no 3,4, 9-ah te kan hmu a, kan la kawp ang a. Tunah Pu R.Selthuama a resolution move turin lo sawm ila.

Pu R SELTHUAMA : Pu Speaker ka lawm e. Ka resolution, “Inland Water Transport hi kan State-ah tangkai lehzuala kan hman theih nan kan sorkarin chak takin hma la rawh se,” tih ani a. Kan hriat theuh angin Mizoram ah hian transport chi hrang hrang a awm a, chungah chuan kan hman hmasak ber chu Inland Water Transport hi ani a. Lehkhabu-a kan hmuh ang chuan kum 1891-March thla ah khan, chu chu Ningani a ni nghe nghe a; Rev. William Williams te thianza ho chuan JHALNACHERRA atangin Tlawng lui ah hian Inland Water Transport hmingin lawngleng in an lo kal chhova; a kar leh March ni 11-ah Tlawng leh Tut infinna hmun an thleng a. Tin, March ni 15, Pathianni takah chuan Mualvum khua, chutih lai chuan, “Liankunga khua”, an ti a, in zanga lai an ni. Chu lai chu an thleng a; a khua tak chu Tlawnglui kam atang chuan mel nga vel ani a; mahse a khaw naupang sawm rual lai an hmu a, tichuan Tiau luikam ah chuan Pathian lehkhabu, milembu ziate leh nawalh te an sem a, hlate an zirtir a, Pathian thu te pawh an theih ang chuan an zirtir ve a ni.

Tichuan, ziaka kan hmuh danah chuan March ni 15,1891 hi Mizoramah Chanchin Tha hrilh hmasakna ber ni alo ni ta nghe nghe a. Chumi chu a lo awm theihna chhan pawh chu Inland Water Transport vang a ni. Tichuan March ni 19-ah chung ho chuan Sairang an lo thleng a, a tuk March ni 20-ah Aizawl khawpui an lo lut ta a, tichuan Mizorama Missionary te an lo luhna bulthum chu Inland Water Transport a lo ni ta a ni. Chumi atang chuan Mizoramah Chanchin Tha eng, Chanchin Tha meichher anrawn chhi chho ta a, chung avang chuan Mizoram hian hmasawna nasa tak, thlarau lamah leh khawvel thilah pawh malsawmna nasa tak a lo dawng ta a. Mizo te chu tunah phei chuan za a za Kristian tih ngam kan lo ni ta a, khaw tinah Biakin ropui tak tak, hmuhawm tak tak te a lo awm ta a. Chumai chu nilovin, a mihringah pawh Kohhran mi te kan lo nih avangin Kohhran Upa zahawm tak tak te kan lo thlang chhuak a. Vawiin ah ngei pawh hian Pu Speaker, helai House

zahawm takah pawh hian ka hre sual a nih loh chuan nangmah tiamin Kohhran Upa hi 10 lai an awm nghe nghe a. Presbyterian Kohhran te phei chu kan Kohhran Upa te hi damchhung atan thlan in ni a. Kan Kohhran atang chuan kan Minister zahawm tak tak Pu H.Liansailova leh Pu J.H Rothuama te an awm a. Tin, member lamah member zahawm tak Pu Lalduhoma te an awm bawk a. Tin, Salvation lam atangin Minister zahawm tak Pu Zoram Sangliana a awm a. Ka bula thu MLA zahawm tak, Pu Robiaka a awm bawk a. Tin, Kohhran dang Baptist atangin Pu K.Rinthanga te an awm a, Pu Ramhluna te, Dr Lalthangliana te, Pu P.P Thawla te an awm bawk a. Tichuan an vaiin 10 lai an awm a ni. Kan Kohhran Upa hi an zahawm a, House pawh an timawi a, a chhuan pawh kan chhuang hle a ni.

Hetiang mi ina min han hmanpui hi lawmawm kan ti hle a ni. Hetiang ang in han nih theihna chhan pawh hi Pu Speaker, a dik tak chuan he Inland Water Transport hi awm ta lo se, lawnglengin Rev Walliams Willams te kha lo kal lo ta sela, he Chanchin Tha eng hi kan hmu lo mai thei a. Hetianga zahawm taka awm theihna pawh hi in dawng lo maithei a ni tih kan sawi duh a. Heng in dawn theihna chhan te pawh hi Inland Water Transport lo pawimawh zia tilang tu niin a hriat a.

Mizorama Inland Water Transport an hman hmasak na ber chu kum 120 a ni ta a ni. Chutia kum 120 lai a lo liam takah chuan eng ang chiah hian nge maw Inland Water Transport hian hma a lo sawn tawh tih hi ngaihtuah tham a awm a. Chutih lai chuan kalkawng te pawh a la awm lova. Motor kawng phei chu a la awm reng reng lova, ka hresual anih loh chuan Williams te an lo kal hnu kum 50 hnuah hian Pu Rochhinga, Mission Veng ami khan Inland Water Transport hman thovin Sairang-ah motor a rawn phur chhova, chuta tang chuan Aizawlah an khalh lut a ni. Tichuan Indopui II-na lai 1942-ah khan Silchar atanga Aizawl motor kawng hi an sial tan ta a. Chu chu a hnu kum 50 na ah a nih chu. Tunah chuan Mizoram in hma a sawn dan hi thingtlang khawtin deuh thaw hi motor kawngin a pawh tawh a, chumai bak ah chuan National High Way te pawh engemawzat kan nei ta a, World Bank Road te pawh kan ti a, kan Chief Minister zahawm takin hmanni lawk khan a hawng ta a. Lunglei te pawh Session hmasa khan Dr.Thangtea khan darkar li emaw lek ah ka rawn thleng phei thei tih kha a sawi a. Saiha te pawh tunhma-a nileng zankhua deuh thaw a tlan ngai kha, tunah chuan en lai deuh thaw in an rawn thleng phei thei tawh a, chutiang khawp chuan hmasawna hi a chak a ni.

Kawng leh lamah chuan khatih hun laia kan C.M zahawm tak Brig.T.Sailo hunlai khan Bairabi-ah Rel Station a awm tawh a, Rel a lo lut tawh a, chuvangin hma pawh kan sawn ve hle a ni. Tin, tunah kan sorkar in hma an han la chho a, 2014 ah phei chuan Bairabi ah mai ni lovin, Sairangah Rel tih luh tum a ni tawh nghe nghe. Chutiang khawp chuan hma a sawn a. Tin, kan sorkar hmasa Pu Lal thanhawla C.M zahawm tak ho khan Lengpuiyah Air Port siam a ni ta ; khatih hun laia fiamthu thiam deuh in an sawi dan phei chuan, “Choak bak a tum lo a nge”, an ti thin a nih kha. Mahse, tunah chuan Choak mai ni lovin, thlawhtheihna pawh nikhat ah vawi hnih vawi thum a lo tum ta ziah a, chuvang chuan hma a sawn chak em em a. A tira kan chhawr hmasak ber Inland Water Transport ber hian hma sawn lo hian a ngai hian a la ding deuh chur chur emaw ni chu aw !! tih tur hian a awm ta a. Hengte hi kan sorkar hian engtinng e hma kan sawn ang tih hi ngaihtuah a lo tul ta a. Ram buai hma khan Mizoram ah kawng pawh a la chhuak tha lo hle a. Ka mita ka hmuh ve leh ka han hriat theih chin ah chuan 1972 pawh khan Phaileng West ah pawh khuan motor a la lut lo hrim hrim a, Rawpuichhip hi a thleng ve tan a, a kal thei det det a,

Mamit te pawh a la lut lo a, chutiang a nih lai chuan he Inland Water Transport hmang hian a khua ami te hian rangva in chung tha tak tak an nei thei tawh a ni. Chung chu engtingge an nei theih kan tih chuan lawng atangin an chah a, lawngpu ten an rawn phurh chhoh sak a, tichuan a khua atanga mel 4 mel 5 vel ah chhipin an phur leh thin a ni. Chutiang a ni chung chuan in leh lo tha tak tak pawh an nei ve thei a. Tunah pheih chuan motor kawng ten an chhun takah pheih chuan concrete in tha tak tak te pawh hmuh tur a lo awm ta a.

Amaherawhchu, kan hriat theuh ang in motor te, thlawhtheihna te chu petrol tel lo chuan a kal thei der lova. Petrol man lah hi a sang chak em em mai a. Kumin chhung, tun hnaiah ringawt pawh hian petrol man hi vawi 2 vawi 3 an rawn ti sang a. Petrol man a san chuan motor chuan man a to va, thil phurh man a to zel a ni. Amaherawhchu, chutih lai chuan Inland Water Transport kan tih ang, Mizorama kan han chhawr, lawngleng ang te pheih chu engine nei pawh a la ni lova. A khalhtu vai hovin, maji hovin ti hian an han khalh a. An lawng karna lah chu thing pheik mai a ni a, a man a tam chuang lova. A khalhtu lah chu an ei te a that tawh deuh avang khan khang hun lai ai khan an ban te a sek tawh leh nghal a. Chuvang chuan Inland Water Transport hi tih changtlun deuh chuan tun ai hian hmasawn thei tak tur, ropui tak chuan hma sawn lo mah ila, engemaw tak chuan hmasawn thei tur a ni a. Chuvang chuan he lam pang hi kan sorkar hian han ngai pawimawh se la a tha awm mang e aw, tih hi kan ngaihtuahna ah chuan a awm a.

Tichuan, tuna kan sorkar ten hma an han lak dan chin nia kan han hriatah chuan he Inland Water Transport hi tunhma lam chuan PWD kutah a awm thin a. Amaherawhchu, 2006, May ni 25 atang khan Transport department in an la ve tan a. Transport department chuan EIRI Consultancy Firm te ruaiin Tlawng lui atan Inland Water Transport Project an siam a. Chutah chuan DPR pawh Central Ministry-ah nuai 527 leh sing 9 leh sang 3 man zet an theh lut a. Tin, he project enfiah tur hian Inland Water Authority of India te pawhin official te an rawn tir a. Chung hovin an rawn endikna leh an kaihruaina hnuai chuan an DPR te pawh siam tha in 18.6.2009-ah khan Central ah IWAI hnenah an thehlut ta a. Heng an theh luh te pawh hi kan sorkar, tuna Congress sorkar chak tak maia kan minister viak tha tak mai hian amah ngeiin Central-ah a bawhzui a. Helam atanga zuk nawr bak ah official te leh minister te hmuin theih ang tawkin a zuk nawr a. Chung a zuk nawrna te chuan rah tha a rawn chhuah ta a. Tichuan, ani thahnem ngaihna zarah 23.12.2009, (Krismas dawn tep a nih chu) khan he project pawh hi an rawn pawmpui (approved) ta a. A project cost pawh nuai 527sing 9 leh sang 3 a lo ni ta a ni. Chumi hmang chuan Tlawng lui bik atan hna an han thawk a. Chu pawh chu instalment 3 in an rawn pe chhuak tawh a, chung an pek chhuah tawh chu a vaiin nuai 270 leh sing 6 lai a ni tawh a, an hna pawh hi 70% dawn lai zo tawh angin an inngai a. Amaherawhchu 4th instalment tur hi tunah an dil mek a, chu chu an la release lo a. Tin, hemi mai bakah hian DONER Ministry te an zuk dawr a, chung atang chuan survey turin RITES Company te an rawn tir chhuak a, chung chuan hmasawna tur report te an rawn siam mek a. Chung hmang tangkai chuan Transport Department hian Tlawng lui Inland Water Transport Project mai bakah hian project dang Tut leh Tuichawng project atan DPR te an siam dawn mek a. Chutiang chuan Mizoram sorkar pawhin consultancy firm rawih te pawh a phal sak tawh nghe nghe a, tunah hian hma an la mek a ni. He an hma lakna hi a lawmawm khawp mai a, mahse a la tawk lo va. Hei aia nasa zawka hma an lak theihna tur chuan, khaw thlang lamah khuan Tut leh Teirei te, Langkaih te hman tangkai theih an la awm a. Tin, khaw chhakah Tuirial te, Tuivai te, Tuivawl te a la

awm a. Heng atan hian detail project report te siamin, Mizorama luipui hman theih zawng zawng hi hman tangkai tum ila thil phurh man te pawh a tlawm ang a. Kan hriat theuh angin khawvelah chuan thlawhtheihna chuan man a to ber a, lawng chuan man hi a tlawm ber a ni. Chuvang chuan Mizorama thil phurh nan chuan Inland Water Transport hi tun aia chak zawk hian la ta ila chuan kan thil phurh tam tak hi a lo tlawm zawk dawn a ni. Mi rethei leh harsa te chuan kan chhawr tangkai khawp ang. Chuvang chuan Mizorama Inland Water Transport hi tuna kan sorkar chak tak hian chak takin hma han la se ka ti a. Tunhmaa kan lo tih ang motor transport te pawh chawl chuang lovin Inland Water Transport ah hian hma chak zawkin la zawk sela “Bingtaii reng zawn lovin Mauruangi” kan zawn te pawh hi a hun tawh a ni lawm ni ka rawn ti a ni e, ka lawm e.

S P E A K E R : Awle, resolution neitu in a rawn move a Kohhran Upa kan nih theihna chhan pawh Inland Water Way vang kha a ni daih mai a, a ropui khawp mai. Kan sawi ho dawn ang a, minute 5 inpe ila member te, dil belh chuan minute 7 thleng pawn inpe thei ila. A changtu Minsiter kha kan ko hmasa ang a, ani erawh chu hun bi tuk lo ila, Inland Water chungchanga kan sorkar in hma a lak tawh dan te pawh House min hrih bengvar sela a tha ang, Pu P.C.Zoram Sangliana ilo ko ang.

Pu P.C. ZORAM SANGLIANA, MINISTER : Pu Speaker, ka lawm e. Member pali lai Pu John Siamkunga te, Pu Selthuama te, Lt.Col.Z.S.Zuala leh Pu K.Rinthanga te resolution rawn put luh, Inland Water Transport hi state ah tangkai leh zuala kan hman theih nan sorkar in chak takin hma la rawh se tih a lo luh hian, Department biru te leh hmalakna pawh engmah lo nia lan laia kan member ten hetiang min lo hriatpui hi kan lawm em em ani tih ka'n sawi hmasa duh a. Chumi rual chuan 2006-a Mizoram Sorkar transaction business anga PWD atanga Transport Deptt. atanga he hna min pek (a la kim lo na a) Mizoram lui dung hi, min rawn pek chhun chhun atanga hma kan lakna kan member ten min hriat pui hi lawmawm kan ti. Chutah chuan hma kan lo lak tawh dan te pawh han sawi chhuahna hun hmasa min han pe hi lawmawm kan ti khawp mai.

Inland Water Transport hi khawvel pawhin a hmanna a rei tawh hle mai a. Bible-ah pawh kan hriat theih Nova'n rannung chi hrang hrang te phurh khawm nana hman kha Bible ah pawh Inland Water Transport hman tangkaina kan han hmuh tawh chu alo ni tawh a. Hmanlai atanga tun hun thleng hian Water Ways Transport hian hma sawn zelin, khawvelin a hlutna te, a man tlawm dan te hria hian a uar deuh deuh zel a. Ram changkang kan tih Europe khawmualpuiah te chuan Water Ways Transport hi an uar hle a, a bik takin Netherlands leh Russia te chuan an hmang tangkai em em a, lui awm remchan lohna lai ah pawh lui siam chawpin thil thiar vel na atan Pu Speaker, a man a tlawm mai bakah enkawlte a awlsam avangin an hmang nasa a. Leiminin a tihbuai ve theih loh water transport hi an hmang nasa a, hman tangkai nachang an hria a ni. Kum 2008-a Congress sorkar a lo dinchhuah khan kum 2006 May ni 29 atanga Sorkar luipui duhdan anga Inland Water Transport chu Transport kuta dah a lo ni tih hriain Inland Water Transport system chu Mizorama tangkai taka hman a lo nih ve theih nan theih tawpin hma lak ngal

a ni a. EIRI (Engineer Indian Research Institute) New Delhi a mi te consultant ah hmangin Mizorama lui sei ber leh lian ber ti mai ang Tlawng luih hian lawng ft. 8 a lian, ft. 24 a sei, quintal 50 atanga quintal 100 vel phur thei tur, 15 Horse power, chutiang vela kal tir theih ngei tumin, bul tan nan concept paper mai bak ah DPR te nen buatsaih a ni a. Centrala a changtupa T.R.Balu, Minister for Shiping and Transport pawh ama Office-ah a connecting officer zawng zawngte nen hmuhna kan nei a. Chuta tanga anin chunglam atanga min remtihpuina atangin hei hi bawhzui zar zar niin Inland Water Ways Authority of India hotute lamah Department officer ten theih tawpin an bawhzui zel a. Chuvang chuan Tlawng lui (Bairabi atanga Sairang inkar) tan hian cheng nuai 527.93 hi December, 2009 khan (mover in a rawn sawi ang khan) min rawn sanction sak ta a. Awlsam pawh a awlsam ve ang reng khawp mai, kumtira kan hmuh kha a kum la la in min rawn sanction sak thei nghal a, kan lawm hle a.

Nichina an sawi ang khan, 3rd installment thleng pawisa released tawh niin, hna harsa zualpui phe chu zawh tawh a ni a. Tuna kan thawh tawh chinah hian Sairangah Terminal Building sak zawh tawh a ni a. Bairabi ah pawh tun atanga thla thum velah (khuain a zir chuan) Terminal pakhat hi sak zawh leh tum a ni a. Hortoki-ah Godown sak mek a ni a. Hei pawh hi kumin chung ngeiah zawh tum a ni a. Lui dung lamah pawh a harsa zual pui zawng zawng Tlawng lui ami hi chu zawh deuh vek tawh a ni a. Hortoki khaw bula thingmun Suar an tih mai thin, piattlep metre 337 lai maia sei te, Bairabi khaw bula Suarpui te pawh, lung khawrawk hlir mai metre 1318 laia sei te pawh lung halnaa then fai vek tawh a ni a. Sairang bula Asmani Dar an tih te pawh kha lungpui khawkrawk hmun, tunhma phe chuan vai maji hovin an lawng pawh change pull hmanga an lo pull, hnuhkai thinna hmun te pawh kha awlsam taka kal kai theihin thenfai tawh a ni a. Gas Bottling Plant bula leimin, Suar an tih, thal laia kal ngaihna awmlo khawpa khawkrawk te pawh kha awlsam takin tunah chuan kal theih turin thenfai a lo ni tawh a. Lawng kal vel tibuai thei, lui laia lungpui lian pui pui Ramlakhan an tih te pawh kha. Tin, chumi bakah ‘chatuan lungpui’ an tih, 100 ft. dawn dawna lian pawh hal darh zawh vek tawh a ni a, lui dunga ‘do ruk’ an tih te pawh kha a tam ber chu tunah hian thenfai tawh an ni nghe nghe a ni.

Pu Speaker, tunah hian hemi bika harsatna tlem kan tawh mek chu National Highway hmasawna kal mek vang tho a ni a. He sorkar kaihhruaia hnuai hmasawna kal mek, sorkar hmasa ten an lo tih tawh chhunzawmna te pawh a niang chu, chuta tana hmasawna kal mek zingah National Highway – 54 kawnglaih zauh hna thawh mek avang hian Buichali leh Pualhrang lui inkar chhuah Km.7 vel hi duh angin hma kan la chak thei lova, hmabak tuna kan la neih a zualpui chu a ni tawh a. Hetianga thenfai vek anih hnuah hi chuan Low Craft Vessel Ft. 8 a zau, tuna kan sawi Ft. 24 a sei, (Horse Power) 15 khawl hmanga nawr kal tur, 50-100 Qntl. phur thei tur kha awlsam takin Sairang thlang lamah hian ti mai ang, (tuna kan han hma chin chu Bairabi thleng nimahsela,) Cachar ram te pawh lut thla vek tur a ni ang a, a kal theih dawn tawh a ni. Sairang leh Bairabi inkara lawng kawng siam turah hian hna khirkhkan hi a tam em em a, chu chu House-a member te leh hemi kaltlang hian kan mipuite hriattir pawh hi tha in ka hria a.

Chutah chuan Suar pan lai hai thuk te a thenah chuan a ngai a, a thenah lui luang kikawi lutuk siam ngil te a ngai leh a, lui luang darh nasa lutuk

avanga lawng kal harsa khawpa tui pan lai te kha siam thuk te, chumi atana tui luang khalh khawm a, a thuk bik lai siam nana lungrem hmanga khalhkhawm te hi a hautak em em a ni. Hetiang bik hi hmun 42 laiah siam zawh tawh a ni.

Tuna project in a huam chin hi Km 81.350 a thui a ni a, hemi huamchhungah hian 2222 meters zelah 1 meter in Tlanglui dung hi a insanhleih ang a ni. Chumi awmzia chu Bairabi leh Sairang inkarah hian 36.5 meters-in a sang tihna anih chu. Tlawng lui clutchment area hi 2740 Sq meter vela zau ani a, helai hi sawichhuah duhna chhan ka'n nei a, zirchian anih hun lai khan Tlawng lui tui hi tui tlem lai berin sem rual ta ila, feet 4 leh inches 11 vela thuk a ni thei a. Amaherawhchu, khatiang zirchianna kha kuminah mai pawh hian a lo danglam ta hle a. Kumin March ni 21 tui tlem ni khan Tlawng tui khu an han enchiang leh ta a, hemi chhung area ami bik hi sem rual ta ila feet 3.5" a thuk a nih thei chauh mai a ni. Zirchiannaah chuan Mautam avang te, catchment area thing leh mau chereu nasa lutuk avangte, chumai bakah Mau tam vang pawh ni chuang lova thing leh mau kan tihchereu nasat lutuk avangte niin a lang tlat mai a, chu chu mithiam ten an sawi dan a ni a. Tiang zela Tlawng lui tui volume hi a tlem chho zel a nih chuan, tuna kan project ka'n beisei pawh hi a hlawhtling lo vang tih a hlauhawm hle mai a. Chuvang chuan helai bawr hi kan sawi tel duh bawk a ni. Pu Speaker, House-ah hian hemi lai hi sawi uar ka'n duh em em chu kan thlen chin hrim hrimah pawh hian kan hlawkpui tawh a ni tih hi House-ah hian sawi ka duh a. A chhan chu Tlawnglui dunga kut hnathawktu ten an thlai thar chhuah chu awlsam zawkin lawngleng hmangan sengkawm theih a lo ni ta a ni. Zin veivah nan leh kalna atan hmanna chang kan la hrelo a nih pawhin heng lai lui dunga kan farmer ten an hmang tangkai tawh a. A bik takin thlai thar tamna Hortoki khuaa Hatkora-te, Mai leh Bean te chu vairam lama hralh turin vai Maji lawngin awlsam takin tunah hian an phur ta mek a. Tlang kawnga kal man to tak tak, to lutuk avanga kut hnathawktu ten an thawh phutawka hlawkna an tel theih loh thin kha, tun ah chuan hah man an tel tan ta mek a. Hei hi hmasawna thar chhiar hmaih hauh loh tur vawiin nia a ken tel a nih avangin han sawi rik hi ka'n han duh a ni. Kumin March thla khan nichina mover pawhin a rawn sawi rik ang khan DoNER Ministry atanga kan ngenna angin an nin Rites Company Rel India Techno Economic Service-te chu Mizoramah hemi Tlawng lui mai bakah pawh Mizoram Inland Water Transport atana luidung cheitlakte endik turin an rawn ruat a. Chumi te chuan min rawn hmu a, Office-ah te kan Officer-te pawh in an lo sawipui a, chutah chuan lui pali lo kawhhmuh kan nei a ni, kan kut a awm thei chin ti mai ang, Khawthlangtupui, Tuivai leh Tut lui leh Tuichawnglui te kan lo kawhhmuh a. Chuta tanga uluk taka an han en ah chuan Tutlui leh Tuichawnglui te hi hmalak na hmasa atan Tlawnglui bakah hian min rawn thlan sak leh ta a. Tunah hian Central sorkarin detailed project report siam phal na he mite pahnih ah hian min rawn pe fel leh tawh a. Chu DPR siam tur chuan hma lak niin hengte pawh hi tangkai zawkin lawng kal theih nan siam theih ngei hi kan inbeisei a ni.

Inland Water Transport chungchangah hian han tarlan tel ka'n duh pakhat chu, kan tum ang leh duh anga hma kan la chak theilo hi pawh kan ti a. Luipui dunga hna thawk kan nih avang hian kan hnathawh duh hun hi tui tlem hunlai, thla rei lo te chhunga theitawp chhuah tak meuh meuha thawh a ngai a. Chutihlai chuan pawisa Central atanga lo kal hi kan Mizoram chhungah ngei ngei pawh hian kan Finance Minister pawhin min lo chhinchhiahsak bik se, duh aiin a tang rei deuh hlek thin a. Hei hi tuna kan tawn mek kan experience-ah pawh hian a tel tlat a ni. Tuna Tlawng lui kan tihah pawh third installment a lo kal a, a lo kal mekah pawh hian

March thlaa an rawn sanction daih tawh thla thum a ralah hian an rawn tifel thei awrh chauh mai a. Heng ang te hi Central-in an duh dan chuan heng hian kan hmalakna a tihkhawtlai thinna chu, kan hmalaknaa kha kan zuk report a, kan utilization certificate kan zuk theh thla vek a. Chumi mil chuan an rawn endik a, chumi zawhah chuan a next installment kha an rawn release chauh zel si a. Helai bawrah hian min hriatsak tur pawhin ka duh khawp mai a, chu chu ka'n ngen duh a. Central sawrkar duh dan angin tunah chuan kan kal tawh bawk a, IWDP hi state PWD kutah dah ni lo se la tih hi India ram hmun tinrenga state te hnena Central sawrkarin a hriattir a ni a. Keini pawh 2006 kumah daih tawh khan chhuah a lo ni tawh bawk a. Hetiang te hi hriat ni se la. Tunhnuah chuan a nih tur ang taka chak taka kal a nih theih nan hei hi kan beisei in kan ngen duh a ni.

Department lamin kan lo inbuatsaih dan chuan kumin July thla, tuna kan thla hman mekah hian Sairang atanga thlang lampang Bairabi, kan ramri thleng ti mai ang, lawng service tur hian permit, taxi permit, bus permit, sumo te kan han pek ang hian pek theih kan inbeisei a. Amaherawhchu, tuna ka han sawi ang khan hmuh lawk loh harsatna te avangin tuna kan tum hi kan la thleng lo deuh hlek a. Tunah pawh hian chung harsatna an tawh chu khunga vai permit nei, lawng permit nei hovin an lo luh chinah leh an phurh thlak chinah pawh, Hortoki vela thlai thar tir te an han phurh thlak hnua pawh khunglai misualten harsatna an lo thlen thin a ni tih hi House-ah hian ka'n sawi ri duh a ni. Heng pawh hi kan Department lampang chuan kan hria a, hma lak chhohna..... (*interruption*)..... atanga kan han chhut chhoh pawh hian kan member zahawm tak Pu Selthuama leh member dang pali lai in he resolution an rawn pu lut hi a ropui kan ti a. Kan Department min tiphur khawp mai a. Inland Water Transport tangkai zia te min hriatsak a. Hetianga kan hman tangkai theihna tur atan sawrkarin chak takin hma la rawh se tia Resolution a rawn pu lut hi ...(*interruption*)..Transport Department-in mipuite, kut hnathawktute thar chhuahte man man zawka hman a nih theih nana hma kan lo lakna min hriatpuinaah kan ngai a. Kan lawm em em a. Department-a thawktu zawng zawngte a bik takin phurna thar a siam ngei dawn a ni tih hriain a changtu nihna ang pawhin Pu Speaker, House member ten lungrual taka min pass pui turin ka rawn sawmin heng kan hmalakna te hi ka han sawichhuak a ni e. Ka lawm e.

S P E A K E R : Le, tunge han sawi dawn. Kan sawi tawh a, kan sawi chin pawh kha a ngaihnaawmin a bengvar thlak a. Pu Lalduhoma.

Pu LALDUHOMA : Pu Speaker, a resolution neitu khan a rawn move thiam hle mai a, Kohhran Upa tan chuan han support loh ngaihna pawh kha a awm lo a. A changtu Minister zahawm tak khan hmalak tawhna thui tak min hrilh a. Helai hi ka bial chung thil thui tak a nih ve avangin mimal tak pawhin lawmawm ka ti a. Nikum lamah te zawhna pawh ka lo zawt ve tawh thin a. Tunah hian 70% vel zawh tawh alo ni a, lui kawng han siamthat chungchangah hian khulai vela chengten min hrilh danah chuan, “a hnathawktu a contractor te hian a khaw neitu, a doruk awm lai te leh a pawimawh lai hria hi min punna chang hi hre deuh sela, pawimawh kan tih loh lai nawr vak maite an ching a, a pawimawh laite an ti mang lo thin a,” an ti a, a tak tak nge tak tak lo tih chu ka hre lo a. Chuvang chuan khunglaia Village Council thuneitute leh NGO te leh lui dung chinchang hria te he hnathawhna-ah hian rawn ve

a, rawih tel theih anih chuan rawih ve te pawh kha a tha hle in ka ring a, thahnem ngaihna chungchangah.

Tin, chuloah chuan Tlawng lui ah khuan accident tam bikna lai hi a awm a ni, mi an tlak hlum thin bikna te, livirh awm nate. Khungte pawh khu bomb chhiat tihdanglam an duh a ni. Chungte pawh chu ngaihtuahna-ah naah khan tel se a tha hle a. Tin, thal lai chuan a lui dung zau lai, a kuang zau laiah khuan tui a pan em em mai a. Lawngleng pawh khu an chhuk phawt a, kutin a nawrin an nawr thin a ni. Chutiang hmunah chuan suar pan lai han tih thuk (Minister zahawm takin a tih kha) a ngai a. Amaherawh chu balu khu an la reng a, lui dung pawh khu a kal hleih theih tawh lova. Han kal ila ngal rek thleng lek a ni a, han pen leh ila pil dawn alo ni leh a, tikhan a awm chuk mai a ni, ban khur ang mai hian. Khungte pawh khu a tih dan deuh ngaihtuah loh chuan anni lamin lo siam tha pawh nisela, an hawlh chhe leh zung zung thei mai tho a. Khatianga suar pan lai tih thuk a, venhim a, balu te pawh lak loh nise kan tih kha an mahni tan pawh a tha em em a, nawr ngai lovin a thuk khan a kal theih zel dawn a. Tin, lawngleng khu feh nan te hian an hmang nasa em em a Chakai bomb nan bakah. He trade hi NLUP ah hian telh tlak a ni, nuai khat pawh a ngailo a nia, nuai khat chuan lawngleng hi pahnih pathum a daih mai thei. Khutah an siam ve thei vek tawh a. Khungte khu an mamawh em em a, an nei zo si lova, trade pakhat chuan han telh ve nise chuan an tangkaipui khawp ang. Chu chu a khawl nei chi hmang lem lo tan pawh a mirethei tena an ban phak tawh a ni a, a tha hlein ka ring a.

Tin, Bairabi nena an inkarah khan hmabak te a la awm a, hnathawh tawh sa kha a tha a, a lawmawm a. “A aia nasa” in tih kha kan resolution-ah khan a ni a, a area pawh kha han zauh sela, Sairang atanga lui hnar lam pang te pawh khu a la tul a ni. Ram vah ching ve deuh mai ka nia, kan Home Minister te ang chi deuh hi ka ni a, kut hlei ve tak mai ka ni a. Amaherawhchu, Sangha te, Chengkawl bak ka khawrh ve ngai lo a. Zan len den te hi ka la ching em em a, Tlawng lui khu ka Chiang ve hle a ni. A lui hnar lam Sairang atanga a chhak lam khu kawng te a tlang theih chuan kan Agriculture Minister zahawm tak hnenah hian NLUP infrastructure sumin balu kawng min laih sak teh ka ti a, a la reh vang vang mai a. Khungte khu tlang thei se chuan balu a tha lutuk a, a tam bawk si a, Chung vel han phurh nan chuan he Inland Water Way hi a pawimawh lehzuol dawn a. Hetah Reiek kai thleng hian han hrut chhoh kha a chakawm hlein ka hria a, tun hi chu a bul tanna ang lek hian ngai ta ila. Sum te nawr chhuah zel dan ngaihtuah a, a aia nasa a hmalakna hi zauh nise tih hi ka duh em em mai a. Khulai area khu a pawimawh a, Pu Speaker, i hriat angin Airport a awm a, two lane a lo chhuak tawh a, four lane a lo kal leh dawn a, rel kawng a lo kal dawn bawk a, water way a man tlawm ber chi tha taka a lo kal bawk chuan kan ram kawtchhuah pawimawh tak a la ni thuai dawn a, chung zingah chuan kan means of transport-ah mipui in an chhawr ber tur pakhat a tling ve dawn a ni. Tin, hemi hi kan ti tak tak a nih chuan a kaihnhawih chu Bairabi Hydrel Project kha a ni ve tlat a ni Pu Speaker. Khu khu chu han khuap thei ila chuan Inland Water Way hi khutia a khawkrawk siam siam ngai lo khuan tha deuh mai a lo thleng mai dawn a ni a. Hmanah khan a tuipui vek vek te chuan an tuipui zia kha ka sawi tawh a, thih pawhin an thlarau vanram a kal hmam Bairabi an tlawh phawt thin ka tih kha! Tuipui ve a tha, Inland Water Way atan khan a tha hrim hrim, a multipurpose em em a ni.

Tin, lui pali dang an hma tel dawn tih kan han hria a, khang zingah khan Chhimtuipui a tel tlat lovin ka hre mai a. Hman deuhah khan Hruitezawl kan va tlawh a, kan lawng chawlhna neih ve chhun a ni a. Tah sawn Myanmar atangin eng eng emaw a rawn thleng ve reng a, Vawk te an rawn phur thla a, keini lam atangin thil an tawlh chho ve reng bawk a. Saw pawh saw siamthat a ngai a ni. Look East Policy nena tang tlang a Indian Ocean-a lawng lian a kan luh thlak theihna tur a nih avangin. Kawlchaw kai thleng te sawn sawisak ve a ngai a, sawtah pawh tuikhuah tum a ni tho va. Tuna a awm ang ang pawh sawn Hruitezawl bik saw chu lawng chawlhna tih tlak deuh hleka siam theih a ni a, a nih ang ang in kan hmang nawk nawk a ni a, sawng te thleng sawn hrut tel nise tha hlein ka ring a.

A tawp berah chuan Pu Speaker, thil tha kan ngaihtuah rual hian ven ngai a awm thin a. Khu khu kalkawnga kan hmang leh tak tak dawn a nih chuan hnam dang tam tak an lo lut dawn a, ILP problem a piang ve leh dawn a ni. Chumi thleng chuan khawilaiah nge Check Gate te kan siam anga, department dangte nen in co-ordinate a tih tel a ngai a, kan hnam himna ngaihthah lova chumi hre reng chung a rawn kalpui nise ka ti a. He resolution hi a tha em em a, duhlo tumah kan awm ka ring lova, keipawhin mimal takin lawmawm ka ti khawp mai a, ka han support a ni e, ka lawm e. (Speech not corrected).

SPEAKER : Pu Hmingdailova Khiangte.

Pu HMINGDAILOVA KHIANGTE : Pu Speaker ka lawm e. He kan subject Inland Water Transport, Tlawng lui ami kan mover Pu R. Selthuama MLA zahawm takin thiam takin a chepakai takin a rawn move a, a ngaihnawm hle a. Tin, kan Minister zahawm takin hmasawna kan neih zawng zawngte a rawn sawi bawk a.

DEPUTY SPEAKER : Sawi zawm leh ngai tawh lo awm takin a chiang nain sawi a chakawm ve a, kan sawi ve lawk dawn a ni.

He Tlawng lui tuna inland water transport buatsaihna hian Aizawl West – I bakah 4th Tuirial bial chhung a kaltlang tam hle a, a hmang tangkai ber pawh 4th Tuirial bial chhung amite anni theih hial awm e. Tunah pawh hian khawkhat han tarlang ila, Hortoki khuan an hmang tangkai hle a, Hortoki khu lui kama awm a ni tih kan hria a, Sairang ang deuh bawk hian an khaw kam velah khuan hmun zawl a awm a, thlai te an ching nasa ve a, Mai te pawh an thar nasa hle a, a hnah thlengin. Tin, thei rah te pawh hi an thar nasa a, amaherawchu a hralhna lam hi harsatna an tawh tak avangin an buai deuh na a, tuna inland water kawng a lo that takah chuan khulai khu an hmang leh mek a. Amaherawhchu tawite han sawi ka duh chu, lawngleng emaw a aia lian deuh te pawhin thawmhaw han tawlh thla nise, ramhnuai kaltlang/paltlang a nih avang hian security problem nichina kan Minister zahawm takin a sawi nual ang khan an tawng mek a, churangchuan khu kawng khu tangkai hle mahsela, chhiahkhawntu, unwanted miscreants ti mai ang an awm mek a, chungte chu kan

sawrkarin ala ngaituah leh mai ang a. Riverine Police te pawh kan awm a va tul awm em ? tih te pawh ka ngaituah tel a.

Tin, ka hmaa MLA zahawm takin ILP chungchang a rawn sawi te pawh kha alo lang nghal a. Engpawh nise, he tui kawng, kan sawrkar chak takin 2006-a PWD atanga Transport kuta a dah tawh, tun hnai maia chak taka hma an la hi lawmawm ka ti a, kan sawrkar hotute a bik takin kan Minister zahawm tak Pu Zoram Sangliana hnenah pawh lawmthu ka sawi a. Tin, khulaiah khuan a hman theih tawh na chungin fur lai a ni a, a rawn zawmtu lui te atangin chirh leh lei te a tla leh tawh a, khung te erawh khu chu problem lian an tling lo nachungin hriat ve atan chuan a tha in ka hria, eng pawh nise, lawmthu kan sorkar chungah ka sawi a ni. Ka lawm e.

DEPUTY SPEAKER : Pu J.H.Rothuama ilo ko ang u.

Pu J.H. ROTHUAMA : Pu Deputy Speaker, ka lawm e. Inland Water Transport thu kan sawiho a, a lawmawm khawp in ka hria a, Department te tak te a ni a. Tunhma zawng zawng kha chuan PWD hnuaiyah a ram pumpui hi, SDO pakhat hnuaiyah awm vek a ni thin a. Thunhma atangin khung Tlawng leh Tut te, Tuichawng lui te chu IWT hian a lo hma ve thin a. Amaherawhchu, sorkarna kan lo chan chhoh takah hian kan Minister in-charge hi a phur baw a, nasa takin hmasawna a rawn thleng a, tunah hian department te tak te ni tawh lovin Transport hnuaiyah dah ani tawh in ka hria a, hei hi lawmawm khawpin ka hria a.

Nichinah khan a rawn move-tu khan a sawi thiam khawp mai a, Inland Water Transport avanga keini pawh Upa ni tluk hial in min chhuah a. Chubakah Pu Lalduhoma member zahawm takin a rawn sawi kha, Tlawng dung khu chu ka hrechiang ve thawkhat a, a chhan chu Sairang leh Bairabi inkar hi ram vakin wavi engemaw zah ka kal tlang tawh a ni. Ramvachal ka ni lova, kei chu tuivachal ka nia, sangha man mi, kumtin enggemaw zat khulai kara kal ve thin khu ka ni a, churang chuan a ram khu ka hrechiang ve khawp a, Sairang pelh thlak a suar kan neih khu Asmani Dar ani a, khu phei khu chu a suar awm dan khu a harsat deuh avangin tun hma chuan a hnuh a hnuhna, chabi chain kha an dah thin a, chu chuan lawng kha a kal lam leh haw lam kha an hnuk thin a ni. Tin, a thlang khu suar zel a ni a, chu chu Buichali kan tih, Lengpui kai thlang ta zawk, kawngpui thin thlang thleng khuan chei ngai a ni a, chu chu an chei thla deuh vek tawh a, Khumi thlang lamah chuan chei harsa a awm tawh lova. Chatuan lungpui kan tih thin te leh lung tohlawt lian pui pui te chu a awm na a, Hortoki thlen thlak dawnah khuan lung hmun a lo awm leh a, chungte chu an phiatfai tawh niin a lang a. Tin, Bairabi thlen thlak dawnah Suarpui (tun hmain kan Chief Minister lo ni tawh kan member pui Pu Thena hun laia tuikhuah na tur an lo han enchhinna) khu suar nasa tak mai a ni a, lungpui nasa tak mai a ni a, khulai pawh khu an thianfai thawkhat tawh, kal theih niin kan Minister zahawm tak khan a sawi a, a lawmawm hle niin ka hria a. Tunah hian Sairang atanga chhukin darkar 3 chhungin Bairabi a thlen thlak theih tawh a ni. Chutiang khawp chuan Inland Water Transport hi a that chuan khulaiyah khuan a chhoh lam chu muang deuh

mahse a chhuk lam hi chu rang tak takin kan thleng dawn a. Tin, tui tla zawnaah te kan tel a, pum in Hortoki thleng thlengte kan in kar thla thin a, fur laite phei hi chuan kal thlak hi a harsa em em thin a ni. A chhawrtu tur an tam viau mai a, bial engemaw zatin an chhawr tur a ni a. Tin, a ram pumin chhawr tur anih bakah lawnglian kan tih, tunhmaa a chung khuh thin, Maji hovin an rawn kar thin khu 50 – 100 qtls thleng vel phur thei a ni a. Khutiang khu tuang taka an lo thlen a an kal tam deuh chuan motor atanga kan thil phurh tam tak hi a chhawk ang a, water transport hi transport-ah chuan a man tlawm ber a ni an ti thin a, Maji lawng lian kan tih ang khu a kal tam chuan nasa takin mipui min chhawk dawn a ni.

Tin, ka hmaa member zahawm takin a sawi ang khan power lak nan sang taka kan khuap lo anih pawhin Bairabi chhak suarah chuan water transport-ah leh sangha dilah tal hi chuan chim sang lutuk lo, ram chim chhe tam lo, compensate awm lo turin khuap ta ila nasa takin Inland Water Transport-ah hian min pui dawn a ni, chu chu Tlawng thu ni ta selangin. Tin, Pu Hmingdailova rawn sawi kha “kut bul chhuah” kan ti a, Hortoki ramah ram tha tak mai a awm a, mai te leh thlai fur an chinna, an hralhna hmunpui pakhat, thlai china lakchhuahna a ni a. Awlsam taka lawnga kal zung zung theih a nih chuan an thlai thar kha mipui in nasa takin a hralhna kawngah an chhawr dawn a ni. Tut khu tunhma atanga an lo kal na thin a ni a, Tut dung phei khu chu suar chhe lutuk a awm lova. Tut kai kan tih Phaileng kai atanga Tlawng thleng khuan ka kal tawh a, harsa teh vak awmin ka hre lova, Tut pawh khu tunhmain eng emaw chen chu lawnglian kan tih ve mai kha Mamit thlang thleng khuan a kal ve thin a. Chungte chu han chei deuhin nasa takin khu lama transport pawh a chhawk dawn niin a lang. Khulai khu kan Minister zahawm takin a sawi ang khan hmalak leh na tur a an chhawp ani a, tih puitlin thuai thuai a nghahleh awm khawpin ka hria a. A bik takin Kan Dy. Speaker bial thlenna turah chuan tunhmain bungraw lak nan an hmang thin a. Tunah chuan dawr bungrua tam lehzual, ei leh bar tam leh zual lak chhoh theihna turin khulai kawng khu siam phei tum a ni. Tin, a kam pawh khu lo leh thlai huan siamna tur a tam a, chutianga lawng leh road transport tha zawk a kal kha chuan lui kama kawngpui lian kan siam a nih loh pawhin kha tui kawng kha a that phawt chuan a kam ah thlai tam tak a chin theih in a thar theih dawn a ni tih ka sawi tel duh a.

Tin, Tuichawng saw tunhma atanga hmalakna thin a ni, saw phei saw chu a siam a har lova, chu bakah Tuichawng bik ngau ngau ah chuan tunhma in sorkar in hma a lo lak a a lo enkawl ve reng thin a nih avangin sorkar-in hma chak takin la sela ka duh a. Tin, Chhimtuipui kan tih saw chu tunah chuan PWD lam hian an enkawl avangin a theih ang chin chin kha chu saw lai ah sawn hma an la a, lawng tlem a lian deuh pawh a theih ang chin, Mizoram chhung thuk deuh taka lo lut thei tura ruahman na te pawh an nei thin a, a lungpui saw a huphurh awm hlein ka hria a, chu chu ka hriat ve dan ani a. Chuvang chuan saw lam chu engemaw chen alo muang deuh a nih pawhin tuikhuah tur te leh rel te a kam a la kal tur a ni a, Mizoram a rawn thlen theih chin, hmalak vak ngai lova a rawn thlen theih chin ah pawh sawn tangkai taka hman theih tur sa kan nei a ni. Chuvang chuan resolution tha tak mai kan member zahawm tak Pu Selthuama'n a rawn pulut hi a lawmawm ka ti a. Kan ram hmasawna atana thlawhna te kan lo nei tawh a, rel te a lo lut

ve tawh a, tin kawngpui lian tak tak te pawh kan nei a, a thlur ve viau tawh a, chumi karah chuan kan lui neih ang ang te Inland Water Transport-a hmalakna tur kawng a ngaimawh thu a rawn sawi hi a lawmawm ka ti a, a resolution hi ka support a, kan pass ngei pawh ka duh in ka han tanpui a ni e. Ka lawm e.

DEPUTY SPEAKER : Pu P.P. Thawla

Pu P. P. THAWLA : Pu Dy. Speaker, member zahawm tak Pu R. Selthuama resolution, “Inland Water Transport hi kan State-ah tangkai leh zuala kan hman theih nan kan sorkarin chak takin hma la rawh se” tih hi tha ka ti hle a. I veilama thu atang pawh hian hei hi chu thlawp ngawih ngawih chi leh phur taka sawi ve na hun niin ka hria a, chuvangin tha ka tih ve thu tlem kan sawi ve dawn a ni.

Mizoram chu kan hriat angin 1894 vel atang khan Wales ram, sap ram atangin Missionary te an lo kal a, Sairang piah Tlawnglui kamah lo kaiin Aizawl an lo lut a, Krista Chanchintha nen ramthim an rawn su eng kha a ni a. Hun a kal zel a 1903 velah khami Missionary te unau pahnih bawh khan Baptist Kohhran din turin chhimlam khawpui Lunglei an pan a, tichuan an lo lut a, Chanchintha bawkin an chhi eng a. Tichuan, Kohhran a lo ding bawh a, khang Missionary pahnih te nilo an naute zing ami RA Lorain-a, ani hi 1907-ah Mara ram chhi eng turin a rawn kal ve leh a. Tlawnglui rawn zawhin Tlabung atangin a rawn chhuak chhova, Lungleiah hun engemaw chen a hman hnuin Mara ramah 1907, September ni 26 khan a lo thleng ta a. Tichuan, a rawngbawlna a tan a, “Tho la, eng rawh u”, tiin Mara ram mipui hnenah Chanchintha a rawn puang tan ta a. Tichuan, Mizoram pumpui ah chuan United Kingdom lam ram, Wales ram atanga missionary te rawn din kohhran chu Presbyterian Kohhran te, Baptist Kohhran te, Evangelical Church of Maraland te an lo ni ta a ni. Kan Mara missionary te kha kum 1910 hnu lamah an zin lo haw chho leh lam chu Akyab lam atanga lo chho in Lungdar lamah an rawn kai chhova, tichuan an station Serkawr te pawh an rawn pan hial a ni tih pawh kan hria a. Chutiang chuan Inland Water Way, tuikawng hmanhian Chanchintha kan dawng ani tih kha thu dik tak a ni. Chuvang chuan he ram leilung a mi cheng te pawh hian kan ram hmasawna tur atana hmanraw pawimawh tak Inland Water Transport hi a bang thei lovang tih chu kan zavai hian kan pawm tlan ka ring a, chu chu ka han tarlang hmasa duh a ni.

Inland Water Transport chungchanga Mizoram sorkarin a hmalakna hmasa ah khan Chhimtuipui lui a tel tlat lo lai kha a ngaihawh awm hle in ka hria a. Hei hi a pawimawh a, a chhan chu Primary School kan kal lai atang tawha Mizoram lui lian kan sawi rik te zingah a tel pha ve a. Chuvangin Inland Water Transport a hmalakna-ah khan a hmasa pawlah khan tel ve ngei se tih kha a resolution ah lo inziak chiah lo mahsela, kan pass hunah phei chuan Chhimtuipui hi ziah tel kher nise a tha hle in ka hria.

Kum 15 kal ta ah khan NEC atangin ₹ Nuai 300 bawr vel hi Kolodyne river a lawngleng kal theihna a siamna tur hian pawisa sanction a awm a ni tih kan hria a. Chu chu surveyor ten an lo survey tawh tih te kan hria a, mahse thawm te a lo reh leh thin a. 2005 bawr velah khan office holder ka nih ve lai in PWD hotu te ka dawr ve a. Khami nuai 300 bawr vel atangin engzat nge chuang tih ka zawhna ah

chuan nuaih 176 vel a chuang a ni an ti a. Hemi atan hian Sala chhuah atanga Kawlchaw kai thleng lawnga kan kal theihna turin hma min laksak rawh u, tiin hotute ka dawr kual zel a. A tawp ah chuan 25 km min pawm sak ta a, nuai 135 vel an sanction ni awm tak a ni. Mahse, ka nghah reng lai khan a han chhuak chu ka chan lohna lam atangin a chhuak a, Lawngtlai Division lamah a chhuak a. Ka hriat miah lohvin Lawngtlai District lama politician ho khan hna kha an lo insem vek tawh a. Ka hriat chuan a tlai zo vek tawh a. An thawh that leh that loh lam pawh kha ava bih hleihtheih tawh lova, inrawlh kha a rem tawh lova. Tun sorkar lo piang hlimchhawn velah pawh khan khami 25 km piah lama sum chuang pawh kha engemaw chen chu hna siam belh chhah a niin ka hria a. Mahse kan mikhual ruih tawh mai a. A zawh pawh ka zawt ta lova, tlai khaw hnu ah chuan tlem tlem chu chhunzawm leh a ni awmin ka hria a ni.

Engpawh nise Pu Dy Speaker, hetiang Mizoram sorkar chak takin Inland Water Transport lama hma a lak mek laia he Chhimtuipui lui, Kolodyne river, Kawlchaw kai chhak maiah, Kolodyne Hydrel Project te pawh hma chak taka lak mek a ni tih te kan hria a. Chutiang anih chuan hemi Kolodyne Hydrel Project nena hma lak kawp hian a remchang hle in ka hria a. Chuvang chuan Sala chhuah chhuah thlenga lawng lianrawn kal, a chhak lam kawng pawh engemaw chen siam tawh ni baw si ah hian, Kolodyne Hydrel Project hmalak mek rual hian Lungdar atanga Kawlchaw kai inkar lawngleng hmanga chhuk chho a nih ve theih nan chak taka hma lak nise sorkar chak tak hian. Central sorkar hnen atanga sum dil a hmalak mai chi a ni. Kolodyne tuikhua a lo awm phei chuan hemi tuikhua tui tling hian Darzokai lam thleng khan li a awm chho mai dawn a, chuvangin hetiang thil lo awm tur denchhen a, Salachhuah atanga Tuipui kal kawng lo zawh a, lawngleng nena transport tha tak kan neih theihna tur atan a hmalak hmasak ni nghe nghe sela a tha hle in ka hria. Fiamthu ti takin an sawi thin a, kei phei chu Government Status politic khel ve kha ka ni a, chuvangin hei hi chu Govt. power lo chuan thil tih chi a ni lo. Tichuan, Inland Water Way hmanga kan Zoram development hian hma a sawn chak zel theih nan, he resolution hi tha ka ti hle a ni. Pa pakhat in chhim lam pawimawh zia hi min hrilh chhawng ve a, India sorkar pawh hian Look East Policy a ti a, Pastor Chhawna'n Zoram awmdan tur a inlarna ah pawh hian chhim lam hi Zoram development kawt chhuah a ni ang a ti e, an ti a. Chutiang baw in S.Vanlaiphai Pu Saikhuma inlarna ah pawh khan Zoram development kawtchhuah chu chhimlam a ni ang a lo ti a. Tunah hian Multi Model Transport Project-te pawh chak taka hmalak mek zel a ni a, contractor pathum in hma an la mek zel baw a. Chung hmalakna chak taka a kal mek lai leh Kolodyne Hydrel Project pawh reilo te a bul tan tur a nih mek lai hian Salachhuah lam atanga lawnglenga Kawlchawkai thleng tui kawng a lo kal a, a chhak lam ah Darzokai thleng te a lawng nen a transport man tlemte kan tawm theuh theihna tur in he resolution hi kei pawh tha ka ti em em a, lungrual taka kan pass theih nan ka thlawp thu ka rawn tar lang a, chutah chuan Kolodyne river pawh hi telh hram ni se tih ka rawn zep tel duh a ni e, ka lawm e, Pu Dy.Speaker.

DEPUTY SPEAKER : Pu John Siamkunga.

Pu JOHN SIAMKUNGA : Pu Dy.Speaker, ka lawm e. He resolution ah hian Tlawng lam hma lakna te kan ngai thla tawh a, hmalakna hrang hrang kan hotute rawn sawi leh member zahawm tak tak te rawn sawi kha chu ka sawi nawn lo ang a.

Kan sorkar kal lai mek in Tlawng-ah te, Tut-ah te leh Tuichawng lamah te hma lak zel tuma Inland Water Transport Department lama hma lakna hi ropui ka ti a.

Chutih rual chuan Mizorama lui lian ber Chhimtuipui lamah sawn hma lakna tur a la tam a. A bikin South Tuipui, ka bial ah te sawn lawnga eizawng saw an tam a ni. Lawng hmang in tui chung atang leh hmun hla tak tak atangin balu an phur khawm a, Tuipui hmunah sawn an hralh thin a ni. Sawlai vela chhungkaw tam zawk eizawna chu balu lak a ni a. Tin, sawlai luipui saw eizawn nan an hmang nasa viau a. Chutiang balu lak mai ni lo chuan Tuipui chhak lam ah khian phaizawl hmun tha tak tak te a awm ve a, chungah chuan thlai chi hrang hrang an ching ve a ni. Tam tak te phei chuan zikhlum te leh thil dang dang an ching a. Hnahthial te leh Tuipui khua ami te sawn eizawn nan hian an hmang nasa a ni. Min dil thin a, “Lawnga kan phurh khawm hi chuan a awlsam deuh thin a. Chhipa phurh theih a ni si lova. Heti laia Tiau suar lo awm thin hian lawng kal a ti bahlah thin a. Chuvangin heng ho te hi min han tih kian sak ula chuan eizawna tha tak kan nei ang” tiin chhungkaw tam tak sawn min ngen thin a. Amaherawhchu, sum hlawm te a lo len ve deuh avangin kan tih sak hlei thei lo a ni. Chumi avang chuan Tiau leh Chhimtuipui infin hnu ah phei chuan a tui hi a rawn lian thla hle tawh a. Sorkarin chak taka hma a lak a, kal thei tur zawnga a duan theih chuan Mizoramah na na na chuan navigable rivers a siam awl pawl tak a nih a rinawm a ni.

Tin, nichina Tuipang bialtu zahawm takin a rawn sawi ang khan khu lam atanga lo kal chhoh theihna tur sawn lawng kal theihna tur in a duan chhoh theih bawk in a lang a. Chutiang anga hma lak a nih chuan nasa takin sawlai bial sawn a hmang tangkai dawn a. Hemi ram chung mipui tena kan hman tangkai tur atana tih a nih chuan zawl tam tak saw eizawna atan min an la hmang thei dawn a. Tin, Tuiphai lui leh khatiang chho zawng zawng pawh kha sawlaih sawn lawng kal theiha kan tih chuan hla lua awm lovin hmun hla tak takah an va in virh thei dawn a. Sawlai pawh saw, heng Tuichawng te tih rual hian telh ve leh theih ni se a lawmawm hle ang a. Tin, chutih rualin chhim lamah bawk, Khawthlang Tuipui khu lawng kal theiha siam atan chuan a tha hle a. A bial mipui chhawr tu tur an tam a, economics thilah pawh nasa tak a tangkai theih tur niin a lang a ni. Chumi a nih avang chuan kan han tarlan mai bakah pawh sawlamah sawn sorkar hian hma la sela, Chhimtuipui leh Khawthlang tuipuiah te hma lak ve theih ni sela a thain ka ring a. Chuvangin he resolution Inland Water Transport hi Mizoram mipuitan chak takin hma la zel ten tangkai zawka kan hman theih na Sorkarin se tih ka rawn thlawp pahin sawlamah pawh hma la turin ka rawn ngen nghal a ni e, ka lawm e.

DEPUTY SPEAKER : Pu Joseph Lalhimpua, a dawtah Pu Rinmawia.

Pu JOSEPH LALHIMPUA : Pu Dy. Speaker, ka lawm e. Resolution support zawngin tawite, kan sorkar leh a changtu Minister hnenah lawmthu sawina han tar lan ka duh a. Kan Chief Minister hovin Lunglei High Power Committee kan thukhawm thin a, kan thutkhawm tum hnihna ah Mizorama Missionary hmasa Pu Buanga leh Sap Upa te an lo kal chhohna leh hun hmasa lama inkal pawhna bakah insumdawn tawna atana kan hmun pawimawh tak mai Tuichawng lui Inland Water Transport siam turin High Powered Committee-in a passed tawh a. Chutah chuan kan Minister zahawm tak hnenah pawh hian lehkha

vawihnih/vawithum ka theh lut tawh a, sawi pawh kan sawipui tawh a. Tun tumah resolution sawifiahna leh sawi zaunaah sorkar in hma a lak mek thu leh hemi hma la tur hian pawn lampang mi, mithiam te ruai turin sorkarin phalna a pe tawh a ni tih te kan hria a, a lawmawm hlein ka hria. Kan hotute thlazar hnuaia Lunglei District hmasawna tur atana High Powered Committee enkawltu ka nih ve na zawnah pawh kan hotute thurel tihhlawhtlinna vawiinah hian kan hmuin ka hria a. A lawmawm hlein ka hria a, thutiam tihhlawhtlinna kan hmuh avangin lawmthu ka'n han sawi hmasa a ni.

Pu Dy. Speaker, Tuichawng lui chungchang hi tam tak sawi ka tum lova, amaherawhchu, kan sorkarin hma a lak mekna pakhat Border Trade chungchangah Tlabung Border trade hi a bik takin Lunglei leh chhim lam in kan vei leh kan ngaih pawimawh a ni a. Hemi atan pawh hian thil tangkai tak tur pawh a ni a. Sawhthing te, Mau te leh thil chi hrang hrangte tunah pawh mumal taka la indawrna awm lo mahsela, mamawhna a san avangin barter system ang deuhin, pawisa hmang tho bawk siin motor tam tak phur Tlabungah sawn phurh thlak reng a ni a, phurh luh reng a ni bawk a. Chumi atan chuan Tuichawng lui leh a fintu De luite lawng kal theiha siam a nih chuan ka man leh thil phurh man nasa takin a tlahniam dawn a ni. Kan Minister zahawm tak khan Sairang luiah pawh Quintal 50 atanga 100 phur thei lawng ka tir thuai tur anih thu a sawi phei kha chuan, hetiang hi alo puitlin hunah chuan Lunglei leh Tlabung inkar pawh hi bungraw phurh man nasa takin a tla hniam ngei dawn niin a lang a, a nghakhlelhawm tawh hle in ka hria a ni. Chuvang chuan he resolution tha tak mai member zahawm tak Pu Selthuama'n a put luh hi ka support a, chhimlampang a hmalakna a awm dawn avangin lawmthu ka sawi a ni.

Pu LALRINMAWIA RALTE : Pu Deputy Speaker, he resolution "Inland Water Transport hi kan state-ah tangkai leh zuala kan hman theih nan kan sorkar in chak takin hma la rawh se" tih ka support na thu sawi tura hun min pek avangin a hmasa in lawmthu ka sawi duh a ni.

Inland Water Transport hi a pawimawhzia kan hre theuh ang a, sawi nawn a ngai lo ang a. Kan zirlaiah te kan zir thin a. India ramah hian National Water Ways han tih ang tak hi chu keini chuan kan nei thei lova. National Water Way atana puan an tum hnuhnun ber Tuiruang khu an puang ta em? Parliament Bill-a luh kha chu kum hnih kal ta vel a ni a, an puang tawh turah ngai ila. Tuiruang hi National Water Ways a telh a nih phei chuan Tuiruang-a in chhung lut lui lian pangngai ve tak hi kan ngah a ni. Hei hi chhut uluk ngai viau in ka hria a, Tuiruang-a in bun ruak thla ho lui te hi tun aia tangkai zawka kan hman theih a tul hle in ka hria a ni. A move tu khan thlarau lam rim nam deuh khan a rawn move a, a ropui khawp a, ka lo ngaihtuah chhonzawm a ni. Kan fakna hla ah te pawh hian chunglam airport, bus station, rel station kan ti ngai lova; mahse, Lawng chawlhna Jerusalem te kan ti a thlarau lam thilah hian lawng lam hi kan uar phian mai si. Mahse kan nitin nunah hian lawng hian kan rilru a dek na lo khawp mai. Keini naupang te te pawhin kan hriat ve phakah khung Teirei dung ah te, Tut dung ah te vai ho sumdawng thuk tak tak in an lo lut a, an lawng kaih kul te nen. Naupang te pawh thlai leh hmarcha te phurin thalah an lawngkaih kul ah kan zu kal thin a ni.

Tunah erawh chuan kan mithiamte sawi ang leh mitinin kan hriat angin kan lui tuite a lo pan ta em em a. A changtu Minister zahawm takin a sawi ang khan luiah bawlhhlawh leh lei inchhek lut te a tam luat tuk avangin kan lui tui a tlem ta hrim hrim ai mahin a hnawk nasat lutuk avang te pawh ni mah mahin a lang a. Rainfall lam teh tuten an teh naah hian kan ruahtui tla hi a tlem ta tih kan la hre chuang lova. Chuvang chuan Central sorkar puihnaa kan luidung te kan siamthat hi a pawimawh em em a. Hemi chungchanga state in hma a lak dan turah pawh hian keimahni state sorkar sum leh pai leh kan theihna ngawt chuan thui tak a thleng zo lo mai thei a. Amaheawhchu, Central sorkarin tunhmaa C.S.S. an neih thin, North Eastern State te tana cent percent grant a pek thin ang kha, state dangah 90:10 te a pek thin ang kha a tawp daih tawh a. Keini North East-ah erawh chuan ka hriat soal loh chuan cent percent grant-in kan la hmu thei bik a ni a, Sikkim telin. Chuvang chuan, Inland Water Ways develop tur hian India hmar chhak state te hian chance kan nei tha bik a ni. Chuvang chuan a luidung siam that thu a ni emaw, kawng dang danga lawng kal theiha buatsaih a nihna chungchangah hian state dangte ai chuan chance kan nei a.

Ka sawi tak ang khan khulaiah Tuiruang kan nei a, Tuiruang-in Bangladesh a thlen dawn hnaiah chuan Karimganj khua a awm a. Khawthlang lam bial chuan Karimganj chu kan hnaih viau a, Aizawl velah pawh kan hre viau a ni, Mistiri pawh an lo chhuah teuh hi. Hemi Karimganj hmun hi Tuiruangah khuan Bangladesh leh India sorkar in Protocol on Inland Water Transit and Trade an tihah hian Port of Call pakhata an ruat ve a ni a. Ram pakhatah lawng chawlhna pali ve ve ruat nise an ti a. Chumi zingah chuan Karimganj khu insumdawn tawna tura lawng chawlhna hmun pawimawh a ni a. Chubakah chuan Protocol route an tihah hian Kolkatta- Karimganj-Kolkatta hi Bangladesh kal tlang phal sa reng a ni a. Kan lawng ve ve te hi mi rama kal phalna, inremna kan lo neih sa avangin. Khu khu lawngchawlhna niin Kolkatta lawng chawlhna thlengin Bangladesh paltlangin a luh thlak theih a. Chhim lama Sittwe lawng chawlhna kan tih thin ang deuh bawh hian Hmar lamah hian a nihna takah chuan lawng chawlh hmun hman tangkai theih sa reng, Bangladesh sorkar nen pawha inremna awmsa reng, chumi atana thil pawimawh tak lawng chawlh hmun, lawng han inhun khawmna tur atan pawha Central Sorkar in a puan sa hmun pali kan neih zinga pakhat Karimganj kha kan hnaih em em a ni. Chuvang chuan, helai hi kan Minister zahawm tak leh a department pawhin an tuipui in, theihtawpa hma an lakna hi a lawmawm hle a, chak lehzuala hmalak nisela. Luidung that em em na chu “Flight Cancel tihte leh leimin in kawng a hnawh” tih vel, kan buai vanglai tak hunah hian chuan lui kawng chu a tha sauh mai a ni, alternative route tha lutuk a ni a.

Kan constituency te khu ka chhut thin a, khaw 31 ah khuan khaw 15 khu lui kamah an awm a ni, lui kam tak takah. Kan Deputy Speaker zahawm tak bialah ngei pawh khaw engemawzat lui kam sek sekah an awm a ni. Constituency theuh hi enchiang theuh ila, a tak taka kalpui a nih a, nichina Aizawl West – I bialtu zahawm takin arawn sawi ang khan, lawng te hi subsidy-a pek ve theih dan te hi chu awm thei se a tha awm mang e aw a tih theih a. Tunhma kha chuan Inland Vessel Building Subsidy Scheme a awm thin, chutah chuan Central sorkarin 30% an subsidized thin a, hei hi tunah chuan a tawp tawh bawh si a. State sorkar atangin emaw, NEC atangin emaw, kan mithiam ten han ngaihtuah se tihdan a awm thei ang em aw tih hi ngaihtuahna-ah chuan a awm

ve a ni. Inter County Trade atana Port of Call Karimganj kha kan mitthla in hmu ta ilar, map-ah te han en ta ilar, Mizoram hmar chan area, hmar lam zawnga luipui in leih baw zawng zawng, Tuiruang Barak-a luanglut thla zawng zawng hi chuan nasa takin Inland Water Ways atang hian bungraw phurhna kawng awlsam tak, tha tak kan nei thei a, hmasawna tha tak kan hmuchhuak thei a ni tih hi a chiangin ka hria a. Chuvang chuan, he resolution lo lut hi kan Minister zahawmtak leh a department ten theitawp an lo chhuah tawhna niin, kan ram hmasawna atan te, NLUP hnuaiyah luipui kamah kan lut nasa zual dawnin a lang a. Rubber Plantation a ni emaw, Oil Palm a ni emaw, thildang tam tak, Agriculture leh Allied Sector-ah pawh luipui ruam zelah, kan water ways hnaih zelah kan tawlh thla zel dawn a ni a. Hengte hi tihchangtlun a lo nih a, sorkarin nasa taka a ngaihtuah a tihchangtlun a nih chhoh chuan transportation kan buaina, tlangram kan nih avangin fur ah, (a kawngpui chhuat chu engang pawn tha se a chhak lam ko a rawn chim theih reng baw si avangin) a thlakna, tlantauhna tur engemaw kan siam hi chu a ngai a ni tih hi fur tin kan tawn hriat a ni a. Chuvang chuan he resolution hi lawmawm ka ti a, Inland Water Transport hi kan State-ah tangkai leh zuala kan hman theih nan kan Sorkarin chak takin hma la rawh se, tih hi tha ka ti a, ka support-na thu ka'n sawi a ni e. Pu Deputy Speaker, ka lawm e.

DEPUTY SPEAKER : Pu C. Ramhluna

Pu C. RAMHLUNA : Pu R. Selthuama Resolution, “Inland Water Transport hi kan State-ah tangkai leh zuala kan hman theih nan kan Sorkarin chak takin hma la rawh se”, tih thlawp hian tlem han sawi ve ka duh a. Ka hma amiten an sawi tak ang khan, a mover hian a rawn move tha khawp mai a, thlarau lam nen khan a rawn chawhpawlh a, khatiang khan ka lo chhut ngai lova, a tha ka ti riau mai a, kan missionary te lo chhuahna kawng a lo ni reng mai a. William Williams-a kha 189-ah a lo chhuak a, Chanchin Tha kha reilo te a rawn hril a, A hnuah Sap Upa leh Pu Buanga-te khan 1894 January ni 11 ah Sairang an rawn thleng ve leh ta a. Kum 3 vel rawng an bawl a, anni kha Mizorama missionary hmasa ber tia kan hriat leh kan pawm tlan hmasa ber te an ni a. Anni hian Mizoram tan nasa takin an thawk a, A A W B, (kan A B C kan ti mai ang chu) te min siam sak a, zirna lamah nasa takin hman an la a. An sawi tak ang khan an mahni avangin Chanchin Tha kan hmu a, tichuan Upa nihna kan lo chang ve thei te hi a lawmawm hlein ka hria a. A rawn move thiam hlein ka hria a, chuvang chuan Inland Water Supply route hi Mizoram tan Chanchin Tha rawn thlentlu leh Mizoramah pawh development rawn thlen hmasatu te zing ami a lo ni reng a ni tih ka hria a, kan ngaihtuah a, ropui ka ti khawp mai a, chuvang chuan han support pawh kha nuam ka ti leh zual a. Tin chubakah chuan kan Minister zahawm tak khan department-in hman an lak dante a sawi a, a ngaihnaawm ka ti khawp mai a. Kum hnih khat lek chhunga khatiang taka hman an lo la hman kha a lawmawm ka ti a.

Tin, chumi rual chuan an tih theihna pakhat kha Government of India-in 2007-2008 atang chuan Inland Water Transport hi state dangah chuan, hmun dangah chuan an ti tawp titih tawh a. North-East ah hian an in concentrate ta a ni. Chuvang chuan, ka hma a mi in a sawi ang khan North-Eastern State ho hian Inland Water Transport ah hian opportunity kan nei tha ta em em mai a. Hei hi advantage an la thiam hlein ka hria a, a lawmawm ka ti a. Tunhma zawng zawnga PWD hovin an

enkawl laia cheng nuai li, nuai nga, nuai sawm te a ni mai awm mang e tih ang te tea hna an lo thawh kha tunah chuan a nuai za telin, nuai 500, 600 telin hma kan la thei ta hi a lawmawm hlein ka hria a. A hlawkna leh a thatna tur an sawi zawng zawng te kha a ropui ka ti a. Chuvang chuan lawmthu ka han sawi a ni.

Chu bakah chuan hei hi kan state hian nasa taka advantage kan lak theihna a nihna chhan tur pakhat chu a funding hi 100% Centrally Sponsored a ni tlat a. Centrally Sponsored Scheme hi department thenkhatah chuan 90% kha Govt. of India-in a tum a, 10% kha state sawkarin a matching a pek ve thin te kha a ni a. Nimahselangin, Govt. of India-in, Ministry of Shipping hian hei hi a ngai pawimawh em em mai a, chuvang chuan 100% in tunah hian a fund hi a pe a ni. Kan hman tangkai thiam a, a project te, a scheme te kan siam thiam a nih phawt chuan nasa taka hei hi advantage kan lak theihna tur a ni tih kan hre theuh a. A lawmawm hlein ka hria a ni.

Tlawngluia hna an lo thawh dan zawng zawngte kha kan hria a, lawmawm ka ti khawp a. Khami rual khan, nichina an sawi tak ang khan mahni bial lampang te a ni bawk a, chhim lam ah hma min lakpui ve deuh sela a thain ka hria a.

Pu P.P. Thawla member zahawm tak khan a rawn sawi tawh nghe nghe a, Chhimtuipui kha kan sawi tawh a, khami kha chu a hre hle tawhin ka hria a, a chhinchhiahin ka hria a, kha kha hma min laksak se thain ka hria a. Salachhuah-ah Burma ram thlengin a kal theih a, Burma ram chhungah pawh a han kal theih a, hemi atang khan tunah pawh hian Hruitezawlah vawkte an rawn trip chho va, Dangpuithute an rawn trip chho a, thildangte an rawn trip chho a, sawng ho saw Lawngtlaiah te, Lunglei thleng thlengin an phur chhuakchho a ni. Chuvang chuan sawilai saw engtiklai pawha lawng kal theih na tur atan min buatsaih sak tul hlein ka hria a. Chumi rual chuan luite deuh pakhat min chhinchhiahsak sela a thain ka hria a, an han sawi takah khan hmar lampang lui deuh vek mai kha an han chhinchhiah khan ka hria a. Sawlam pang saw Mizoram ve tho a ni a, min chhinchhiah sak se kan tihve chu, Sekulh luiah sawn (Deputy Speaker : Ngawi lawk rawh u, kan chawhma hun a tawp a, dar 1:00 a ni tawh a, kan chawlh a hun tawh a. Ani hian sawi zo lawk sela, hun pek belh lawk ang aw).

Pu C.RAMHLUNA : Ka lawm e, Pu Deputy Speaker. Sekulh lui saw lui lian vak lo a ni a, Power Department kha ka request a, Mini Hydel Project min ngaihtuah sak teh u, ka ti a. Tunah hian survey te pawh an take-up tawhin ka hria a. Hmawngbuchhuah atanga Varang Zochachhuah thleng. Hmanni khan kan Health Minister phei chu a zuk kal tawh nghe nghe in ka hria a Zochachhuahah khan, a hrechiang viauin ka ring a. Sawmi saw Hmawngbuchhuah thleng in lawng a rawn kal thei a, engine boat kha. Sawlai saw tlema han improve deuh a, han develop deuh chuan nasa taka tangkaia hman theih tur a ni a. Sekulh lui dung saw min hriatpui sela a tha in ka hria a. Tin, nichinah khan an sawi tawh a, Khawthlang tuipui hi lui lian a ni a, hei hi nasa taka tangkaia kan hman theih tur a ni a. Tlabung market a tha a, Bangladesh atanga thil lo kal chho kha Tlabung-ah market tha tak a awm a. Chumi atang chuan Lunglei-ah a phurh chhoh theih zung zung bawk si a, hei hi min ngaih pawimawh sak sela a tha in ka hria a.

Chubakah chuan Khawthlangtupui rawn fintu Chakma boundary, Chakma leh Bangladesh inkar Kawrpui dung saw tangkai taka hman theih tur niin ka hria a. MLA zahawm tak Pu Nirupam Chakma hian kei ai hian a hrechiang zawk mai thei a. He lui dung pawh hi siamthat theih a ni a, han develop sela chuan Tuichawng tluk deuh thaw a lian a ni a. Hei hian Chakma ram kha nasa deuhin a chawm thei dawnin ka hria a, Bangladesh atang thil lo kal chho khan. Chuvang chuan, heng lui dungte pawh hi kan Minister zahawm tak hian min chhinchhiah sak sela a tha in ka hria a. Chu chu vawiinah hian ka han pu lut duh bawka ni.

Kan ram hi kan hria a, ram chhengchhia, tlangram a ni a. Kan transport system hi tunah rih chuan kawng a ni mai a, road transport hi ani a. Kawng a tha lo a, duh angin thil kan phur thei lo tih pawh kan hria a. Tin, ruah tui a tam a, kawng chhia leh kawng min a tam a, leimin a lo awm chang chuan ni 2 ni 3 te truck pawh kawng lakah an awm a ngai a, a costly em em mai a. Water Transport a hi kan develop that phawt chuan kan ramah hian kan transport system awl zawk leh tlawm zawkin hi kan inphur thei dawn niin a lang a. A operating cause hi a tlawm a, fuel/P.O.L consumption hi a tlawm a, tui a tam chuan a kawng smooth tha a, chuvangchuan, a economical em em a ni tih kha kan hria a. Chu bakah chuan luidungah chuan environmental pollution hi a tlem tlat a. Hei hi khawvel ram pum pui pawhin an hriat leh an hmuh a ni a. Tin, chubakah chuan a that lehna em em pakhat chu tui kha a awm ta reng mai a, nichina kan sawi tak ang khan kawng a chhiat pawhin tui kha chu a awm reng mai a. Thlawhtheihna a thlawh theih loh pawhin tui kha chu a awm reng mai a. Chuvangchuan, englai pawh mai khan lawng kha chu a kal thei reng mai a ni a. Chu chu a thatna em em a ni a. Nimahsela, a harsatna ve thung chu Mizoramah chuan kan Minister zahawm takin a sawi tak ang khan kan rama kan lui kam te hi kan ti chereu ta lutuk a, chuvangchuan, siltation hi a nasa a, hemi avang hian luidung hi nasa taka kan ven ngun a ngai ang a, lawng a kal theih reng na tur atana kan ven ngun a ngai dawn a. Khami kha a problem tur chu a ni dawn a ni tih kan hria a ni. Chuti chung chung chuan Pu Deputy Speaker, he Inland Water Transport hi kan state-ah hian tangkai leh zual a kan hman theih nan sorkar in hma a lo lak tawh lai reng hi chak leh zual zawk leh darh zau leh zual zawka Mizoram pumpui huapa hma an lak theihna turin ka han ngenin ka dil duh bawka a ni e. Pu Deputy Speaker, ka lawm e.

DEPUTY SPEAKER : Awle, kan chawhma hun a lo tawp a. Dar khat a ni a, kan chawl ang a, dar 2-ah chawhnu lam hun kan hmang leh dawn nia.

2:00 P.M.

SPEAKER : A mover telin 10 in kan sawi tawh a, sawi leh zel pawh a ngai em ni? Tha kan ti viau a, tha kan tih kha sawi tul kan ti deuh a nih loh chuan. Pu Lalrobiaka, vawiin chawhnu alo kal theih loh thu min rawn hrilh a, a P.A Pi Thanchhungi vui a ngai a, tin, Pu Lalthanzara hi a bial a nih avangin phai atanga a ruang lo thlen hma atangin lo awm a duh a, min rawn dil bawka a, tunah sawi turin Pu Nirupam Chakma.

Pu NIRUPAM CHAKMA : Pu Speaker, thusawina hun min pek avangin ka lawm e. Private member resolution member zahawm tak Pu R.Selthuaman zing lama a move tawh, “Inland Water Transport hi kan State-a tangkai lehzuala kan hman theih nan kan sawrkarin chak takin hma la rawh se” tih hi support ka duh a. Inland Water Transport hi Western belt-ah chuan an lifeline a ni. A taka experience tu ka ni a, tun thlengin, kumin thlengin kan lifeline tak tak a ni a. Kan bialah member zahawm tak ten an hre lo mai thei a, Chawngte atangin Vaseikai thlengin motor kawng PMGSY road, la blacktop loh anih avangin fur lai chuan a kal theih loh a, chuvangchuan member zahawm tak Pu Ramhluna bialte, kan bialte khaw tam tak inkal pawhna atan, sumdawng tan communication leh goods lakluh na atan, Inland Water Transport hmangin Pu Speaker, tunah chuan kan changkang tawh a, speed boat kan hmang tawh a ni. Speed boat pakhat ah mi 60 te, 80 te a kal theih a, bungrua tam tak phurh theih a ni. Vaseikai bulah lengkir pakhat a awm a, blasting hmangin,

(SPEAKER : Blasting hmangin ti ta ila Parva a thleng thei dawn tihna em ni ?)

Pu NIRUPAM CHAKMA : Vaseikai atangin Parva chu a thleng thei. (**SPEAKER :** Mahse lengkir kha a awm a). Lengkir kha kan destroy theih chuan Parva thleng a through a ni mai. A sang vaklo a, Tuichawng lui ah lawngte chu a kal thei. Mahse lawngte chu labour hmangin an kal thin a, chuvang chuan Tlabung atangin Parva thleng kal theihna tur in hmun pakhat chiahin min dal a ni. (Speech not corrected)

(SPEAKER : A nih Theka ah khuan a kal tho em ?)

Pu NIRUPAM CHAKMA : Theka lui pawh tunah kan hmang tho a. Mahse Theka te, Sachek te, Haryna te chu border fencing vangin kan buai a, tunhma angin kan hmang thei dawn lova. Ka sawi duh pakhat chu Bangladesh Border Trade tuna ruahman mek hi Khawtlanguipui Kanafuli hi a hman tangkai theih a, Tuichawng finna ani a, (Speaker- Tuichawngin Kanafulia a fin atanga Demagre thleng khan a tlang tha em ?) Demagre-ah lawng chu a kal thei tho. Tin, Phairuang te thlenga kal theih turin Lungsen bulah lengkir pakhat a awm a, chu chu tihchhiat a nih chuan Phairuang thlengin Tlabung atangin kan kal thei dawn a ni. Nikumah Phairuang lamah ka kal a, Kau te, Phairuang te, De-luite te navigable tho a ni. Mahse Tlabung kal tur chuan lengkir pakhat tihchhiat a ngai.

Pu Speaker, ka sawi duh chu water resources kan ti a, water hi resource a ni. Mizoram kan vanneihna chu luite a tam a, tui te a tam a ni. Mahse tun thlengin kan hmang tangkai vak lo va. Hydrel Project te kan la ti puitling thei silova, nakinah la awm zel turah ngai ila, Kan tui te hi irrigation purpose atan te, thil hrang hrang ah kan hmang thei a. One very very simple proposal hman atangin ka sawi tawh a, mimal leh Department ah te, Mineral water bottling a harsa vak lo a, tui a tam a, Zo Aqua a lo awm te hi ka lawm tak tak a ni. Kan tui a tha si, pawisa siam na kan hre silova. Horina Valley-ah ka zin a, mineral water ka in thin a ni. Diltlang ah pawh mineral water ka in tho, thingtlangah pawh mineral water a awm tho. Non-Mizo officer pakhat Delhi

ami ka la hriat reng chu Aizawl atanga Delhi-a a kal apiangin Mizoram tui bottle in a hawn ziah a ni, a chhan chu Delhi-ah chuan Mizoram tui ang tho Mineral water kha to tak tak in a lei a ngai tho tho a, chuvangin a carton-in a keng lawih zel a ni. Chuvang chuan sorkar ang ah te pawh Industry Department hian mineral water hi siam dan ngaihtuah ila, sum tam tak kan la lut thei dawn a ni. Tin, tuna Inland Water Transport kan develop chhoh zel na ah khan transporation pawh a harsa dawn lova. Lui bulah kan siam ang a, tichuan Inland Water Transport hmangin man tlawm te in kan phur thei dawn a ni.

Chuvang chuan hemi water resources hi pakhatna ah chuan transport atan te, communication atan te, irrigation atan te, indurtry siamna atan te kan hman tangkai theih chuan Mizoram tan chuan hlawkna tam tak kan hmu thei dawn a ni. Chumi bakah Tourism promotion atan te, Tlabungah Tourist Lodge kan nei a, engtik lai pawh a navigable a ni lehnghal a. Tourist Department hian pakhat mah hlawkna kan nei lo, Forest Department-te chuan an nei thei a, SDO-te pawh an nei a. Tourism-ah pakhat mah hlawh kan dah lova, Tourism hian kan mamawh ve a ni tih kha Tourism Minister pawn min hriat sak la.

Tin, Sports promotion atan pawh kan hman tangkai thei a ni, water sports lam te pawh kan develop theih phah ang a. Nichina Pu Lalduhoma rawn sawi security chungchangah te pawh, transportation tak tak atana kan hman theih chuan security te pawh a pawimawh dawn a, entir nan, Inland Water Transport Police ang te kha a ngai dawn a, chutiang tur pawh chuan Home Department lam te pawhin ngaihtuahna nei ila.

Pu Speaker, he resolution hi Mizoram hmasawna thlen tu tur te zinga pawimawh tak a ni a, chuvang chuan member te rilru taka ngaihtuah chungin he Resolution hi passed a tul ang taka min pass sak turin a mimal ang tak pawhin ka ngen duh che u a.

Thil pakhat ka han sawi leh lawk duh chu zing lamah Chhimituipui chungchang an sawi a. Chhimituipui te chu Kolodyne kan khuap ang a, automatically in a awm dawn. Tin, Multi Nodal Transport Project tuna kan kalpui mek te pawh hi nakinah chuan Kawlchaw thlengin Inland Water Transport te pawh siam tur a ni a. Chuvang chuan he tah telh pawh a ngai lo, lo ngaimawh mahse telh hi a tul ka ti lo. Tuichawng chungchangah te hian kan Minister zahawm tak Pu Zoram Sangliana hnenah lawmthu ka sawi duh a. Delhi-ah kan zin dun a, a bengvar em em a, Mizoram House-ah kan thleng a, hemi project kan buaipui lai hian “Tuichawng hi tel rawh se” ka ti a a tel mai asin, lawmthu hi ka sawi lo thei lo a ni e. (Speech not corrected)

SPEAKER : Kan hon’ble member sawi ang khan tuna mipuiin an chhawr tangkai ber chu Tuichawng saw a ni tlat a ni, Pu Lalthansanga.

Pu LALTHANSANGA : Pu Speaker, ka lawm e. I dinglam amite hi ka dinchhuah atangin an lo nui ringawt zel mai a, Pu Duhoma kha pa pakhat khan a hrih sual deuh niin ka hria a, mahse Zarkawt pa Pu K. Lalhluna’n “Chate-a te policy hi a tha ber hian ka hre mai, Bairabi an tih tawh hi chuan

contract hna pawh hi an lo thawk vak lova, a pa rethei deuh zual zual veng tin ami hi an ni vek mai a kha chen sorkar ve a" ! te kha a ti a. Chuvang chuan, eng emaw chenah chuan kan rilru hi a lo luah nasa hle a niang ka ti a. Kan resolution neitu khan kan thlarau nun te nen a rawn sawi pawlh vak mai a, a lo ropui ang reng hle mai a. Vawiinah kan sorkar chak tak hian change kha a sawi nasa hle mai a. America inthlan lai ang deuh hlek khan rilru ah a rawn lang a, inthlan hma kha chuan kan ngaihtuah thin a, enge change a awmna tur ni ang aw ! te kan ti a.

Vawiina kan resolution ah hian change hi tlem chu a awm deuh niin ka hria a. Khuti lai Tlawng lui khu khatiang tak maia a pawimawhna lai kan member pui zahawm tak takte, kan Minister zahawm tak tak ten an rawn sawi a, a tulna te. He lui dung hi Mizorama lui kan neih ah chuan a dung sei ber leh Mizoram hawlh tlang thui ber lui a nih zia te kan han hre tlang kha a lawmawm in ka hria a. 1979 PC Sorkar atang khan Mizoram-ah nasa tak in economic revolution lo thlenna tur atana pawimawh ber, tha chak ber tura kan ngaih Hydrel project siam chhuahna tur atan kan lo beih nasat em em a kha a ni a, vawiin ah khami han sawi thlen pawh khan in ngaihtuahna kha a kal deuh ruakin ka ring, a pawimawh dante kha chu kan hre nghal mai a.

Hei hi tuna kan han tih danah pheih hi chuan Lunglei District lampang tan pheih chuan a bei tham awm mang e aw ka ti deuh a. A chhan chu mega watt 164 vel pe chhuak thei tur anga khuah a nih kha chuan Pukupui dai thleng khan vessel craft, kan Minister zahawm takin a sawi ang chi lawngleng quintal 50-100 vel phur kha a kal thei dawn a ni. Chu chu Bairabiah rel station atangin crane lian khan bungrua a han dah ang a, Sairang-ah han kal chho tura hisap kha a ni a. Chumi anga kan lo mitthla na ah chuan hei hi multi purpose project atan tiin chu multi purpose project pakhat atana ngaihtuah na ah chuan Inland Water Way New Transport system hi a ni ta a ni. Chumi ti tur chuan PC Sorkar khan 1981 ah khan Inter Continental Maritime Consultancy hi ruai in DPR siam turin Mizoram ah, Aizawl ah chah luh an ni ta a. Anni ho khan khatih hunlai kha chuan Aizawl khawpui velah motor kal dan leh thil phurh dan vel zawng zawng kha uluk takin an record a. He Inter Continental Maritime Consultancy hi India ram mai piah lamah Asia khawmualpui ah pawh lar ve tak mai an ni a, chu chuan he project hi uluk tak maiin a siam a. Tichuan kum 1981 atanga kum 1983 inkar khan a peih ta a. Chu a report chu Ministry of Shipping and Transport ah an theh lut nghe nghe a ni. Lehkha bu lian tak tham ani a. Chuta an ziah ah chuan pawimawh em em mai an tarlan pakhat chu, he Tlawng lui hi khuah ni ta se Bairabi ah hian, kum 8 chhung hian a khuah man senso hi bungrua phurh luh nan leh phurh chhuah na atana Mizorama thil man a lo tlak hniam na tur leh Mizoram atanga kut hnathawktu te thar chhuah, an thawn na man tlawm zawk a transportation a an thawn thlak na tur atana senso tlem na atanga chhut chuan kum 8 chhungin Hydrel Project siam na nilo khan Inland Water Transport atan hian tih ni ta se, kum 8 chhungin hei hian a khuah man a tum thei a ni tiin remark an pe nghe nghe a ni. Chutiang tak mai chuan he lui dung hi a pawimawh na an rawn sawi a ni a. An chairman pawh hi Admiral Nanda Sawi, Indian Navy Chief retired kha a ni a. Chutiang chuan kan ngaihtuah na hi a rei tawh hle mai a, a thlarau lam zawng hi chuan kan lo hre lo na a, thlarau lam zawng pheih chuan lo hria ila chuan Pu Duhoma te kan chhun ang a, thil sawi thiam

viau pawh PC Party pawh kha kan lo ni ve tur a ni a. Khatiang zawng ringawt khan kan lo ngaihtuah a, a tawpah phei chuan Bairabi Hydel Project-a te, Bairabi-a te ang khan kan than phah hial a. Chuvang chuan tuna kan sorkar chak tak hian hetiang change tlem a rawn nei hi a lawmawm hle in ka hria. Tunah te pawh kan hriat ang khan harsatna eng eng nge, hel ang deuh te pawh in buaina te pawh an thlen a ni a. Mizoram chu most peaceful state kan tih rual hian khatiang han awm te kan Minister ngeiin a sawi te pawh kha pawl ka ti hle mai a.

Tin, chumi piah lamah chuan he project han titu EIRI te hi an fakawm hle in ka hria a. Hetiang project Central Sorkar pawhin a pawm theih khawp siam thei company te kan han nei a, chumi rualin kan minister pawh in bawh zui a, a hlawhtlinna kan han hmu te hi a lawmawm ka ti a. Chumi rual chuan RITES-ho kan hmang dawn hmun dangah a han ti leh mai a, khatiang anih kha chuan RITES ho kha hmang leh ta se, a hma thil kha alo danglam leh si ang a, kan project neih tur leh a dang dang kan han tih te kha khuti lamah an lo pawm leh lo ang a, harsatna kan tawh ang tih hi a hlauhawm hle in ka hria a. Chuvang in Central sorkar pawh in min pawm sak tawh leh an rin ngam hi hman zawm zel theih dan te awm sela chu kan beiseina, kan duhna kan rawn thlen zawng zawng te kha tun aiin a chak zawk hian a rinawm a. Chumi anih loh chuan heng hi in ti leh lo a ti hian kan hun hlu tak hi kan liam pui leh mai ang tih ka'n hlau deuh a, chu chu hemi survey investigation project report buaipuitu chungchang ah hian ka'n sawi lang ve leh duh a.

Security lampang leh eng eng emaw kan han sawi kha a dik hlein ka hria a. Hemi chungchangah hian hei kan ram hi kan han ti a, a tawp ah kan buai hlui a. Buaina awm tawh hnuah sorkar hian tan ala chauh zel thin a. Chuvang chuan Department hrang hrang te pawh hi in rawn khawmin tunah pawh hman tan a ni a. Hman mek a nihna ah te, kan riverine area kan tih chereu nasa lutuk te pawh hi tui tlem lai ber a han teh a 4ft kha 3ft a an tla te hi mau mahal te pawh hi kan pe tawh lo e ti mah ila, a chhuak thla ruih ruih tho mai a. Tin, chu bakah thing te pawh hi an ti nasa hlein ka hre deuh a. Hei hi kan Forest Minister hian en ngun deuh se tha in ka hria a. Tunlai phei chu Thlanvawng te pawh mau hnuaiah khuan an dah ten tun e, an ti a. "Lo kal la, thla te rawn la teh" an ti hial a. Chutiang chuan Thlanvawng te pawh an trip thla nguah nguah ni in a lang a. Kan phallo chung pawhin khatiang khan an rawn ti a ni a.

Tin, Karimganj lam kan tih rual khan hei pawh hi EIRI hian an ti deuh ni in ka hria a. DPR hi an buaipui deuh niin ka hria a. Member zahawm takin a rawn sawi ang khan khutilai khu inter country port ah an puang e tih an sawi rual khan khatiang ang khawp a nih kha chuan khulai rawn connect tu khu kan tan hian a chhawr naawm awm mang e aw, tih kha ka'n sawi duh a. He resolution hi a tha hlein ka hria a. Tun aia nasa maha hmalak hi ni thei se tih kha support pahin ka'n sawi a ni e. Ka lawm e.

SPEAKER : Sawi tur kan awm tawh lo maw ? Buk dawn tawh mai ang aw, Awle, sawi tur kan awm tawh lo a ni ang e. Tha kan ti tlang a, against zawnga sawi kan awm miah lova, Dr R.Lalthangliana i lo ko ang.

Dr. R. LALTHANGLIANA : Pu Speaker, ka lawm e. Tunlai khawvelah hian thil ngaihtuah tur tam tak a awm chho ve zel a, kan naupan lai te kha chuan thil tih hi a awlsam em em mai a. Motor pawh a awm mang lova, Scooter tihte pawh a awm mang lova. Cycle in kan kal mai a, petrol leh diesel senso ngai lovin awlsam tein kan kal mai. Tunlaih chuan school naupang takngial pawh in an school kalnaah scooty emaw thil dang emaw an ngaihtuah a, thil a hautak chho zel a. Transport system ah hian air transport te a lo awm a, a expensive em em mai a. Road transport pawh a expensive em em bawk a, senso a tam em em. Vawiin a kan resolution in a kawh ber erawh hi chu cheapest means of transport te pawh a ni awm e, a tlawm ber chi a lo ni bawk a, kawng leh lam ah chuan sorkar in hmalakna ah kan neih ngei ngei tur chi niin ka hria a. Petrol leh diesel te a to em em mai a, khatiang kawng awlsam zawng kan nei thei tur hi thil tha tak ni thei tur ah ka ngai a, chu chu ka han sawi duh a.

Tin, Pu Speaker, lui thenkhat chawhma lam khan sawi deuh a awm a, PWD kut tih te pawh kha kan state sorkar thu vek tho a ni a, a tul kan tih chuan tih theihloh tur a awm dawn emaw ni ka ti a. Thil tha tak tur a nih hi chuan keimahni state in kan control department vek tho a ni a, thil tha tur ah chuan tlang deuh hian tih dan ngaituah ila. Entirnan, Lunglei District ah te chuan De te saw lui lian vak silo mahse tangkai deuh mai, ram tha em em mai, potential a ni a, zikhlum pawh hi hlum khat te pawh kg.7/8 te a ni thei a, chutiang tha tak tak kan neih na, kan zuk explore pawh theih si loh te kha ngaihtuahna ah chuan a awm hle mai a. Thil pakhat pawimawh tak mai chu a lui dung bik lai a kan han tih khan, a lui dung lam atanga a surface khawmual atanga pawhna tur kawng lam hi engtinng provision fel tak kan siam tih te pawh ngaihtuah a ngai viau mai a. Tlang sang lama cheng te kan lo ni a, lui khan a pawh vek bik lohna laiah khan uluk deuha kan en a kan ngaihtuah chu a ngai ka ti a, chulai chu in hrilhfiah theih dan kawng te awm sela a that ka ring deuh a, hei hian thil tamtak a keng tlat. Nichina kan ngaihthlak tak ang khan tourism te pawh a keng tel a ni tih kha a dik ka ring e, Mizo hi a tlangpuiin tunhma kan pi leh pu hun lai atangin tlangmi kan nih ang deuh in tlangchipa awm hi nuam kan ti a, tunah chuan a ni vak bik ta lo zawk a, eizawna awlsam tur ah hi chuan kan pan ta rawk rawk zawk a. Hei hi a trend kalphung thar ve deuh te pawh niin a lang a. Kawng leh lamah hei hian kan eizawna engemawchen chu a sawi danglam thei awm mang e aw ka ti deuh a, chu chu uluk taka kan ngaihtuah a tulna lai tak te pawh niin ka'n hria a. Ka sawi duh lai chu surface lam atanga a lui lam pawhna tur kha ruahmanna fel tak kan siam a tul in ka hria a, chu chu ka'n tarlan duh a ni a. Tin, chumi rualin vawiin-a kan resolution kan sawi lai hian a lui kam lam leh hnai vai ami nilo ho hian min thik ang em te ka ti a. Aizawl khawpui te ka ngaihtuah a, Lunglei khawpui kawngte leh Mizoram hmun hrang hrang kan kawngte, kumin hi furtui te pawh a tla hma nge ka hre lo va, kawng hi a chhe em em vek mai a. Helai hi Transport lam nen chuan a in connect lo na a. Ama'rawhchu, in kal pawhna lam han sawi rual hian a chhe lutuk a. News-ah te leh Chanchin thar kan han hriat tam ber, tunlai phei chuan a ni mai awm mang e. YMA pawh hian PWD pawh an pun tawh lo. Anmahni tih vek tur emaw an ti tawh a tih khawp hian Mizoram hmun hrang hrangah tan kan la tlang a. Hei hi kawng lehlamah sorkar hmel lanna pawimawh tak a tlin ve bawk si avang hian kan CM zahawm tak chanvo lampang a ni bawk a, ngaihtuahna enggemaw deuh hi chu kan sen a va tul em, tih hi ka'n sawi tel duh a ni. Kha kha kan kamkeu lawk deuh a ni. Chuvang chuan a tha hrim hrimin ka hria a, hetia kan tih tlang chhoh mai hi a tul in ka hria a, ka'n tarlang ve zawk duh a ni. Ka lawm e.

*Speech not corrected

SPEAKER : Sawi tur kan awm tawh lova. Ama'rawhchu, resolution neitu kan koh hma in Minister sawifiah hmasak tur kha member te atang khan phutna a awm tlatin ka hria.

Pu P.C. ZORAM SANGLIANA, MINISTER : Pu Speaker, a move tu in a rawn move atangin member 11 laiin he resolution hi an sawi kha a ni a. Tahchuan a support zawng veka sawi rualin thahnemngaihna leh duhthawhna lai deuh te a awm tlangpui a. A bikin Pu Lalduhoma han sawi hmasa ila. Anin a rawn sawi he lui, tuna kan hmalak mekna, Tlawngah hian ram chin hria ti mai ila, luidung chin hria (poor recording) ...chung mi te chu chhawr tangkai nise tun ai hian a sawt zawk ang a, tih a han sawi kha Deptt ah pawh kan in hriattir reng a. Hmun dang kan hma lak leh zelna turah pawh a ram chin hria, an hma lak bakah pawh a ram chin hria, a lui kawr kawit tin hria te hman tangkai tum zel nise tih hi kan lo sawi tawh dan a ni a. Tin, tun tum bik, Tlawngah phei hi chuan kan hma lakna hmasa pawh livir lai, suar chhia te, lungpui lian te, khatiang khawkrwak hmun kha thalah pawh kan bitum deuh chat chat zel chu an ni a. Tunah phei chuan kan minister zahawm tak Pu Rothuama'n a rawn sawi ang khan Sairang to Bairabi inkar hi darkar 3 chauhah lawng hian kan thleng thei tawh nghe nghe a ni. Hmalakna hi kan inhriattir ni selangin. Tlawng hi balu lakna hmunpui hi a ni tel tlat mai a, helai tak maiah hian tui kuang zau lai, lawwg kalna tur bik a kan siam ah pawh khan an va kal kai a, balu an han lakna khan a ti khuar leh thin a, henglai te hi theih ang ang kan hriat leh tihte an ni a. A lui dung amite hian feh nan leh bungraw lak nan te an hmang nasa em em a ni. Lawng permit te hi pek kan chak em em tawh a. Tuna Cachar ho permit nei sa in an tih chin chin pawh hi kan thik khawp mai a. Amaherawhchu kan la zo lova, commission theih a la ni si lova. Tuna kan tih chin chin anga an han tih pawh khuan harsatna an tawh a. Chutih rual chuan kan lo neituten an thlai thar te an han tih chhuah china hel kan han sawi khan Mizoram chhung mi ni lovin, Mizoram pawna hel te khan chhiah te an lo khawn ve khang lang thin a ni ti te hi kan hriatpui a. Chungah pawh chuan department officer te leh keimahni personal branch ngei atang pawhin mit lo len a beng lo chhi a, mipuite harsatna su kiang tura tan ta la tur in kan inhriattir tawh a ni tih te ka rawn sawi duh a. Nichina member zahawm takin a rawn sawi ang khan lawngleng te hi NLUP trade ah khan an lo dil lo zawk alawm le te kan ti a, lawng te hi a tangkai em em a. Member te duh ang khan nasa leh zuala hma lak hi he resolution pawh hian a tum a ni thei a ni.

Tin, chumi bakah chuan khuah theih nise tih hi kan duhthusam a ni khawp mai a. Hetia fur lai tui tam lai ang chiah hian thal lai pawh hian tui tam tawh dah theih nise, sang pui puia khuah ni lo khan. Tuna hma kan lak lehna tur DPR buatsaih tura kan han ngen, Tuta EIRI ho in an han buatsaih turah pawh hian "a khuah lai tur a hi han siam tel teh u, kan nawr chhuah theih hlauh takin. Hei hi a tel thin lo na a, tunah hian han ti tel teh u" tiin EIRI thu neitute pawh kan hriattir a ni. Nichina Pu Lalthansanga sawi kha, RITES kan hmanna chhan chu, khawinge Inland Water Transport atana hman tlak rawn endiktu chauh an ni a. Chumite chuan endik tur a kan lo kawh hmuh atang khan Tuichawng leh Tut hi an rawn thlang ta a, a DPR siam tur kha chuan midang kan rawih an phal a. Chuta tan chuan keini pawn midang kan lo hmang a. Tlawng min hman sak tu vek EIRI company te hi Tut pawh min tih sak thei dawn lawm ni tiin kan lo sawi nghe nghe tawh a. Kha kha a inkaihnhawih avangin ka'n sawi tel a ni.

Nichina member dang dang pawn an sawi angin Chhimtuipui hi Transport Department-a a rawn luh hnuah hian P.W.D. ten an rawn hand over lohna chhan chu an hna kal lai mekte power tihlen na tur avangte hian a inkaihhnawih tlat vang pawh a ni tel a ni tih hi House-ah hian ka'n sawi tel duh a. Chulaiah chuan anmahnin NEC atangin sorkar hmasa hun lai atanga pawisa an lo hmuhte pawh kha chungah chuan an lo hmang a. Pu Manishankar Ayer DoNER Minister nen kan Chief Minister aiawha an hnung ka va zui tumin Helicopter-in kan kal a. Hruitezawl zawhah PWD hnathawhnaah te kan va kal a, luidung chho ah te pawh Helicopter-in kan zawh chho a, kan thlir chho a, chungah te pawh chuan a tuikhuah lo kal tur ah pawh hian heta rawn pek kual ngai lo in P.W.D. ah state pakhat ami tho a nih avang hian heng hi hmalak dan a ni tel a ni tih pawh kha ka'n sawi tel duh a. Member ten an ngaih pawimawh em avangin vawiinah pawh hian kan ngaih pawimawh Inland Water Transport hi chak takin kan kalpui ang a. Chutia kan kalpui rual chuan kan hnam tan, miten min chim lutuk loh nan venna ILP ah hian uluk tak in tan kan la tur a ni tih Department pawhin kan lo infuihna sauh sauh leh tan kan lakna dan tur, a tul a nih pheichuan Department dangte nen pawha Co-Ordination Committee fel tak neih a ngai dawn a ni tih hi kan hmalak tura kan han dah mek te a ni. Tunah chuan heng ang hi kan han tih chhoh dan te a ni a.

Tin, Tut kan han tih chhoh dan turah te, a dang zelah Tuichawngah te pawh malsawmna tam tak nen min vur chho a. Central Sorkar scheme hetia kan han pawh theih zingah hian Inland Water Transport kan bawh chak a ngaihna bik chu hundred percent a min rawn sponsore theihna hi a ni tlat a ni. Chawhma lama zawhna tam ber kan chhanna Library te kha chu keimahni state khan tum tur kan neih ve zel a ngai a, department dang dangah pawh, hemi hi chu za a za hi min rawn puihna a nih avangin hengah hian department danga, kan mithiam te, technician te pawh DPR siam emaw, concept paper siam a ni emaw te pawh theihpatawpa an puihna kan dawn thin avang te hian lawmawm kan ti a, chu chu ka han sawi tel duh bawka. Chu chuan a chhang telin ka hria a, Pu Thawla han sawite pawh kha. Hei hi kan hmasawmna bul tak meuh meuh a ni tih hi kan pawm dan tlat chu a ni.

Tin, Khawthlangtuipui hi tunah hian keini chuan kan lo sawi pawimawh khawp mai a, RITES Company official lo kal te hnenah pawh, a hmunhmaah kan officer ten hruaiin an kal pui hlawm a, mahse, chulai bawrah chuan bul tanna tur tak min han kawhmmuhah hian DPR kan siam vek ang an tih ah hian an telh tlat lo mai a. Theihtawpin kan lo nawr ang a, lui dang dang in rawn sawi te pawh hi. A map atangte pawh hian kan lo kawhmmuh ve a ni tih hi kan sawi duh bawka a ni.

Tin, hundred percent Central-in a tum a nih avang tak hian keini pawhin tan kan la nasa zual a, chumi anih avangin kan luipui te hi hman tangkai a nih theih nan tun ami pawh theih tawpin Central thilphal lai hi kan bawh chak tur a ni ang tih hi kan ngaih dan a ni a.

A bik takin Western Belt leh South Western Belt bik te pheichuan nichina member zahawm tak Pu Nirupam-a rawn sawi ang khan hemi hi an lifeline tak taka an hman a ni a, chu chu a pawimawhna hi in hria a. Chung atan te chuan khang suar a ni emaw, lengkir a ni emaw, lung khawkrawk a ni emaw,

heng ang han vawm ral te hi kan cho tak na em em te hi Tlawnga kan experience atang hian Pu Speaker, Department te hi an phur lehzuol a, a chhan chu Department thenkhat an lo hlawhchham thak tawhna Bairabi Suarpui, hetah chatuan lungpui tihngaihna awmlo tih ang te tunhma zawnga vai maji hovin chain nena an lo inkhaichhuahna, an lo inpawhchhuahna thin zawng zawngte pawh kum hnih emaw lek chhung hian an vawm darh vek tawh a, tihian a kal thei tawh a. Chung anih avang chuan lui dangah pawh hian Tuichawng ani emaw Mizoram lui dangah hian harsatna min siam tur a ni lovang tih hi kan ngaihndan a ni a. Chung chu min hriat sak ka duh bawk a ni.

Tin, nichina Pu Sangtea rawn sawi 1981 vel atang tawh a an lo sawi, MNF sorkar a lo ding a, 1987 state ah, chungah pawh Pu Laldenga'n Bairabi Multipurpose Project atana tih an rawn tum a, Congress sorkar chumi hma amite, tuna ami chho zel te pawn Bairabi, tute pawhin Tlawng lui kan ngai pawimawh hrim hrim mai pawh hi a lawmawm em em mai a. Hetianga hmalakna chi hrang hrang, mi hrang hrang, contribution kha a hlawhtlinna bul a ni.

Nimin lama kan sawi ah khan Pu Speaker, sentence khat lek han sawi tel zauh ka'n duh chu - Remna hlut zia tuna Inland Water Transport ah pawh hian a lang tlat a ni. Bairabi-ah 180 MW pe chhuak thei chuti khati kan ti a, Chaudhury-a'n lung a rawn phum kan tih khan 303 rifle pakhat hian chulai hnathawktu zawng zawng chu a umbo thei tlat a ni. Chutiang chiah chuan Remna lo awm theih tak na avanga, lalthutthleng hlanna avang te, mahni do te ngei laka inpek luh ngamna avang te, chutiang atana Pathianin malsawmna chi tinreng a mitin a vurna zarah khan vawiinah Inland Water Transport pawh hi a hlawhtling a ni. Remna awmna state a ni a, muanna in a zui state a ni bawk a, hengte hi kan hnathawktuten harsatna an tawh loh pahna anih avangin lawmawm kan ti tak meuh meuh a ni. Heng ang luipui lung chi hrang hrangte hi tangkai zawka hman a nih theihna tur atan vawiina kan department-in hmalakna chhete a lo neih ve te hriatpui a MLA zahawm tak ten Resolution an rawn put luh Pu Selthuama'n a rawn move hi khang kan inhrilhfiahna te, theih ang anga hma kan lo lakna te, tin, keimah mai bakah kan officer te leh kan official ten member tinreng te'n an sawi, kan tih lehzel tura hmabak te kha min chhinchhiah pui a, keiman ka chhinchhiah mai bakah. Chungte nen nakin zelah pawh Consultative Committee-ah te la pharhin kan lo bawhzui zel ang a, heta a duh ang tak hian "Sorkarin chak takin hma la rawh se" tih lai tak hi chawhma lama ka sawi ang khan a department hnathawktu tinreng te pawh min tihphurna a ni tih hi ka sawi theih ni rawh se, ka lawm e.

S P E A K E R : House Leader in han sawi ve duh a nei em?

Pu LAL THANHAWLA, CHIEF MINISTER : Pu Speaker, hming meuhva min koh takah chuan sawi pawh ka lo tum hranpa lova, engpawhnise Inland Water Transport hi nichina kan ngaihtlak tawh ang khan a pawimawh a. Cheapest means of communication ani a, remchang tak tak kan ramah kan

nei a, chumi avang chuan hei Kolodyne Multi Modal Transport Project te pawh hi kum rei tak atang khan kan lo tuipui tawh a ni a, 1997 atang vel khan.

Tin, P.C. hun laia Bairabi Hydel Project an tih te pawh kha a hnu zelah pawh khan hemi Inland Water Transport Project hi nasa taka a tanpui dawn avangin kan zavai khan kan phurpui kha a ni a. Power lampang chu thu khat niselangin, Inland Water Transport kha kan lo phurpui kha a ni. Chumi kal zelah chuan vawiin kan han thleng chho a ni a. Nichina kan ngaihthlak tawh ang khan Bangladesh te nen pawh Border Trade neih kan tum a ni a. Tunah sawn Border Trade kan neilo chung pawh hian Sawngthing te, Mau te tamtak hi a kal ruih ruih reng a, Sorkar leh mipuite pawhin kan hlawkpui tur angin kan hlawkpui lo a ni. Chuvangin, Bangladesh nena Border Trade neih pawh hi nasa takin kan hotute, kan sorkarin a bawhzui a, Delhi-ah Sheik Hassina, Prime Minister zahawmtak kan sawipui a, ani pawh a lo phur a, helaia North East-a neighboring states te nen hian inlaichinna tha tak, politics leh cultural leh trade relation neih kha an duh ve a, anmahni tan pawh land lop an nih ve avangin a tha a, chu chu hre ran in anmahni pawh an phur hle a ni. Chuvangin, an High Commission te pawh an rawn tir a, a hnuah khan mi dang dangte pawh an rawn tir leh a. Mahse duh angin hma lak sak theih a nilo hi a pawl khawp a, sawlaihah Border Trade kan neih pawhin sawlama kan water ways te chu a la pawimawh chho deuh deuh dawn a, kan ngaihthlak tawh angin a means of transport and communication kha a tlawm avangin. Chutiangin helamah Tlawng chauh nilovin Tuiruang chhuah kan zuk thlen a, tunhma pawha kan pi leh pu ten an lo in sumdawna te pawh hi strengthen a ngai chho zel a, hmalakna tur tamtak a awm chho zel a ni. Tichuan, chhim lampang saw Mizoram tan chauh nilo, North East pumpui tan Gateway Hotel, Trade & Commerce siam kan tum a, India sorkar pawh a phur hle a, chumi kawngah pawh chuan a pawimawh ber pakhat chu kan Inland Water Transport hi a ni reng dawn a ni. Chuvangin, vawiinah helaiah sorkar chak zawka kal tura phutna resolution lo lut pawh hi thil lawmawm tak a ni a. Sorkar tun ai pawha beng harh a, chak zawka kalpui tu, nawr kaltu a nih ka beisei a. Member ten an rawn sawi diat diat a, a lawmawm hle mai a, a support lampang zawng vek a ni a. Tin, Department pawhin kan hriatpui aia tha in hma an lo la a. Amaherawhchu, member tam berin kan sawi atang chuan tun ai hian hak hi zauh deuh sela tih kha kan zavaia kan lungualna niin ka hria a. Engpawhnise, Pu Speaker, he resolution hi sorkar tan pawh a bengvar thlak a, tin, kawng hrang hrangah, tuna hma an la lak lohna-ah pawh hak zauhna tur atana kawhmuhtu anih avangin lawmthu sawi rualin ka'n support a ni, ka lawm e.

S P E A K E R : Awle, a resolution neitu kan sawm ang a, anin pass rawn dil rawh se.

Pu R. SELTHUAMA : Pu Speaker, ka lawm e. Member 11 laiin ka resolution hi in rawn tuipui a, a support zawng vekin in rawn sawi a, an chungah lawmthu ka'n sawi nghal duh a. Tuna ka rilru-a lo awm pakhat chu Mizo District Council hun lai khan chanchinbu-ah mi pakhatin ka manifesto tiin a rawn ziak a. Chuta a ziakah chuan kei hi min thlang tling a nih chuan Mizoramah fur ruah tui a tam lai hian Tlawnglui te, Tut lui te leh lui lian zawng zawng hi ka tikhang vek ang a, Motor kal theihna in ka siam ang a, tichuan Motor kawng tha tak mai double road kan nei nghal a ni mai tiin manifesto a chhuah a. Chungte chu ka rilru-ah a lo lang tel a.

Vawiina kan sawi tum dan nen chuan a inkalh deuh na a, lo ti thei ta ngai ni sela, kawng tha tak chu a van ni mai awm em tihte pawh ka'n sawilang tel ve duh mai mai a. Vawiin ah erawh chuan chutiang chu nilovin, a lui awmsa hi hmang tangkai ila ti zawngin kan sawi a.

Kan hriat angin transport dang hi chu a man te a to a, motor-te hi a man a to a, a khawlte tha reng mahsela metal road-ah a han tlan a, a ke te hian a tuar lova, reiloteah a ke te pawh hi thlak zung zung a ngai thin a. Chutih laiin lawngte chu chutianga kal ve a ni lova, tuih a kal mai a, rawn innok na tur, a sa tur kha a awm ve lova, tui khan a vawng dai vek mai a. Chuvang chuan a tlo pawh a tlo a, repair mai mai te pawh a ngailo deuh a, chuvang chuan a chuan man, thil phurh man te pawh kha a tlawm a. Chutiang anih theih chuan kan sorkar chak tak hian hma a lak a, Mizorama lui dung awm zawng zawngte hi an tih zawh hunah pheih chuan, transport tha tak mai kan han neih hunah chuan kan ram hi a changkang hle dawn a, thil man te pawh hi a tlawm thei dawn a. Chu chu kan rilru hian kan hmu tlang vekin ka hria a. A rawn sawitu tam takin engemaw hlauhthawn deuh an sawi te kha chu, hlauhthawnte pawh hi a awm ve thei a ni. Pawnah ka va kal chuan ka tlu mai ang tihte pawh hi kan hlauhawng ve thin a, mahse kan han kal a, a tlu lo tawk tur hi chuan kan in veng ve mai bawh thin a ni. Chuvang chuan helai ngaihtuah, siamtha tuten an ngaihtuah chuan hlauhawm emaw tluk palhna lo awm turah kha chuan a invenna an dap ve thiam ang tih hi ring ila. Tichuan, kan sorkar-a department fel tak takte leh a Minister mawng zang tak mai te pawh hian khang kha chu an hmu phak a, an ngaihtuah phak ang tih kha ring ila a thain ka hria e.

Awle, Pu Speaker, ka sawi rei tawh lovang a, tichuan ka resolution “Inland Water Transport hi kan State-ah tangkai leh zuala kan hman theih nan kan Sorkar-in chak takin hma la rawh se” tih hi he House hian min pass pui turin ka ngen e. Ka lawm e.

SPEAKER : Awle, tawite ka'n sawi ve teh ang. Tlawng lui khuah hi kan sawi thin a, party tin pawhin kan duh a, sawrkar tin pawhin kan duh a, mahse, a sak tlat mai a. Chung lam zawk khian min phal lo em ni ang aw? Kan ram a zim si a, li zau siam vak mai hi kan ram tih zim lehzualna turah min ngaihsak em ni ang aw tih te ka ngaihtuah thin a. Tin, ram a'n kal zel a, Tlawng lui khuah kan ngaihtuah tih lai boruak ang ni lovin high dam siama ram zaupui chim chhiat tir hi mithiamten tunah chuan an advocate vak miah tawh lova. Lengkir sang deuh awm saa tuikhawthla siam a, khata power generate kha an tum dan tawh zawk niin a lang a. High dam siam an tum tawh chuan mipuiin kawng an zawh dual dual tawh ringawt mai a tunlai khawvelah chuan. Chutiangte chu a nih vang nge maw Tlawng lui hi a sak tlat le ka lo ti ve mai mai thin a ni.

Kan resolution neituin a resolution kha pass a rawn dil a. Kan buk ang a. Remti apiangin ‘Remti’ ti rawh u le. Remti lo kan awm chuan ‘Remti lo’ ti rawh u le. Awm lo maw?

Awle, he resolution ‘Inland Water Transport hi kan State-ah tangkai lehzuala kan hman theih nan kan sawrkarin chak takin hma la rawh se’ tih chu House-in lungual takin a adopt ta a ni.

Tichuan, Private Member Resolution dang kha dar 4:00 PM hma chuan kan la kalpui ngei tur kha a ni a. Hetilaia ni 4.7.2011-a balloting an neiha a indawt danah chuan kan lak leh tur hi Pu K. Lianzuala resolution ‘Tun hnaia ABCI hnathawktu mi pahnih, Assam helpawl pakhatin an kidnap te Mizoram Police-in an chhanchhuak hi chawimawi tlak an ni kan ti a, he House hian lawmthu a sawi a ni’ tih a ni a. Chu chu a resolution neitu Pu K. Lianzuala move turin i lo sawm ang.

Pu K. LIANZUALA : Pu Speaker, resolution move thei tura hun tha min pek avangin lawmthu ka’n sawi hmasa duh a. Tuna i’n sawi ang khan ka resolution hi ‘Tun hnaia ABCI hnathawktu mi pahnih, Assam helpawl pakhatin an kidnap-te Mizoram Police-in an chhanchhuak hi chawimawi tlak an ni kan ti a, he House hian lawmthu a sawi a ni’ tih a ni a.

Pu Speaker, kan ramah hian thawnthu leh khawvel ramdang chanchina kan hriat thin inrukbo, in kidnap te kan ramah a thleng ve ngai ang tih pawh kan rin ngai loh alo thleng ve ta zeuh zeuh mai a, hei hi thil vanduai thlak tak a ni. Nimin lama kan Official Resolution te kan ngaihthlak chuan Remna leh Muanna kum 25-na kan lawm te nen pawh a inkaih hnawih theiin ka hria a. tin, vanneih thlak takin heng rukbote hi nungdama chhanchhuah leh emaw lakkir leh emaw te an ni thin a. Hun kal tawhah khan tlanna sum phuta pawisawilo rukbo a hluar hle thin a nih kha. Heng hel pawl, suamhmang leh hetiang ti thin hote hian tum mumal an nei lova mi zalenna tibuai a, mi nunna hlu tak sum a tlanna tura ti thinte anni tih kan hria a ni. Chutiang chuan kan ramah hun kal tawh lamah a thleng zing hle a, zawngchhang riauna an nei nite pawhin a hriat a ni.

Amaherawh chu, waviin ah kan sorkarah kan hotute, kan House Leader zahawm tak te leh kan Home Minister zahawm takte hnuaiah chuan hetiang thil hi a awm ve ta lo a ni a. Rei tak chu inrukbo leh hetiang thil an reh vang vang a, tunhnaiah vanduaithlak takin June ni 6 zing dar 2:30 velah Kolasib bul Bairabi road Meidum khua ah ABCI Project hnathawktute, an Manager Premlal Deman S/o Mushiman Deman, Himachal Pradesh mi leh Side Manager Basrang Lal Burji S/o Manik Chandi Burji, Rajasthan te chu rukbo an lo ni ta a. A rubotute hi Assam hel pawl United Democratic Liberation Army te an ni a. Meidum camp atangin an ru chhuak a, hriat a nih velel sorkarin rang takin hma a la a. Hetah hian kan sorkara kan hruaitu kan Chief Minister zahawm tak leh kan Home Minister zahawm takte an fakawm ka ti a, he House hian kan fak tur niin ka ngai a ni. A chhan chu sum tlanna beiseite laka an tlawm loh zia chiang takin kan leader ten an sawi a ni. Sum pek an tum loh zia chiang takin an sawi a, chutih rual chuan kan Police te hnenah hmanraw tinreng leh an remhriatna zalena hmang turin thu pek an ni a. Police te tan pawh phurna leh huaisenna a pe a ni. Tiang chuan kan Police te pawh an che tha thlawt reng a ni a. A bul takah chuan kan sorkar hotute, kan C.M leh kan Home Minister te hmalak hi a ni. Chutih laiah chuan kan police hote an fakawm hle a. CID (SB) te leh Kolasib District Police te, 1st BN. I.R. te an che tha hle a. Kan hriat angin mi ramah, ram hriat ngai loh ah, an tawng leh a ram zia pawh an hriatna ngai loh ah, zan thim ah zan khaw tlaivarin an va bei a ni a. Kan police-te huaisenna leh remhriatna te, an themthiamna te, an tumruhna te fakawm thlawt ka ti a. Kan hriat angin kan ram dep Assam ram khu hel chi tinrengin zalen taka silai nen chhiah te khawna mi rukbo te an chinna hmun a ni. Chutiang silaimu karah chuan kan police chhuanawm ten zamna nei miahlo a an tih tur ti thei a huaisen tak a an kal a, a tawpa hlawhtlinna an nei hi ropui ka ti a.

Chuvangchuan, chawimawi an phu a, fak an phu a, fak tlak an ni ka ti a. T.V te kan en chuan khawvela terrorist hmingthang ber hmanni lawkah Bin Laden-a, American Navy SEAL tan an thah dan kha kan hmu a.Tin, SIERRA LEONE ah 2000 chhoh velah British sipai tha 4 hostage ah ram chhunga hel ten an la a. Chung an chhanchhuah te vawiin ah ka thinlungah a awm a, a picture te kan thlir a, khang te nen khan tehkhin rual ni lo mahse, kan police te chet dan en hian a boruak leh an chenna hmunte en in, an hmanraw neihte en chuan kan police force te hi a hmangtu sorkar-in a hmanthiam vang te pawh a ni ang a. An chhuanawm a an faktlak a ni tih hi he House hian hria se ka duh a ni.

Nichina kan sawi ang khan Ni 6 zingah hruaibo an ni a, ni 11 zet mai ramhnuaiah kan hria a, ruah a sur nasa a, chum a zing nasa a. Pu Speaker, ka'n sawi duh chu operation zingah hian mihring lamah ka laina hnai tak a tel ve a, officer a ni. Ka ngaituah a, ka zu phone thin a, “kan bei ngawrh khawp mai, ram a chhengchhia a, khua a hmuh theih loh a, mahse chung chuan min dal lo a ni. Zannah ramhnuaiah chaw pawh ei lovin, ram ngaw hnuaiah an hnu chhui a har, ruah a sur nasa si a” a ti a ni. Chuti khawp chuan kan police te hian hna an thawk a, fak an phu ngawih ngawihin ka hria a. Tin, chutih laia ka'n sawi duh chu kan police te hi hei ai hian la thuum that nisela, tunlai hmanraw tha ber ber America, USA-a an sipai tha ten an neih ang hi kan Home Minister zahawm tak leh kan House Leader zahawm tak hian min chhinchhiah sak se ka duh chu, hei aia thuum tha, sophisticated weapon tha deuhthe emaw, hmanraw tha zawk dang te hi la pek belh theih phe chu nise, kan ram kal zel en hian hetiang thil hi la thleng leh thei fo pawhin a lang a, chung atan chuan kan police te pawh an phur zel ang a, hei ai hian result tha hmuh tur kan la nei fo ang tih ka ring a ni. Chutiang chuan ni 11 lek chhungin mi ramah, ramhnuaiah chaw ei mumal lovin zan khaw tairekin kan police te hian an va chhanchhuak thei a ni a, a thawnthu tlangpui chu vawiin ami chuan kan hre vek a ni.

Amaherawhchu, vawiina pawimawh ta chu, hetiang kidnap thawnthu leh hetiang thil kan hriat tawh ah hian nunna an chan fo a ni, a chhanchhuak tu lam leh chhanchhuah tuma te pawh in. Mak leh zel chu an chhanchhuah te pahnih hi pakhat chu a ru tute hotupa khan a dulah an kap hram a ni a, mahse vanneihthlak takin a thi lo a, pakhat chu hliam lovin. Tin, kan sipai te, kan police thate hliam miah loa an chhuak thei te hi vanneihna a nih rualin an ral rel thiam pawh a telin ka hria a,hei hi a ropui ka ti a, chhinchhiah tlak niin ka hria a ni. Chuvang chuan he sawrkar hnuaiah kan police te tha tak maiin an che a, a sawrkar neitu a zir a ni ka'n ti leh duh bawk a, hun kal tawh ah kan hria, in rukbo, in kidnap a thleng fo a, palaite intirh an ni fo a ni. Vawiin ah chuan kan C.M zahawm tak leh Home Minister zahawm takte chuan khatiang lam an ngaihtuah lova, a tirah khawng takin ngaihtuahna fel tak an nei nghal a. Heng rukbo chingte laka an tlawm loh tur thu leh sum leh pai lama tih an tum loh thu, palai kal tir an tumloh thu an sawi tlang nghal a ni. Chutiang chuan kan police officer te an che nghal a, a bik takin kan Home Minister hi a fakawm hle a ni. A ngaihtuahna a hmang nasa a, mutmu tuah loh zan te pawh a nei niin ka hria a, tih tak zetin he thilah hian ngaihtuahna a hmang, a hlawhtlinna lo thlen na tak pawh hi ani a tih loh theih lohin ka hria a. Kan police te lah kan sawi tawh ang khan an huaisen a, rem an hria a, an fing a, ral rel an thiam a, silai kah thlengin an thiam a ni.

Tichuan vawiin ah hian Pu Speaker, kan resolution hi he House hian ngun taka kan ngaihtuah a, kan phur tlan pawh ka ring a. Chawimawi tlak kan police te hi kan chawimawi theuh tha in ka hria a. Chuvangin ka resolution hi

member te'n ngaihtuahna hmang a lawmthu sawina turah lawmthu min sawi pui tur hian a sawm te pawh ka sawm nghal duh bawk che u a. Engpawh nisela, kan police chhuanvawr te an chet that zia hre tute vek kan ni a, nakin zelah eng hun nge thleng dawn hre lo mah ila hei aia an dinhmun leh an hmanrua te kan hotute'n ngaihtuah sela, duhsakna awm thei ah pawh duhsak se, chu chuan phur zelate a pe ang tih ka ring tlat a ni. Chuvang chuan, he ka resolution hi he House-ah hian Pu Speaker, move i phal angin ka move a, House hian min ngaihtuah pui a, a tulte sawiho va, a tawpah min pass pui ngei pawh ka beisei a, chu chu ka sawi theih tawk ni mai se, ka lawm e.

SPEAKER : Awle, kan sawiho ang a, Pu T.T. Zothansanga a phar hmasa a, a dawtah Pu R. Lalpianmawia a phar leh a, Pu T.T. Zothansanga i lo ko phawt ang.

Pu T.T. ZOTHANSANGA : Pu Speaker, ka lawm e. Vawiin ah thu lawmawm deuh mai kan han ngaihtuah ho a ni a, a thu hrim hrim hi chu a lawmawm khawp mai a. Amaherawhchu, kan hun kalta te ka han ngaihtuah let a, ngaihtuahna erawh chu a ti hnim deuh hlekin ka hria a. Kum 10 chung zet mai helho kan ngam lo tawh a, hun tam takah kan lo tlawm tawh thin a, kan lo tlawm tawhna avang khan helho kha an zawngchhang khawp mai a, chu an zawngchhangna chu keini hunah a rawn lang leh a, vanneihthlak tak in kan sorkar chak tak mai chuan hetiang hian an man a ni a.

Vawiinah hian ka rilru in thil tam tak a ngaihtuah a, kum 2003 kumahte khan rilru an tlan let leh a, hel ho hian min kidnapped mai nilovin kan sorkar chak tak khan a lo thawhpui thin a ni tihte ka ngaihtuah a. Kum 2003 kan inthlan khan Champhai-ah khian man an nei deuh nual a “CM campaigners ka ni a, min man suh u” tih ang chi te, Block President in an bail chhuah ang chi te kha Champhai lamah chuan kan nei a. Tun tlai khawhnu ah khami an man te zing ami kha 2007 March ni 29 ah khan Aizawl-ah Press mite hmaah a in sawifiah a, chutah chuan “Chief Minister in cheng nuaih 2 min pe a ni” tih ang chi te kha ka rilru in an hrechhuak a, kha kha kan sawi hmasa a. Chutih rualin 2007 March ni 12-a Naga helho kan man, khatih lai ruling MLA in bail a tum, a thawhpui ten hei chu tualthah case a ni si a, bail lo mai rawh an tih avanga an worker pakhat Ramhlun Veng ami in a bail chhuah te pawh kha tun hunah hian ka hre chhuak a. Chumai bakah mipuite'n helte sum pe ni a an hriat avangin khatih laia kan sorkar kha na takin an dem a, chutah chuan Hnam Run ah insawifiahna an nei a, chu an insawifiahna chu June 28, 2007 khan a ni. Hnam Run ah an insawifiah seng ta ngang lova, “a ni ta em em lo ve” an ti ni ngei tur a ni, chutah chuan an thusawinaah June 28, 2007 –ah “Central ngenna angin helho nen kan in zawm ngei a ni” tiin thu an sawi a. Chuta an thusawi zawh hnu lawk ah chuan khatih laia opposition hruaitu pathum coordination committe te khan thu chhuah pawh an siam a, an thuchhuah chu July ni 31-ah khan an chhuah nghe nghe a ni.

Hei vawiin ah hian sawi tur a tam khawp mai a. Kum 1999 leh 2001 chung khan mi 69 ruk bo an ni a, hetah hian hnam dang 33 an tel a

ni. In rukbo na chhan hi a tak tak ah chuan sum demand na rawng kai deuh vek an ni a, kha kha paw ka ti khawp mai a, misual thil tih kha tihhlawhtlinin alo awm thin a. Kha thil tih hlawhtlinna kha a rukin ipte phen ah mipui hriat loh a lo fel leh mai thin kha a tam em em a, kha khan tuna kan hel ho pawh hi a ti huangtau niin kan hria. Sum alo pek tawh leh tawh loh chungchangah khan inhnial na a tam khawp mai a. Ka'n sawi thui zawk ang a, hman ni ah party pakhat Vice President-in tu sawrkar ah mah rukbo tlan chhuah nan sum pek a awm loh thu a rawn sawi a, chu chu vawiin ah pawh hian a chanchinbu pawh ka rawn keng vek a, heng ah hian a tel teuh a, tu sawrkar mahin an rubo ngai love tih kha a rawn sawi a. Tin, chubakah a rawn sawi leh pakhat chu mi rukbo sum a tlan chhuah chungchang sawi chu Ethics Committee in na taka zilhhaua khap ngei turin a ngen a ni, tih te pawh kha a awm chho leh a ni. Hei hi tunhma-a an hmalak tawhna te kha a hrelo emaw ni chu aw ka ti a.

Ka'n ngaihtuah ka'n ngaihtuah a, Cabinet Minister kha ani thin a, a hre ngei turah ka ngai a. Amaherawhchu, tun hnuah thil ka'n ngaihtuah hian an Cabinet kha a rukin an lo inthen hrang ve hrim hrim a, a hrelo leh thei mai awm mang e tih te chu ka'n ngaihtuah tho a. Sorkar leh te chu an tum viau na in OB pawh panga lai mai an han nei a. Tawng mawilo nilo sela, min lo hre thiam sela, hei Dr. Thangtea hi hmanlai atanga ka mi ngaihsan tawh, N.E. Student Union te nen, Prafulla te nen pawh a lo awm a, lo chairman zak zak tawh thin, mi fit leh mi tha tak mai a ni a, Doctor a nih te khan kei pawh Madanriting ah a lawm na ah chaw te ka lo zuk ei ve tawh a ni. Tunah hian Mizoram-a mipui tam tak, MNF mipui te hi chuan Chief Minister hmasa ai kha chuan Chief Minister-ah an awt zawk a ni. 'A-ni hi chuan min hruai sela kan ziaawm ngawt ang, kan kang awk awk ang, Pu Duhoma te pawn min umpha mai lovang' an ti a ni. Minister a nih lai te pawh khan a vanneih thlak khawp a, RD kha an chang a, a tha khawp mai a, RD changtu India hmarchhak ah pawh khan a fit ber te zing ami a ni a, amaherawhchu a lo thiam deuh aniang hotute khan an chhuh zauh mai a, Education-ah an han ti leh a, tlema han vuivai zawng zawng te pawh kha an han reh ta duk mai a. E khai ! a fel lutuk dawn, a tha lo vang an ti a, Environment-ah an han dah leh a, khatiang kha ani a. Tunah hian amah hian Zoram hi ala hruai ang em aw tiin ka ngaihtuah ka ngaihtuah ve a. A party lama an han in kher dan ah hi chuan a kawng la bo deuh chuan ka hria a, paw ka tih pui ang reng khawp mai.

Inrukboa sum in pek hrim hrim hi kan hua a ni hran lova, a tul a nih chuan mihring nunna hi a hlu khawp mai a, kawng dang dang kan han zawh ang a, kan theihloh tawpah chuan a tul hunte pawh a awm ve tho mai thei. Amaherawhchu, a sum va pek hrim hrim kha kan hua a ni hran lo va, sum pek hrim hrim ai mah khan va pe ngei si a pe lo ang a in lantir tum tlatna boruak ram hruaitu level a awm hi a tha lo kan ti a ni. Mipui hi kan fing tawh a, inbum chi kan ni tawh lo. A theih ang chen chenah a transparent thei ang ber in kal kan duh tawh a, kan lo ti a nih pawhin tun tum chu kal ngaihna ngang kan hre lo ve, heti hi a ni ta ani tih mai tur a ni a, chutah chuan mipui pawh an dam ang. Mahse mipuiin rin an nei a, an hre chiang si a, kha an hriatchianna ruamah khan dawta an khah chhilh leh si chuan an thu sawi kha a ho zo vek thin. Kha tak kha mipuiin an huat pawh niin a lang a ni.

Tun tumah hian an bei nasa khawp mai a, an zu kalna ziak te pawh ka kawl a, kan police te pawh an fakawm ka ti a, tunhmaa Congress hun laia police tha kan neih thin kha kum sawm chhung hnungkhirhin an awm kan ti mai a, an hnung an khirh nge ka hre lova, Police modernization sum kha kan dawng teuh teuh mai a, khatih lai khan Home Minister te leh tu tu te emaw kha chu kha sum ah khan an buai a ni. Pute an buai na na na chuan an lo buai ve ang a, ram humhimna lam kha an khawih hman lo nge ka hre lova. Term hmasa chhung khan thihna kha a tam khawp mai a, Hnam Run kawtah te , MLA Hostel te pawh kha chanchinbu front page ah a lang a lang ta mai a, Pastor meuh pawh a in chhungah thah a ni leh a, khatiang boruak kha kan huntawng tawh kha alo ni a. Khatiang a background zawng zawng kan han thlir khan vawiin ah kan Home Minister zahawm tak kaihhraina hnuai helho hneha an han awm ta hi a lawmawm ve hrim hrim a. Pa pakhat matric passed thei lo kum li kum nga vel a exam a exam a, a passed thei lo va, a kum rukna velah a rawn passed ve an lawm em em ang mai hian kan lawm a ni. Vawiin ah hian a lawmawm khawp mai.

Tin, ka rilrua thil pakhat awm leh chu 2003 in thlan dawn khan hel kha lo thawhpui lo se chuan MNF kha an sorkar dawn miah lo tih a chiang a, khami avang khan hel hi an lo hlawkpui ve tawh chiang a ni. An hlawk pui ang khan miin hlawkpui ve se pawh an ti lo em ni aw ka ti! Tin, hel an thawhpui zia ka rawn sawi tawh kha, khami ten an thawhpui, an thian ve tho han nek chep deuh rap rap ai kha chuan puan hnuai sum pek kha a hlawk zawk pawh ani mai thei a, palai an in tir a, an han inbia a, a changin Pastor an ti a, palai kan in tirh tawh chin reng reng ah hi chuan in compromise, kan duthusam ang takin thil hi a awm thei lo a ni. In compromised awm zia chu fanghma inbun ila lehlam in an chang lian deuh ang a tih ang vel kha a ni. Chuvangin, vawiin ah hian lawmawm ka ti hranpa ve a, kidnapped sum tlan tih chung chang te hi sawi tur a tam khawp mai a. Kan term hmasa khan kan Home Minister te pawh kha Court te pawh a kal thin niawm tak a ni a. Khang te pawh kha mipuiin kan la hre awm e. Vawiin ah hel ho in tual an lenna, zalen taka an lo vah vel tawhna hmun ah tlawmna an han hmu hi lawmawm ka ti hranpa ve reng reng a. Tuna helaia kan helho tena an mi hren Mizoram police chak tak ten an chhanchhuak ta hi chawimawi tlak ka ti a. Mizorama Police tha ber ni thin te kha tunah hian an chak ber leh tawh a. Mizoram ah an chak ni mai lovin Assam ramah pawh an duh chuan an kut phuar loh na na na chuan an lo huaisena, an lo chak a, an fit a, chuvangin an chhuanawm ani tih ka sawi duh a. Tichuan, lawm takin kan resolution hi ka rawn thlawp a ni. Ka lawm e.

Pu R.L.PIANMAWIA : Pu Speaker, ka lawm e. Kan member zahawm tak Pu K.Lianzuala resolution chhuanawm tak mai sawi theia ka awm hi lawmawm ka ti a. “Tun hnaia ABCI hnathawktu mi pahnih, Assam hel pawl pakhatin an kidnap te Mizoram Police in an chhanchhuak hi chawimawi tlak an ni kan ti a, he House hian lawm thu a sawi a ni” tih hi a thu ah hian belh tur pawimawh tak mai awmin ka hria a. Hemi sentence a “Mizoram Police in” tih dawt ah hian “chhanchhuahna sum tel miah lova an chhanchhuak hi” tih kha belh a tha in ka hria a. Hei hi a nih dan dik tak pawh niin ka hria a. Chhanchhuahna tura pawisa an phut kha cheng khat mah pek ngai lova chhanchhuah an ni tih kha khan a ti lang chiangin ka hria a. Chuvang chuan khalai thu kha a remchang thei anih chuan tih belh nise a tha ka ti a.

Kan resolution hi a lawmawmin a ropui ka ti a, hemi lo chhuah theihna chhan hi thupui pakhat angin han sawi ta ilara, “kawi pawh a kawm a that leh a rah a tha” tih khan a rawn hrilhfiyah vek maiin ka hria a. Kawi kawm thalo ah chuan a rah a thalo a ni tih sorkar hmasa ah khan kan hre tawh a. Vawiin ah chuan kan kawi kawm neih te hi an tha a ni, an rah pawh a tha a ni tih hrilhfiyahna tha tak niin ka hria a. Sorkar hmasa hunah te an ruk bo thin, PWD hnathawktu kan bial mi leh sate ngei pawh kha an tel a. Khatianga an lo ruk bo tawhte tlan chhuahna chungchangah khan thil sawichian tel thaa ka hriat chu, khami a tlan chhuahna tur a pawisa an phut petu tura an palai kal ten an hawn ve leh thin kha a paw em em a, kha vang khan hlawkna mi pahnihin an lo tel zel a ni tih a hriat a. Chu chu a entirna pawh han tarlang ilara, ka bial khaw pakhat ah chuan palai in mi nupui tur a bia a, an in biak remna chu ₹ 60/- a ni a, tichuan palai ten an va pe a, a neitu pa khan ₹ 30/- hi chu hawn let leh rawh u, in hman ve atan a ti a, chutianga deuh bawh chuan khatih hun laia tlan chhuahna sum pe tura kal te khan an hawn let ve leh thin a, khatiange kha thil awm a ni a. Tun sorkar ah erawh hi chuan khatianga beiseina kha a awmlo a ni. Chuvangin, kan hotute, a lian ber atanga rinawmtaka Pathian tih chung a thil an tih avang khan Pathian pawhin mal a sawm a, cheng khat mah pe lova chhanchhuah hi a ropui bik em em mai a. Chhanchhuah rau rau ah hian kan resolution ang hi chu a vang awm mang e aw, America ram ah te chuan min el phak chu an awm mai thei a, chu chu thil awmdan niin ka hria a, a ropui ka ti tak meuh meuh a. Hetianga chhanchhuahna ropui tak mai, chawimawi phu tak mai resolution a rawn lut hi a lawmawm ka ti a, kan sawi belh duh chu, hun hmasa lam ah kha tianga mi tangkai anga lo lang tawh kan police te zing ah thawkrim tak tak te zing ah pawh chawimawina phut vang ni lova, theihtawpa an lo beih thin tawhna ah te a sir a miin chawimawina an lo dawng thin a kha a paw a. Tun kan sorkarah erawh hi chuan heng atana engmah lawman pawh phut lova thih pawh in huam a beitate chawimawi hi sorkar hian kan tih tur tak pawh ni in ka hria a, promotion nge, a tangkapui zawngin nge ni ang. Hetah hian hming pakhat han tih lan ka duh a, midang pawh lam chhuah tlak vek an ni chungin Pu H.Thangzuala hemi team-a leader a ni awm e, hemi hi a bik taka hming lam chhuah tlak niin ka hria. An beih dan kawng hrang hrang te kei pawhin phone ten ka lo ngai chang ve a, ngaihtuahna tak tak a pe a. An thil tih dan zawng zawng te hre kim kilh kelh lo mah ilara, hetiang leader tha kan hotu ten an han ruat chhuak a, rintlak tura an ruat ang ngeia hna an thawk puitling thei hi a lawmawm ka ti tak meuh meuh a. Chuvangin he resolution hi ka thlawp tak meuh a ni tih ka rawn tar lang duh a ni. Ka lawm e.

SPEAKER : Kan pass thei tawh mai em? Sawi tur kan la awm em?
Pu John Rotluangliana i lo sawm ang.

Pu JOHN ROTLUANGLIANA : Pu Speaker ka lawm e. Tawite han sawi ve ka duh a. Vawiina kan resolution hi a ropui hle a. Hmanni lawkah khuti laiah misual ten Mizorama hnathawktu, ABCI hnathawktu te vai 2 an kidnap a. Mizo pawh ni lo, vai an kidnap chung pawhin kan ram chhungah a nih avangin kan police ten nasa tak maia hna an thawk hi a lawmawm ka ti a. Mi ramah kidnap tawh ve ta ilara, engtin tak hnam dang te hian min ti ang maw, tih te ka ngaihtuah a ni. Keini chuan a hnam a zawng pawh thliar hrang miah lova kan police ten theihtawp chhuahna hetiang kidnap te an han chhanchhuah hi a lawmawm rual rualin a ropui ka ti a, kan police te hi fak tlak an ni a. Vawiina kan resolution-ah hian “chawimawi tlak an ni

kan ti a” tih mai piah lamah hian kan police te hi a theih a nih pheih chuan Award te pawh hi pek awm tak niin ka hria. Police te hi a bikin Force an ni a, sorkar hnathawk dang ang an ni lova. Anni hian kan ramah nimina kan sawi, remna leh muanna kan neih theih na atan pawh ring rawlha beitu te an ni. Chuvang chuan an fakawm ka ti em em a. An service thleng hian heng hian effect sela chuan nakin hun lo kal leh zel tur atan pawh an tan pawh a phurawm leh zual ngawtin ka ring.

Nichinah khan kan mover khan a rawn sawi a. Silai tha te leh thawmhaw tha te a thum ni sela a ti a, a dik khawp mai. Chumi rual rual chuan anmahni hi kan hriat ve a, sorkar ang pawha kan notice a pawimawh leh zualin ka hria a. Tunhma pawhin he kidnap case-ah kher lo pawh hian kan police tha tak tak te hian hel silai te chhuh sak in nasa takin an lo bei tawh a ni. Khang te kha hriat chhuzawm zel a nih a, chawimawi chhoh chu ni sela chuan hei ai hian kan police te hi an la ropui leh zual ngawtin ka ring a ni. Tunah hian he kidnap chung changa engmah kidnap-tu te pawh sum leh pai pawh pe miah lova police te huaisenna vang liau liauva chhanchhuah an ni hi a ropui leh zualna chu a ni. Chanchinbu ah te kan lo hmuh danin kan police te khan midang an kidnap mek te ho nunna kha an chan hlau lo sela chuan kidnap tu te pawh kha kap hlum vek thei hial khawpin chance an nei a ni. Amaherawhchu, an fimkhur em em a, a ni lo zawk an ti palh ang tih hlauvin khati khan hun an hmang a ni a. Chutiang mi police kan nei hi a lawmawm ka ti tak zet a ni. Nichinah khan ka hma a thusawi khan an hming te kha a han lam chhuak hial hial a, a ropui a. Kei tumah ka hre ve lem lova, an hming hmerh a han sawi tur. Kan member in a sawi kha ka hriat ve pawl te pawh an ni. Chutiang chuan kan police te hi sorkar hian hei ai hian chawimawi leh zual ila, award pe ila, an service ah reflex sela chuan anmahni pawh kan tiphur leh zual ang tih kha Pu Speaker, ka ring tlat a.

Tin, hei kan ramah kidnap te kan hmehriat ve ta a, kan Mizo tawng hman ve hmiah hmiah tawh a. Mahsela, Congress sorkar chak tak hnuaiah hian kidnap hi term chanve chhungin wawi khat a thleng a ni a, chu pawh chu pawisa siki pawh pe lova, kan police te huaisenna leh kan Home Minister te, kan Leader te thawhrimna avanga chhan chhuah an ni mai hi a ropui ka ti a. Vawiinah hetiang resolution kan police te chawimawina tur House-a an rawn pu lut hi ka support a, pass ngei tha in ka hria a, ka rawn sawi ve a ni e, ka lawm e.

Pu LALDUHOMA : Pu Speaker, hun kal tawhah khan tuna kan House Leader ho hian helai hmunah hian sorkar rin tawh lohna motion kan lo pu lut tlang tawh a. Chutah chuan khatih laia sorkarna chelhtute leh helho inkungkaihna chi hrang hrang, in kidnap pawha tlanna sum te nena khul chhuah an nih dan, a hun, a hmun, mihring hming te nen lam kan tar chhuak tawh a. Khami ni khan min chhanna hun nilengin an nei a, chhanna kam khat mah an nei lova. Nilai zan thupui hawngtu in a hawng zo a, chairman in “sawi tur nei apiangin sawi rawh u,” a ti a, sawi tur an neih loh avangin inkhawm an bang ta a. Inkhawm banah thingpui innaa an sawi leh teuh si ang deuh khan a hun laia chhanna nei si lo khan mual lehlamah arpa dawih zawk ang maia khuan vak vak ching te an awm a. Thil hlui ni tawh mahse wawiin ah hian hetiang subject hian kan ram a rawn tuam leh ta a. Kha thil hlui kha sawi thar lo niin chutianga a awm lo tih te mipui hriatah kan sawi leh ta a. Chuvangin kan police te hna tha tak mai thawhna hrulah hian tunhma lama thil lo thleng tawhte kan tar lan nawn leh hi tulin ka hria a, thleng tawh lo se kan duh vang a ni.

Kum 2000, April ni 15 ah khan BNLF ten Robert Lalsanga, PHE S.A. kha an kidnap a, bus min hal sak bawk a. Chumi thla vek ni 19-ah Lalnunfela an kidnap leh a, chumi thla vek ni 25 ah Lalchhanhima, J.E. leh Lalzawmliana, S.A. te an kidnap leh a, a thla bi pawh ni lovin a ni bi, a kar bi in khatih lai khan min kidnap mawlh mawlh a. Hemite pahnih kidnapped hi Party pakhat mi thenkhat te leh (an hming chu ka sawi tawh lo mai ang). 1st I.R. Bn. Mualvum ami ten an umzui a, chhanchuah tum nilovin. Tichuan, BNLF Camp Maikhawr ah pukah an zuk inbia a, tlanna sum nuai sawmnga an lo demand a. An lo haw leh a, khatih laia kan Chief Minister hovin cheng nuai sawm hian a tih chhuah theih mai ang an ti a. SBI Mission Veng Branch atangin nuai sawm an draw a, chuan an kal thlak pui leh a. A kal thlak puitu Motor No. leh mihring hmingte kha ka sawi tawh lo mai ang. Chumi an kal chu kawng sir atangin an thla lak a ni a. Vartian chanchinbua an thlalak zawng zawng nen a lo chhuak a, khatih laia Minister khan a hau na hle tih pawh kan hriat kha. Tichuan zuk pek an tum a, an lo pawm lova, an lo kir leh a, nuai sawm dang an lak belh leh a, tichuan nuai sawmhnihin an inremsiam ta a. 2000 May ni 12 ni khan Maikhawr ramhnuai ah he tlanna sum hi pek a ni a. Tichuan, hemi ni hian hemi te pahnih hi an chhuah ta a. Duaisura an tih anmahnih hruai vel tu hian Khantlang BSF camp-ah a hruailut ta a. Chuta tang chuanrawn luh puin Lengpuiah zan te rawn riahpui leh te tein a tuk zingah Tennis Court-ah kan lo lawm a. Khatih lai khan tlanna sum petute chu Lengpuiah awmin Uisa an la ei mek a ni. Khati khawp khan kan hrechiang a nih kha. Tichuan, khami rual khan vantlang hriatah Peace Mission siamin Rev. Lalsawma te, Rev. A.K.Doia te, Upa C.Huakunga te tirh an ni a. “Tlanna sum in lo keng em ?” an ti a, “keng lo” an ti a, hmuh pawh an lo hmu duh miah lo a ni, BNLF hotute hian. Amaherawhchu, an biak duh tawh miah loh hnuah tlanna sum an dawng ta a, ni 12 zanah an General hian lehkha a va thawn a, “naktukah inhmu ang u” tiin rawtna a va thawn ta chung mai a. A tuk zingah Rev. Lalsawma ten tlanna sum an pe a, an chhuah daih tawh tih hre miah lovin, nasa taka tawngtai chungin thlamah an pan ta a, an zu inbia a. Helho te khan tlanna sum pakhatmah an sawi tawh lo. A hmaa “tlanna sum in rawn ken loh chuan kan be duh lo che u”, ti te khan an lo sawi miah tawh lo. ‘Hei, in mi man te, an thawmhaw te an chung ten min thawn a, khawngaihin min lo pek sak rawh u’ an tih pawh in ‘E, ti khan han hawn leh rawh u, kan rawn chhuah dawn a lawm’ an ti fel et tawh. Chuvangin, heng zawng zawng hi helai hmuna kan sawi tawh hnu a ni a, ‘a chuti khati lo’ tia sawi a nih leh avang hian ka hreh chung chungin sawi nawn leh a ngai a. Thudik hi chu thudik a ni a, sawi mai turah ka ngai a ni. Chuvangin, mipui hian thudik kan hre tur a ni. Tute hi nge kan nih, eng tih hi nge kan chin, tunhnu zelah ram hi kan kuta dah ngam a ni dawn em ? tih hi Zoram mipui kan inhriattir nawn leh pawh ni teh se.

Tichuan, a hnu lawkah BNLF hel hovin kan police 7 min thah sak a, 6 an kap hliam a, chumi te chu Assam Police –ah an tlanchhia, an umzui a, an man a, Cachar-ah, kha nuai 20 nen khan, Pu Speaker, an man a ni. Chuan, Mizoram Police in an zuk ngaihven vat a, Mizoram Police kutah an rawn hlan a, khatih laia kan Home Minister khan a hminga thubuai siamin, Officer an tirh te ka sawi lo ang, an tan a pawl theih takin, Bairabi-ah an hruai thla a, lawngleng in Tripura ramah an chhuah pheih a ni, an thlir reng ringawt mai a ni, ‘AN TLANBO’ an ti. Khati khawpa inchiahpiahna kha kan hun kal tawhah khan a awm a, kan hrechiang em em a ni.

Tichuan, a hnuah M.P inthlan a lo awm a, chutih lai chuan Party hrang hrang leh NGO ten Save Mizoram Committee kan din a, kawng kan zawh a, total

bandh kan siam a, Tripura Camp-a Bru Refugee ho khu roll-ah thun ni suh se tih kan demand a. Mahse sorkar khan a thun lui a, thun lui mai nilovin, Ballot Paper 3620 an keng thla a, a vaiin helho kutah chung chu a lut a, helho ten Ballot Paper zawng zawng Silchar-ah an tlanpui a. Silchar Hotel-ah MNF hotute nen zanah an inkawm a, Room chhungah an chhu ta mial mial a, Vote 3620 hi a bo a bang awmlo in MNF M.P Candidate khan a chang fai vek a. Chu chu by-post in Aizawl-ah an rawn thawn chho dawn tih kan hriatin bawlhhlawh ema kan hriat avangin kan naute Post Office-ah, chu Ballot Paper an rawn thawn chhoh lo lambun tur chuan kan tir a, man an ni a, thubuai an awrh a, rei tak Jail-ah an tang a. Total Bandh kan siam leh a, hetiang hi anih avangin ‘a tawp em mai, he vote hi chhiar ni suh se’ kan ti a, kan ngen a. Tin, “inremna thu hi anni nen hian sawi ni hrih suh se, inbiakna hi tawp rih rawh se, biak tlak an ni lo ve” kan ti a, engamaha ngaih a ni lo. Chutiang chu a nih avangin khang zawng zawng kha kan tuar zo ta lova, thudik chu mumal takin he House zahawm takah hian kan tarchhuak ta a nih kha. Chhanna an nei anih chuan khami ni khan min chhang tur a ni. Speaker in “Mizoram pumpuiin an thlir thup che u a nia han sawi teh u a, engatinge” a tih mawlh mawlh pawhin sawi tur an nei lova, kan bang ringawt anih kha. Vawiin ah hian engahnge thudik kha a ni lo lo a kawih mam leh kan tum a, mipui hi bum thar leh kan tum. Chuvangin anihna tak hi sawi tha ka ti a, chutiangan atanga kan lo khawilen tawh zawngchhang ten min nuthuri zuam tawh a, tunah hian min han kidnap leh ta a. Ama’rawhchu, kan Home Minister zahawm takte, kan Chief Minister zahawm takte kaihhraina hnuai ah kan police ten hetiang tak maia hna an thawk a, chengkhat mah seng lova an chhanchhua hi a ropui kan ti a, kan fak kan chawimawi a ni. Sawi tawh tute zawng zawng in an sawi an chungchang a an fakna leh “ni se ni se” an tih zawng zawng kha ka tawmpui vek. Commando te pawh kan training tir a, tunhmain hau tak takin an training a, tute emaw vawk chaw zawngah an chhawr mai mai zel a, awmzia a nei thei lova. Tunah hi chuan helho hian min hlau rawh se, kan ram hi tihbuai i phal tawh lo ang u. Heti thak hian ri zel ilang kan mipuite tui takin an mu thei tawh ang. Chuvangin he resolution hi tha ka ti a, kan police te pawh chak leh zual leh thatho leh zual leh hlawhtlinna tam tak nei chho zel turin duhsakna nen hei hi ka’n sawi a ni e. Ka lawm e. (Speech not corrected) (Speaker : Pu R. Lalrinawma ko ang)

Pu R. LALRINAWMA : Pu Speaker, ka lawm e, resolution lawmawm tak vawiinah sawiho na hun kan nei thei a, lawmawm hlein ka hria. Nimin lamah Official Resolution Remna leh Muanna hlut zia te, Mizoram a buai a, kan tawrh nasat zia te, he Remna leh Muanna kan neih hlu tak hi vawn him zel a tul thu te leh vawngchim zel tura mitin te he House-in a ngen thu te kan sawi tawh a. Chutah inhmeh tak maiin tunah helho in an ruk bo, Remna leh Muanna ti derthawng zawnga thil thleng khangang vawiin ah lawmthu sawina tur awm hi a inhmeh ka ti hle mai a. Sorkar hmasa hunah khan he Remna leh Muanna hi tih derthawngin a awm a, ka hmaa member zahawm tak Pu Lalduhoma khan a ruh langin a’n sawi a. Khawthlang lama thil thleng a ni a. Khawchhak lam thil thleng hi a thling baw hawka han sawi ka’n duh deuh a, a ruh lang mai ni lovin. Court record-a awm vek a nih avangin hmingte pawh hi sawilan pawl lem lo a ni a. Pu Speaker, sawrkar hmasa hunah 1999 atanga 2003 inkarah ringawt khan inrukbona tum 11 a thleng a ni. Chutah chuan mi 44, khua leh tui pawl sawi lote rukbo an ni a. Kha khan kan ram remna leh muanna a tiderthawng em em a. Chung chu ngaimawhin, pawl sawi lote rukbo an ni a, heng hi police-te kan nei a, chhanchhuah lampang thawm a awm lova, sum an phut thin a, sum phuta

inrukbo zel mai leh sawrkarin tlanna sum a pe ngei nia mipui zawng zawng pawhin an hriat hi a lo pe ngei a ni tih leh khang rukbo te a reh tawhna tur khan khatihlaia opposition MLA, vawiina kan Home Minister zahawm tak hian press conference-ah a sawi chhuak a.

Tin, eirukna chungchang te pawh a sawi lang a. Rungdil Road Scheme hnuaiah cheng nuai 44.8 khatihlaia Minister Pu R. Tlanghmingthanga nuphalpa hnenah hna thawk si lova pek a nih thu te a sawi lang a. Khang corruption a puhnaah te khan ngaimawha thubuai siam sak si lovin ‘thudik lo a ni’ ti si lovin a finfiah har tur nia an hriat, ‘helho hnenah sum an pe a ni tih hi kan pe lo a ni’ tiin thubuai an siam sak ta a, ‘min tihmingchhia a ni’ tiin. Chu thubuai chu khang corruption a puhna ‘cheng nuai 44.8 hna thawk si lova inpek’ tih te kha sawi lang lo vin helho chungchang finfiah har tur chauh kha an sawi ta a. Tah chuan vawiin a kan Home Minister zahawm tak hian thubuai rip tak a nei ta a. Court lam pawh a strict hle mai a, “Hei, tiang hian in sawi a, a petu emaw, a dawngtu emaw court-a i rawn hruai loh chuan kan ti mai mai dawn lo a ni,” a ti ngat ngat a ni, khatihlaia roreltu fel tak, court lama mi pawh khan. Amaherawhchu, keini a naka zentu, kha tih laia, court-a ding kan ni a Pu Speaker. Sawrkarin a ruka a thiltih, helho a dawngtu an ni a, sawrkarin man se la, kan rawn hruai ang court-ah. Tin, a petu lam lah anmahni anni a, engtin nge kan rawn hruai ang kan ti a. Amaherawh chu, thudik hi a ding chang thin a, Pathianin thudik tarlan a duh a. Tahchuan vanneih thlak deuh maiin a pawisa petu lam, sum pek an tiam, an pek leh si loh thinrim chuan khatiang thubuai kha a awm tih chanchinbu lam atang tea alo hriatin “sawi tur ka nei a ni” tiin Pu H. Biaka a ni a, court-ah a rawn lang hlawl mai a. Ani chuan Pu Lalengmawia, Kangrengdawr ami nen, (Kangrengdawr hi khua a ni a). Hemi nen HPC ‘D’ te an dawr thu leh tlanchhuah nan cheng nuai 10 an phut thu te a sawi a. Chumi rawn thlen leh tura Aizawla an lo kal kha, nichina member zahawm tak Pu T.T.Zothansanga’n a sawichhuah, an worker Ramhlun Veng ami helho bail tu a tih (court record-ah a awm a, a hming pawh Pu Rinpuia ani a, khatih laia MNF Party hruaitu) khan PWD atangin cheng nuai 10 a rawn la a, Pu Sangbera, Dinga leh Lalengmawia te nen Gypsy in pe tur chuan an kal ta a. Zemabawk Thuampui-ah Pioneer Camp atangin a sen chi case 2 an lak thu te, Sakawrdaiah an in thu te, chutah Kangrengdawr a Pu Lalengmawia inah HPC ‘D’ te pawisa an pek thu leh lawnglenga an kal thu te a sawichhuak ta a. Tin, hemi bakah hian vanneih thlak deuh maiin a dawngtu lamah khan 2004-a in surrender, mahse tuamhlawmna tura an tiam an pek leh duh si loh Lalropianga kha a rawn lang ve leh ta bawka. Ani khan a hmaa thusawitu thusawi hre miah lo khan Pu Lalengmawia ina pawisa an lo dawn thu leh lawnglenga an rawn kalpui avanga a huh a, a phoro tua a tan thu te a rawn sawi ta vek a ni. Nichina ka hmaa member zahawm tak Pu Duha’n khawthlang lama thil thleng chiang taka a sawi ang khan, khawchhak lamah HPC ‘D’ te rukbo chungchangah pawh khatiang kha thil thleng a ni a. Chuvang chuan vawiin ah hian he House-ah, Zoram mipuite hriatah hian thudik hi tarlan a tul a. Hetianga kan ram dinhmun derthawng taka a awm thin laia tun sorkarah rukbona an thleng ve leh a, kan Home Minister te, kan Chief Minister ten huaisen taka an hmalaknaah police te an fakawm em em a, he resolution hi pass ngei turin ka support a. Tun hma te chuan police te kha an tir ve em tih a hriat loh a. Police force ten rukbo te chhanchhuah tuma an beih kan hre ngai lo va. Hel hovin nunna thap in hautak takin mi an robo a, ramhnuai ah an hruai a. Tute emaw va kal a la chhuak leh ang mai in an lantir thin a ni, khatiang kha kan mipuiin an awih lo. Pha pha mah sela tumah in an awih chuang lo tih ka sawi lang ve duh a ni. Ka lawm e.

SPEAKER : Pu R. Lalzirliana

Pu R. LALZIRLIANA, MINISTER : Pu Speaker ka lawm e. Vawiin ah kan member zahawm tak Pu K. Lianzuala resolution sawiho theia kan awm hi lawmawm ka ti khawp mai a. Ka hmaa member zahawm tak tak ten an sawi ang khan thudik a nih avang hian sawi leh thin te hi a ngai a. Thenkhat tan thu hlui leh thu hriat chakawmlo mimahsela kan ramah dikna a lal zel theih na turin sawi zel chu a tha thovin ka'n hria a. Kan mover zahawm tak khan kan police te hi silai tha zawk te, thuam that ni thei sela tih rawtna a rawn siam nghal a. Khang ah pawh khan ngaihtuahna thui tak kan hotuten an lo nei tawh thin a. Tunah hian India sorkar sipai te pawhin an hman loh U.S. siam silai tha tak tak kan lei dawn a, a sample a lo thleng tawh a, kah chhin mai turin, Silai kap thiam deuh te chu helai mi te pawh hi kan ruai che u ang a. Anmahni pawhin tunah hian an trial mek a. Delhi ah te a then chuan an zu trial a, chutiang chuan India Sipai tha ber ber te pawh in an la neih loh, kan sipai police te hi kan pe dawn a ni tih ka'n sawi hmasa duh a.

Tin, hmannah khan MNF Press Release ah khan hel te hi tu sorkar mahin pawisa an pe ngailo tih te kan lo hmu a. Khang avang khan thil sawichhuah tlak tawh lo a ni, a tul tawh lem lo e kan ti chungin kan party P.R. te pawh kha a lo chhuak ve leh a. Tin, tukin zing maiah khan Rev. Chanchinmawia thih dan hi sorkarin sawi chiang rawh se tih MNF Women Front thuchhuah te khan a rawn ti leh te kha engtizia nge ni ang aw ka ti a. A vihna chemte, a thahna chemte te Malkhana-ah a awm a, rukbo a nih hnuah khatiang kha mi chhui leh duh an awm takin tia a tirah silfai vek ani a, a thahna chemte ngei Malkhana-a awm pawh rukbo a nih hnuah a han incho leh vel te hi chuh buichhe laih lova inpuang hi kan ang mai em aw tih te pawh hi ka ngaihtuah a. Heng hi sawi pawh kan tum loh, amaherawhchu, mi hi an rawn cho pawrh leh tlat thin a, zep pui tum pawhin zep pui hleihtheih loh te pawh ni hian ka hria a, a pawl ka ti khawp mai a ni.

Vawiina kan resolution hi United Democratic Liberation Army inti te, mi thatchhia, mahni thawhrim rah nilo, mite thawhrim rah va laksak mai tum, Assam hel pawl pakhat te thiltih a ni a. ABCI mi pahnih an rubo a ni tih kan hria a, hengah hian sawi tur tam tak a awm thei ang a, tawite in ka'n sawi ang a hun a awm loh avangin. Tuna kan ngaihtlak tawh ang khan 1996-2000 ah khan tum 11 inrukbona a awm a, tahchuan mi 23 in an tuar a ni. Tin, 2001-2008 ah khan tum 21 inrukbona a awm leh a, tahchuan mi 63 in an tuar leh a. Tin, 2009-2011 chhung khan inrukbona tum khat a awm a, mi 2 a tuartu an ni tih kan hria a ni. Tichuan, a vaiin 1996-2011 ah hian tum 33 inrukbona a awm a, mi 88 in an tuar tawh a ni. Heng rukbona khua te hi 22 ani nghe nghe a ni. Chutiang ah chuan kan ngaihtlak tawh ang khan inremsiamna ani ang chu, engtizawnga inremsiamna nge ni chu kan ngaihtlak tawh kha. Khatiang khan him dam taka chhuah leh vek an ni a. Tun tum ber kherah hian vanneih thlak tak, vanduaithlak tak ang rengin, kan chhanchhuah tum te khan, hliam an tuar a. Hemi inrukbona alo thlen hian kan D.G te leh kan hotu te nen kan sawi ho a, a hma in C.M ka rawn a, he thil ah hian compromise na engmah a awm tur ani lo a, chutiang chuan kan chhuhsak ngei ngei tur a ni tih ngaihtuahna a nei a. Kan

C.M. rilru kan hria a, chutiang chuan kan hnathawk tute, kan police te helaiah hian insiamremna emaw, palai emaw tirh tura ni hauh lo a, kan palai chu a tul chuan silai mu a ni mai tur a ni, kan hotuten an ti a. Chutiang chuan in theitawp in chhuah ang a, harsatna awm thei zawng zawng, sum leh paia in harsa a nih pawhin hei chu sawrkar kan awm ve a, sawrkarin a ngaihtuah zel ang, kan MLA te leh Party tin te duhdan a ni ang tih ka ring a, chuvangin kan Chief Minister in min duhna angin, hei chu kan la let leh ngei ngei tur a ni. La let lo chuan in lo haw tur a nilo a, in feh chhuak nghal ang a tiin kan hotuten thu an chah a, chutiang thuchah chu kan la dawng ngailo reng reng a, Tunah hi chuan rang takin kan theih ang tawk kan chhuah ang an ti a, an theih tawk chhuah in an kal ta ani a. Tiang chuan an rukbo atanga ni 11 ni, zing dar 8 ah chuan inkahna a lo awm ta a, khang inkahna te kha, hetah tlang sang zawk atangin hel ten an rawn kap a ni a, khang ah te khan an kap hlum lova a lawmawm khawp zawk mai a, kan naute kha an lo hmu hmasa si a, intelligence te, enthlatute an lo dah ve vek a helhoten, chutiang chuan helhoten ral atang in an rawn kap hmasa a. Heng zawng zawng ah hian ka thinlunga thar reng thin chu, LALPAN khawpui a ven loh chuan a vengtute chu an meng rim thlawn mai a ni, an meng hah thlawn mai a ni tih kan hmu a. Pathianin kan police te min ven sak a, an tih tur, an mission chu hneh takin an zuk ti thei ta hi a lawmawm kan ti em em mai a. Helaiah hian fak tur an awm a nih chuan khawvel angin kan infak lo thei lo a, amaherawhchu a tak takah chuan kan Chief Minister in emaw, Home Minister emaw lam nilo in Pathianin kan ram hi helaia sawrkarna a hminga chelhtute hi a la venpui a, a la thawhpui a ni tih hi a langchiang hle in ka hria a Pathian chungah kan lawm tak zet ani tih ka sawi duh a. He operation a kalte hi nichina kan Deputy Speaker leh mi dangte pawhin an rawt ang khan theih nise promotion pek vekte pawh kan duh. Kan hotute'n an la ngaihtuah zel ang a, chung ah chuan tih theih dan phung pangngai awm chu Commandant reward te a awm a, DGP reward te a awm a, Governor medal te a awm a, Good Service mark tihte a awm a, chung chu an phu ang theuhin eng emaw tak hi chu pek kan tum dawn a ni. Tin, chu bakah chuan Home Minister hian discretionary fund a nei ve a, chumi atang chuan operation a zuk kal zawng zawngte hi ₹ 1000/- theuh pek a tum bawk a ni tih ka'n sawi duh a ni e, ka lawm e.

S P E A K E R : Dr. R. Lalthangliana'n han sawi sela chumi zawhah chuan kan kal zel dan tur kan sawiho dawn nia.

Dr. R. LALTHANGLIANA : Pu Speaker, ka lawm e. Niminah Official Resolution tha deuh mai sorkar lam atangin kan pu lut a. “Mizoram in kum 25 chhung lai mai remna leh muanna kan nei ta hi lawmawm kan ti a, remna leh muanna kan neih hi chhungleh leh pawn lam atanga tihchhiat a nih loh nan mitinte inpe thar leh turin he House hian a ngen” tih kha ropui ka ti khawp mai a. Amaherawhchu, vawiin a kan resolution hi khatiang hawi zawng thil lawmawm kan sawiho dawn emaw ka tih laiin police te chawimawina leh fak tlak an nih zia resolution-ah hian police te tak lampang ai hian sorkar hmasa lampang beihna resolution ang zawnga kan kai chiam mai hi chu Pu Speaker, a fello ka ti deuh va. Tin, he House-ah hian Pu Speaker, kan sawi duh chu he House-a thu ve lem lo, kan sakhaw puithiam hmingte leh tutute emaw heta sawi ve thei lo hming kan lam ri tam lutuk te hi he House kan kalpui danah hian a fel ber ang em aw, miten min hmuh dan hi tih

ngaihtuahna ka nei deuh va, chu chu tlemin ka ngaimawh deuh hlek a. Hei aia rorelna sang hi Mizoram in kan nei lo va, chuvang chuan zahawm taka mimalte, tutute emaw helaia sawi ve thei lote chanchin han sawite leh resolution kan neih hian tha tak maia sawina boruak kan han neih chhoh zel hi opposition kan nih pawh hian kan duhdan a ni a. Tukin zing pawh khan Pu Speaker, tha takin resolution kha kan sawi a. Kan passed ta a ni a. Vawiin ah phei chuan ruling party atanga kan member zahawm tak, kan MLA zahawm tak Pu K. Lianzuala resolution hi tha kan ti khawp mai a. Amaherawhchu, kan resolutiona kan dah ang tak hian Mizoram police ten heng kidnapped te an chhanchhuahna kawnga an hnathawh dan, chawimawi tlak an nih zia lai sawi ta mang lova, a behbawm, sorkar hmasa lai eng eng emaw kan han pir chiam chiam mai hi Zoram mipui ten min thlir dan tur hi ram hruaitute, (a hminga tling lo tak ni mahila) min hmuh dan hi chintawk an nei lutuk ang a tih ngaihdan ka nei deuh hlek a, chulai chu ka rilru in a helhkam ve deuh hlek a ni. He House hi politics a inbeihna hmanrua te leh tute emaw va inchungtlakna chi thil ang zawng hian ngaihtuahna hi nei lo hram hram ila tih hi ka duh khawp mai a. Kan vei zawng te leh eng emaw chu kan sawi tur ani ngei mai a, amaherawhchu, vawiin ah hian Mizoram police a sang tel in min lo thlir in ka ring a. An resolution ah hian an mahni chawimawina tur leh fakna chi kan tih rual rualin anmahni chet thatna leh chawimawina lam chi hi kan sawi lo deuh in ka hria a, chulai chuan tlemin ka rilru a ti buai deuh va. Engpawhnisela, police ang a zuk kal hrim hrim te leh department ang pawh hian electronic media ti mai ila chanchintharah te leh T.V ah te interview leh engemaw te pawh hi an nei lem ngai lova, sawi rik hi an nei lem lova, Party hmalakna leh sorkar hrim hrim in credit lak tumna lutuk ang chi hian thil hi a kal emaw ni chu aw tih te a thlir theih viau mai a.

Engpawhnisela, he resolution hi anihna ang taka kalpui dawn chuan resolution tha tak niin ka hria a. Kan Mizoram Police te hi India ram huap pawhin an che tha hle a, an thawk tha a, hei hi chu sawi loh pawhin a takin an thawk chhuak ani tih hi a lang a, a ropui kan ti khawp mai a, an chungah hian lawmthu sawi tur tam tak kan nei in ka hria a. Tun aia nasa zawk pawh a la thawk thei tur atan hmanrua te leh training te kan la pek zel pawh hi a tul dawn in ka hria a. Kha kha kan Home Minister zahawm tak pawhin arawn sawi kha an ti tak tak dawn te anih phei chuan tha hle in ka hria a. Chawimawi phu te chawimawi hi rorelna a thu te pawhin kan tih tur dik tak pawh niin ka hria a, chu chu ka rilruah a awm reng a, ka'n sawi duh a ni. A beh bawm neuh neuh kha han sawi tam ka tum lova, kan police te he thila fak tlak an nih zia te, chawimawi tlak an nih zia te, rin tlak an nih zia te tun tum operation-a an thil tiha a lan chhuah na lai tak, kan tih tur dik tak kan tih hi chu a pawimawh a ni tih ka sawi duh a ni. Chuvang chuan he resolution hi tuna a nih na ang tak hian kan adopt mai hi tha ka ti a, Mizoram police in an chhanchhuahna hi chawimawi tlak kan ti a, he House hian lawmthu kan sawi a ni, tih lai hi he lam pawhin kan thlawp khawp mai tih ka'n tarlang a ni, ka lawm e. (Speech not corrected)

S P E A K E R : Awle, kan hun a lo tawp dawn tep ta a, phar chu in la tam khawp mai a, engtin nge kan tih ang? Kan la kal zel phawt mai dawn em ni? Kei chuan a resolution neitu kha pass rawn dil tawh mai se ti a koh ka duh tawh khawp mai. Mahse, dar 4:00 p.m hian committee pawimawh deuh mai nei kan hotute zing ah an awm a, dar 4:00 ah bang ngei thei tura inngai khan. Nia kan pel khat khawp a ni, private member resolution ah hi

chuan..... Ti hian i ti mai ang u aw, ka dinglam ami in in sawi tur hi chu ka hre vek a, ka veilam a mi a chanve leh lam in in sawi tur hi chu ka hre vek a, a chanve leh lam in an sawi tur hi chu ka hrethiam lo a, chuti vel chu ani a, chuvangin kan hriat reng hi kan zin vah na ah mipui te hnen-a House-ah kher lo sawi tam thei tur ah in ngai ila. A tul a nih chuan Independence Speech ah te pawh telh ta teuh mai ula a pawl dawn em ni ka ti a, ka dinglam ami te chu. Ka veilam ami te erawh kha chu

Pu K.S. THANGA : He House hi thudik sawina hmun tur a ni a. House-ah hian pawnlama kan sawi dan nilo thudik tak chiah hi sawi tura chhia chham kan ni a, chuvang chuan vawiin ah hian Mizoram mipui hriata thudik sawi ngai hi a awm thin a, kha vang khan hmanni ah te press conference ah te hriat sual vang nge mahse hria niawm ang tak si a thilrawn sawi kha House-ah hian han inchhan te pawh a tul ve na lai a awm a. Chungte chu kan sawifiah ve a ni. Pu Speaker.

SPEAKER : I duh tawk mai ang. Resolution neitu in passrawn dil rawh se. House Leader pawh i ko tawh lo mai ang. Dar 4 : 00 ah committee pawimawh a neih kha. (Interruption.....) Kan pel tawh si a, hun kan pawt sei mai dawn em ni ang Chair lam atang hi chuan ka la zo khawp a, mahse, lehlamah mi pawimawh tak tak in ni hlawm si a (Interruption.....) dar 4 bak pelh theih loh tih kha a in ziah loh avangin member te ka zawt mai che u a ni e. Resolution neitu kha sawm mai ang.

Pu K. LIANZUALA : Pu Speaker, ka lawm e. Sawi chak tam tak kan la awm a, kan member zahawm tak tak te kan Home Minister tiamin anrawn sawi a, theih chu nisela kan vaia sawi kan chak nite pawhin a lang a. Engpawhnisela, resolution hi sawi chakawm lam a ni bawka kan phur tlang ah ngai ila. Vawiin resolutionrawn sawi tu zawng zawng te hnenah lawmthu ka sawi a, chutih ruala ka sawi duh chu nakin zelah misual ten an ruk bova te tlanna sum pek chin loh hi a tha a, hmaraw dik a chhanchhuah zel ni sela, sum a in chhanchhuah hi awm tawh lo se tih hi he House kaltlang hian ka sawi duh a ni.

Tichuan, ka resolution “tun hnaia ABCI hnathawk tu te pahnih Assam hel pawl pakhatin an kidnap te Mizoram police in an chhanchhuak hi chawimawi tlak kan ti a, he House hian lawmthu a sawi a ni” tih hi min pawmpui a min adopt sak turin House hi ka ngen e.

SPEAKER : Kan buk ang a, remti apiangin “remti” ti rawh u le. Remti lo kan awm lo maw. Awle, “tun hnaia ABCI a hnathawk tu pahnih Assam hel pawl in an kidnap te Mizoram Police in an chhanchhuak hi chawimawi tlak kan ti a, he House hian lawmthu a sawi ani” tih chu House-in lungual rual takin a adopt ta a ni.

Common Wealth Parliamentary Association Conference London-awm tur inbuatsaih nan briefing meeting dt.12.7.2011 hian Delhi-ah an ko va, kal ve a tul dawn a. Chuvangin dt.11,12,13 hi chu Session-ah ka tel thei dawn lova, member-te ka hriattir a, kan Hon. Deputy Speaker in Session chu min kai hruai dawn a ni. Ni 11.7.2011 zing lam dar 10:30-ah House hi kan thukhawm leh dawn nia.

Sitting is adjourned at 4:07 P.M.